

ISAIAH

¹ Judah siangpahrang Uziah, Jotham, Ahaz, Hezekiah tinaw a bawi awh navah, Amos capa Isaiah ni Judahnaw hoi Jerusalem kho hoi kâkuen lah a hmu e vision,

Cathut ni a taminaw a yue

² Cathut ni lawk a dei dawkvah, Oe kalvannaw, thai awh haw. Oe talai, hnâpakeng haw. Ka kaw k e catounnaw ni Kai na taran awh toe. ³ Maito ni kakhoumkung a panue. La ni hai kakawkkung e dokko a panue. Isarelnaw ni Kai na panuek awh hoeh toe. Ka taminaw ni pouk panuek awh hoeh toe a ti.

⁴ Miphun kathout, sak payonnae ka phawt e tamihu, kahawihoehe hno ka sak e catoun, rawknae canaw lah bo na o awh tOUNg aw. BAWIPA hah na ceitakhai awh toe. Isarelnaw e kathounge Cathut hah na bari awh laipalah, hnamthun sin awh teh, na kamlang takhai awh toe. ⁵ Ahnimanaw hah bangtelamaw bout ka hem han vai. Bangtelamaw bout ka yue han vai. A lû teh hmâtan hoi king akawi, na lung hai tha khoeroe awm hoeh toe. ⁶ Khoktabei koehoi lû koe totouh, damnae awmhoeh. Hmâtan hoi, a phing teh, a hnai ka lawi e seng lah ao. Hote hmânaw hah pâsu hoeh, kawm hoeh, satui hai hluk pouh hoeh rah.

⁷ Nangmae ram teh tami kingkadi lah ao. Khonaw hai hmai a kak toe. Na talainaw hai ramlouknaw ni na hmaitung vah a ca awh

vaiteh, taran ni a raphoe tangcoung e patetlah tami kingdi han.

⁸ Zion canu hai misur takha ringnae patetlah payin takha dawk e rim patetlah taran ni a kalup e kho patetlah ceitakhai lah ao. ⁹ Rasahu BAW-IPA ni mamouh hanelah younca hai cawi sak hoehpawiteh, maimouh teh Sodom kho patetlah o aw haw teh, Gomorrah kho hoi kâvan aw haw.

¹⁰ Sodom kho ka uk e bawinaw, Cathut e lawk hah thai aw haw. Gomorrah khocanaw kaimae Cathut lawk hah hnâpakeng aw haw. ¹¹ Cathut ni a dei e teh, nangmouh ni na thueng aw haw e satheinaw teh kai hoi bangtelamaw a kâkuet vaw. Thuengnae tu, ka phuekuek lah na paca e saring thaw Naw hoi ka boum toe. Maito, tuca hoi hmaenaw e thi hah ka ngai hoe h. ¹² Ka hmalah minhmai patue han na tho aw haw navah, Kaie thongma coungroe hanlah apinimaw na patoun aw haw. ¹³ Ayawmyin e pasoum hno hah bout thokhai aw haw hanh lawih. Hmai na sawi aw haw e hmutui hah ka panuet. Thapa rei hnin, kamhluem hnin, kamkhueng hnin naw hai ka panuet. Hawihoehnae hoi kâkalawt e kathoung kamkhuengnae hah ka panguep thai hoe h. ¹⁴ Ka muitha ni nangmae thapa rei hnin hoi nangmae pawinaw hah ka hmuhma. Kai katarawk e lah ao teh ka panguep lawi ngawt ka tawn toe.

¹⁵ Nangmouh ni, na kut na kadai aw haw toteh, alouklah na kangvawi takhai aw haw han. Avai moikapap na ratoum aw haw nakunghai, ka thai mahoe h. Na kutnaw teh thi hoi akawi. ¹⁶ Kâpasu aw haw, kamthoung aw haw. Na payonnae hah ka

hmaitung hoi takhoe awh. Kahawihoehe nuen-cang hah kâhat awh leih. ¹⁷ Kahawi hno sak hanelah kamtu awh. Lannae hah tawng awh. Ka lawngkoi e hah palan awh. Naranaw hanelah kalan lah sak awh. Lahmainunaw hanelah kalan lah sak awh. Lahmainunaw hah pahren awh.

¹⁸ BAWIPA ni a dei e teh, tho awh. Cungtalah pouk awh haw sei. Nangmae yonnae teh ka paling nakunghai tadamtui patetlah a pangaw han. Âthi patetlah ka paling nakunghai tumuen patetlah ao han. ¹⁹ Nangmouh ni ngainae lahoi lawk na ngâi awh pawiteh, ram thung e hnokahawi e a pawnaw hah na ca awh han. ²⁰ Hatei na taran awh pawiteh, tahloi hoi na due awh han telah BAWIPA e pahni ni a dei toe a ti.

²¹ Yuemkamcu e kho teh bangtelamaw ka kâyawt e kho lah a kangcoung vaw. Ahmaloe teh, kângingnae hoi ka kawi e, a thung lannae ni hmuen a la e lah ao ei, atuteh tamikathetnaw ni hmuen lanae lah ao toe. ²² Na tangka hai a ei lah ao toe. Na misurtui hai tui hoi a kâkalawt toe. ²³ Na khobawinaw teh, taran lah a thaw toe. Tamrunaw e hui lah ao awh toe. Hote bawinaw pueng ni tadawngghno a ngai awh teh, tawknae phu dueng a pâlei awh. Naranaw hah khenyawn awh hoeh. Lahmainunaw teh banglahai ngâi awh hoeh.

²⁴ Hatdawkvah, Isarelnaw e Athakaawme, ransahu Bawipa Jehovah ni a dei e teh, Aya! Kai na ka taran e naw hah bat ka takhoe vaiteh, ka tarannaw koe moi ka pathung han. ²⁵ Nang hah na kuet vaiteh, a ei hoi khoeroe na thoungsak vaiteh, thounghoehnae pueng ka takhoe han.

²⁶ Lawkcengkungnaw hoi pouknae kapoekung naw hah, ahmaloe ka ta e patetlah bout ka ta han. Hathnukkhu lanna khopui, yuemkamcu e khopui ati awh han.

²⁷ Zion teh kângingnae hoi thoseh, lanna hoi thoseh ratang lah ao han. ²⁸ Kâtapoe e hoi ka yon e tami teh reirei raphoe lah ao han. Cathut ka cettakhai e teh hraba mueng ka yawng lah hmaisawi han.

²⁹ Na doun e kathenkungnaw hah na kayakkhai awh toung vaiteh, na kârawi e takha ni kângai lah a ru sak awh han. Minhmai mathoe na poe awh han. ³⁰ Bangkongtetpawiteh, a hna kamyai e kathen kung hoi tui kahak e takha patetlah lah na o awh han. ³¹ Athakaawme taminaw teh ngun ei patetlah awm vaiteh, a tawksak e teh hmaitali patetlah ao han. Hottaroi teh reirei kang vaiteh, hote hmai hah apinihai padout mahoe.

2

BAWIPA e mon

¹ Amoz capa Isaiah ni, Judah ram hoi Jerusalem hoi kâkuen lah a hmu e vision teh, ² a hnukteng e hnin teh, BAWIPA im saknae mon teh, monsomnaw e lathueng vah, tawm lah ao vaiteh, caksak lah ao han. Miphun pueng ni hote mon koe a kamkhueng awh han. ³ Taminaw ni hai, tho awh. BAWIPA e mon, Cathut im koe cet awh sei. A lamthung hah na pâtu awh vaiteh, a lamthung dawn awh han, telah kahlawng cei laihoi ati awh han. Bangkongtetpawiteh, kâlawk teh Zion mon hoi

tâcawt vaiteh, Cathut lawk teh Jerusalem hoi a tâco han. ⁴ Cathut ni miphunnaw hah lawkceng vaiteh, tami moikapap hah a yue han. Ahnimae tahloinaw hah thunha lah thoseh, tahroenaw hah tangkoun lah thoseh, a dêi awh han. Ram buet touh hoi buet touh tarankâtuk mahoe h toe. Taran tuknae hai kâpâtu awh mahoe h toe.

⁵ Oe Jakop imthungnaw tho awh. BAWIPA angnae daw k khosak awh haw sei.

BAWIPA e hnin

⁶ Bangtelah tetpawiteh, Jakop imthung, na tam-inaw hah na ceitakhai toe. Bangkongtetpawiteh, ahnimouh teh, Kanîtholae naw patetlah kho a sak awh teh, Filistinnaw patetlah khueyue lah ao awh teh, ramlouknaw hoi a kâhuiko awh.

⁷ Ahnimae ram teh sui ngun hoi akawi teh, a tawnta awh e teh touklek thai hoe h. Ahnimae ram hai marang hoi akawi teh, rangleng touklek thai hoe h. ⁸ Ahnimae ram teh, meikaphawknaw hoi akawi teh, amamae kut hoi sak e hnonaw patenghai a lûsaling awh toe.

⁹ Tami pueng ni a tabo awh teh, koug a kârahnom sak awh. Hatdawkvah, ahnimae yonnae teh, BAWIPA ni ngaithoum hoe h.

¹⁰ BAWIPA ni talai kahuet hanelah a tho toteh, takinae hoi a bawilen taluena e dawkvah, talung thung kâen awh, vaiphu thung kâhrawk awh.

¹¹ Hatnae tueng dawkvah, kâoupnaw rahnom sak vaiteh, kâtalue e naw pabo vaiteh, BAWIPA duengdoeh tawm lah kaawm han. ¹² Rasahu BAWIPA e hnin teh, kârasang e hoi kâoup e tami pueng e lathueng thoseh, ¹³ Lebanon mon e sidarkung ka rahnom ka rasang e pueng koe

thoseh, Bashan ram e kathenkungnaw pueng e lathueng thoseh, ¹⁴ mon karasangpoung e lathueng thoseh, mon kathoung pueng e lathueng thoseh, ¹⁵ Ka rasang e imrasang lathueng thoseh, rapan pueng e lathueng thoseh, ¹⁶ Tarshish long pueng lathueng thoseh, ngai kaawm e vision pueng e lathueng thoseh a pha han. ¹⁷ Tami kâoupnae rahnoum sak vaiteh, a kârasangnae hah pabo lah ao han. Hat hnin dawkvah, BAWIPA dueng tawm lah ao han. ¹⁸ Kutsak pueng teh, khoeroe kahma han toe.

¹⁹ BAWIPA ni talai a kahuet hanelah a tho toteh, takinae hoi a bawilen taluena e dawkvah, taminaw teh lungngoum thung, talai kâkhu thung a kâen awh han. ²⁰ Hatnae atueng dawkvah, taminaw ni ouk a bawk awh e sui hoi, ngun hoi ma hanelah raphoe sak e meikaphawk hah, thangbui hoi bongpinaw koe a tâkhawng awh han. ²¹ BAWIPA ni talai kahuet hanelah a tho toteh, takinae, a bawilen taluena e dawkvah talung khu, ravnaw thung a yawng awh han.

²² Hnawng hoi kâha e tami hah kâuep awh hanh. Ahnimouh teh, banghai cungkeinae awm hoeh.

3

Judah hoi Jerusalem lawkcengnae

¹ Bangkongtetpawiteh, Rasahu Bawipa Jehovah ni rawca hoi tui kabawpnae puenghoi, kabawpnae kaawm e pueng hah Jerusalem kho hoi Judah ram thung hoi a takhoe toe.

² Athakaawme tami, taran ka tuk e tami, lawkcengkung, profet, khueyue, matawng, ³ tami 50

ka uk e, barilawa kaawm e tami, kâpokhai, kut taran kahawi, pahni taran kahawi e pueng a takhoe han. ⁴ Hote ram dawk camonaw ni, bawi thaw tawk awh vaiteh, sanu ka net e camonaw ni a uk awh han. ⁵ Khocanaw teh buet touh hoi buet touh, imri hoi imri a kârektap awh han. Camo ni matawng, banglahai kaawm hoeh e ni, bari kaawm e hah a dudam awh han.

⁶ Tami ni a hmaunawngaha hah a na pa im e man vaiteh, nang teh khohna na tawn rah, hi tho. Kaimouh na uk leih. Hete ka rawk e pueng hai na pathoup pouh leih ati awh toteh, ⁷ Ahni ni, kai ni ka pathoup thai mahoe. Bangkongtetpawiteh, kai im vah, rawca hoi khohna awm hoeh. Khocanaw koe bawi na tawk sak awh hanh loe telah kamcengcairalah ati han.

⁸ Jerusalem kho a tip toe. Judah ram a rawk toe. Bangkongtetpawiteh, ahnimae lawk tho hoi tawksaknae teh, BAWIPA ngainae patetlah awm hoeh. A bawilenna mit hah a taran awh toe. ⁹ Ahnimae minhmai teh, amamouh kapanuekkhaikung lah ao. Amamouh yonnae hrawk thai awh hoeh. Sodom khonaw patetlah hmantang vah, yonnae a sak awh. Ahnimae muitha dawk yawthoenae ao. Bangkongtetpawiteh, hawihoeahnae heh a mamhmawk a kâpatho awh toe.

¹⁰ Tami kalan teh yawhawinae ao telah ahni-mouh koe dei pouh haw. Bangkongtetpawiteh, a tawk awh e paw hah a ca awh han. ¹¹ Tami kahawihoeh teh yawthoenae ao. Hawihoeahnae hoi a kâhmo han. Bangkongtetpawiteh, a tawksak e yonnae hah ahni lathueng patho lah ao han.

¹² Ka taminaw ni camonaw a rektap aw. Napuinaw hai a uk aw. Ka taminaw, nangmouh lam na ka patue e naw ni lam na phen sak aw toe. Na dawn aw e lamthung hai a raphoe aw toe.

BAWIPA ni a taminaw lawk a ceng

¹³ BAWIPA ni lawkcengnae hmuen koe amae hmuen a la teh, taminaw lawkceng hanlah a kangdue. ¹⁴ BAWIPA ni a taminaw thung daw k e, a kum kacuenaw hai thoseh, bawinaw hai thoseh, lawkceng hanelah lawkcengnae hmuen koe a kâen. Nangmouh ni, kaie takha na padoun aw toe. Karoedengnaw, e hnopai na lawp aw teh, namamouh im vah na pâkhueng aw toe. ¹⁵ Ka taminaw hah bangkongmaw na rektap aw vaw. Mathoenaw e minhmai hah bangkongmaw na phom aw vaw telah, ransahu Bawipa Jehovah ni a ti.

Jerusalem e napuinaw kâhruetcu et poenae

¹⁶ BAWIPA ni bout a dei e teh, Zion canunaw teh a kâoupnae a rasang aw. A la huen a kamnue sak aw teh, a mit a kâhei sak aw teh, a khoksaluem koe dinghling lawk a tho teh, tektanek lah ceitakhai laihoi lam a cei aw dawkvah, ¹⁷ BAWIPA ni Zion canunaw hah a lû moihna sak vaiteh, a khohna rading pouh vaiteh, caici lah yeirai kaposak han.

¹⁸ Hote hnin navah, a kamthoupnae khok dinghling, tamlawk lupawk, dingyin, ¹⁹ hnâpacap kanghoi e, laikaw, minhmai ramuk, ²⁰ luhuem, sui khokdingyin, taisawm, hmuitui bawm, ²¹ kuthrawt, hnawngpacap, ²² sui

tamlawk angki, hnica, kala, yawngya, ²³ hlalang, athung angki, sammuem, hoi kamthoupnae hni naw hah ka takhoe han.

²⁴ Hmuitui e yueng lah kapawk hmui, taisawm e yueng lah tangron, samvei e yueng lah lû luengpalueng, loukloukkaang e khohna yueng lah buri, meihawinae yueng lah sum pân hoi nep e a hmâkathan lah ao han.

²⁵ Na taminaw teh, tahloi hoi a rawp awh vaiteh, nange athakaawm taminaw teh taran tuknae koe a due awh han. ²⁶ A longkhanaw ni cingou laihoi khuikap awh vaiteh, kingkadi lah talai dawk a tahung han.

4

¹ Hatnae atueng dawkvah, napui sari touh ni tongpa buet touh kuen awh vaiteh, kamamae rawca doeh ka cat awh tih, kamamae khohna doeh ka khohnat awh tih. Min mathoenae ao hoeh nahanelah, na min duengma hah na phawt sak awh la ati awh han. ² Hatnae atueng dawkvah, BAWIPA e akang teh, a meihawi vaiteh, a lentoe han. Kahlout e Isarelnaw hanelah, talai a pawhik teh a thawn han. ³ Cathut ni lawkcengnae muitha, hmai ka kang e muitha, hoi Zion canunaw e khinnae hah pâsu pouh vaiteh, ⁴ Jerusalem kho e thi hah a takhoe toteh, Zion e naranaw hoi Jerusalem kaawm rae hringnae cauk dawk min thut lah kaawm e naw teh, ka thoung e lah ao awh han. ⁵ BAWIPA ni Zion vah khosaknae hmuen puenghoi kamkhueng e rangpuinaw lathueng vah, khodai lah, tâmai hoi hmaikhu, karum lah hmaito angnae hah sak

vaiteh, ka talue e hmuenpueng koung a ramuk han. ⁶ Khodai lah khumbei ka ngang e rim, tûilî a tho toteh, lungmawngnae hoi kânguenae lah ao han.

5

Misur takha la

¹ Ka pahren e misur takha hah, pahrennae la hoi a hmalah ka sak haw nei. Talai hawinae koe mon vah, ka pahren e misur takha buet touh ao.

² Talai a tai teh, talungnaw a takhoe hnukkhu, kahawipoung e misurkung hah a ung. Takha thung ring nahanelah imrasang hai a sak teh, misur paw a paw han titeh a ngaihawi. Hatei, misur kaphawk bo oun ka paw aw. ³ Atuvah, Oe Judah khocanaw, Jerusalem khocanaw, kai hoi kaie misur takha rahak vah, laidei awh haw. ⁴ Kai takha koe hawinae ka sak thai nahlangva, ka sak hoeh rae ao ma aw. Misurpaw a paw han doeh titeh, ka ngaihawi nah, bangkongmaw misur kaphawk lah a paw vaw.

⁵ Atu thai haw. Kaie misur takha dawk ka sak hane kawî na patue avai. Tumdumnae rui payang e hah, ka raphoe vaiteh, ayâ alouke ni a ca awh han. Tumdumnae amhru tapang hah ka raphoe vaiteh, ayâ alouke ni a coungroe awh han. ⁶ Takha hah khoeroe ka raphoe han. Apinihai pathoup mahoe. Apinihai vulai mahoe. Pâkhing aphunphun a paw han. Hote takha dawk kho a rak hoeh nahanelah, kâ bout a poe han.

⁷ Rasahu BAWIPA e misur takha teh, Isarelnaw lah ao teh, Judahnaw teh Bawipa ni a ngai e

misurkung lah ao. Bawipa ni lannae hah a ngaihawi ei, khenhaw! kâtheinae hoi doeh akawi. Lannae yueng lah hramkinae doeh kaawm.

⁸ A hmuen houng sak laipalah, im touh hnukkhu im touh a pakaw awh teh, laikawk buet touh hnukkhu buet touh ka pakaw e teh a yawthoe. Hote laikawk lungui vah, nangmouh duengdoeh na kaawm awh han. ⁹ Rasahu BAWIPA ni kai koe a dei e teh, atangcalah, moikapap e imnaw heh, tami kingkadi e lah awm vaiteh, im kalennaw dawkvah, kaawm hane awm laipalah ao han. ¹⁰ Bangkongtetpawiteh, Misurtakha ekah hra touh dawkw misurtui um touh dueng a tâco vaiteh, cati hmuen hra touh tunae dawkw hoi hai hmuen touh dueng a tâco han.

¹¹ Na kahma awh toe! Yamu nei hanelah, amom na thaw awh teh, tangmin totouh misurtui na parui awh. ¹² Nangmae canei pawikoe ratoung, tamawi, cecak, vovit, hoi misurtui hoi akawi. BAWIPA e kut hoi sak e hno hai na hmawt awh hoeh. ¹³ Hatdawkvah, ka taminaw panuenae ayoun dawkvah pâlei lah ao awh. Ahnimaebari kaawm e naw teh, a vonhlah awh. Ahnimaetaminaw teh tui kahran hoi ao awh. ¹⁴ Hatdawkvah, Phuen kho (Sheol) ni a ngainae a len sak teh, apâhni teh bangnue thai hoeh hane totouh a ang teh, Zion bawilennae hoi a taminaw teh, hrawang laihoi, ka lamtu e naw hoi reirei a kum awh han.

¹⁵ Tami teh pabo lah ao dawkvah, tami pueng teh a rahnoum awh han. Ka kâoupnaw e minhmai hai a rahnoum han. ¹⁶ Ransahu BAWIPA teh, lawkcengnae lahoi tawm lah ao

teh, Kathoung e Cathut teh, ama thoungnae hah lannaeh lahoi a kamnue sak han. ¹⁷ Hatnavah, tucanaw teh, amamae pânae patetlah a pâ awh vaiteh a ca awh han. Dongdeng ka lamroenaw ni, tangrengnaw e caneinae hmuen koe, a canei awh han.

¹⁸ Payonnae hah laithoe hradang hoi ka sawn e tami, yon hah rangleng rui hoi sawn e patetlah ka sawn e taminaw teh a yawthoe awh. ¹⁹ Ahnimouh ni, kaimouh ni ka hmu awh nahanelah Bawipa ni karang sak naseh. A thaw hah karang tawk naseh. Kaimouh ni ka hmu awh nahanelah, Isarelnaw e kathoung Bawipa ni rek hnai naseh. Tho naseh telah ouk a dei awh.

²⁰ Kathout hah kahawi, kahawi e hah kathout telah ka tet e tami, angnae hah hmonae, hmonae hah angnae, karadip hah kakhat, kakhat hah karadip ka tet e tami teh a yawthoe.

²¹ Amamae mithmu dawkh teh, amamouh hah tami lungkaangnaw, panuenaek katawnnaw telah ka tet e tami teh a yawthoe.

²² Misurtui neinae koe athakaawme taminaw hoi yamu sak kalawtnae koe athakaawme taminaw teh a yawthoe awh. ²³ Ahnimouh teh, tadawngnae kecu dawkh tami kathout hah tami kahawi telah ati teh, tami kalannaw e lannaeh law teh a takhoe awh. ²⁴ Hatdawkvah, hmaipalai ni cakong hoi phoke a kak e patetlah ahnimae a tangpha teh, kahmawn e patetlah ao dawkvah, ahnimae a pei hai vaiphu patetlah mungpoung han. Bangkongtetpawiteh, ahnimouh teh ransahu BAWIPA e kâlawk hah a takhoe awh teh, Isarelnaw e kathoungpoung Bawipa ni a

dei e naw hah banglahai noutna aw h hoeh.
²⁵ Hatdawkvah, BAWIPA teh a taminaw koe a lungkhuek teh, ahnimouh van a kut a dâw teh, runae a poe dawkvah, monnaw a kâhuet teh, ahnimae ronaw teh lamthungnaw dawk songnawng patetlah ao aw h han.

²⁶ Bawipa ni ahlanae hmuen koehoi a taminaw hanelah, mitnout a ung pouh teh, talai poutnae koe kaawm e naw hah pâhui laihoi a kaw. Hatnavah, khenhaw! Ahnimouh teh karang poung lah yawng laihoi a tho aw h. ²⁷ Ahnimouh dawk ka tawn e aw m hoeh. Thongmui kamthui laihoi ka tâlaw e hai aw m hoeh. Ka ngam e hai aw m hoeh. Ka ip e hai aw m hoeh. Taisawm kâratham hoeh. Khokkhawmrui hai pet hoeh. ²⁸ Ahnimae pala teh hruepatuecalah ao teh, licung teh sut patung e lah ao. Ahnimae marangnaw e khoktabeinaw teh, lungtaw hoi a kâvan telah pouk e lah ao teh, ahnimae taran tuknae ranglengnaw hai bongparui patetlah doeh ao aw h. ²⁹ Ahnimae hramki lawk teh, sendek huk lawk hoi a kâvan teh, ahnimouh teh sendek patetlah a huk aw h han. A rakoung e teh apinihai lawm thai mahoe h.

³⁰ Hot hnin vah, ahnimouh teh tuipui e cairing lawk patetlah a cairing aw h han. Buetbuet touh ni hote ram hah khen pawiteh, khenhaw! hmonae hoi runae duengdoeh kaawm. Angnae teh hote ram dawk tâmai kecu king a hmo han.

6

Isaiah ni BAWIPA e vision a hmu e

¹ Uzziah siangpahrang a duenae kum dawkvah, tawm lah kaawm e BAWIPA teh bawitungkhung van a tahung e hah ka hmu. A khohna ni bawkim dawk muen akawi.
² Tungkhung e avoivang lah, Seraphimnaw teh a kangdue aw. Hote Seraphimnaw teh, rathei taruk touh rip a tawn aw. Rathei kahni touh hoi a minhmai, kahni touh hoi a khoknaw hah a ramuk aw teh, kahni touh hoi a kamlang aw.
³ Buet touh ni buet touh koe, Rasahu BAWIPA teh a thoung, a thoung, a thoung, talai van pueng teh a bawilenna hoi akawi telah a hramkhai aw.
⁴ Hottelah hram e lawk ni longkha e khomdunaw a kâhuet sak teh, hmaikhu hoi im teh akawi.
⁵ Hat toteh, kai ni, Oe hettelah doeh ka o toe. Kai ka cungkeihoeh toe. Bangkongtetpawiteh, kakhin e pahni doeh ka tawn. Ka khin e pahni ka tawn e miphun koe doeh ka o. Rasahu BAWIPA, siangpahrang hah ka mit ni a hmu toe ka ti.

⁶ Hattoteh Seraphim buet touh ni, thuengnae khoungroe daw k e paitei hoi a sin e hmaisaa hah a kut hoi a kuet teh kai ka onae koe kamlang laihoi a tho teh, ⁷ ka pahni hah a nep teh, hete hmaisaa ni na pahni a kânep toe. Na payonnae teh takhoe lah ao toe. Na yon hai thoungsak lah ao toe ati.

BAWIPA ni Isaiah a patoun

⁸ Hahoi, BAWIPA ni dei e lawk bout ka thai. Kai ni apimaw ka patoun han. Kai hanelah apimaw ka cet han, ati navah, kai ni kai ka o, kai na patoun loe ka ti pouh. ⁹ BAWIPA ni, hote miphunnaw onae koe cet nateh, na thai aw eiteh, na thai panuek aw hoeh. Na hmu aw

eiteh, na nout aw hohet tet pouh. ¹⁰ A mit hmawt aw hohet, a hna thai aw hohet, a nuen kâthung aw hohet, a patawnae karoumsak hohet nahan totouh, a lungthin mom sak, a hnâpang sak, a mitdawn sak pouh ati.

¹¹ Hatnavah, kai ni, Oe BAWIPA nâtotouh maw telah ka pacei navah, kho thung khoca o hohet nahanelah, im thung imkung o hohet nahanelah, koug raphoe vaiteh, ram thung tami kingkadi lah ao totouh thoseh, ¹² BAWIPA ni taminaw hah ahlanae koe a thak vaiteh, ram teh kingkadi lah ao totouh thoseh a saw han ati. ¹³ Hote ram daw k hrah touh daw k buet touh ka cawi rah nakunghai, hote ka cawi e hah boutbout raphoe lah ao han. Hatei, hmaica thing hoi bengkung thingnaw tâtueng teh, a thongmui a cawi e patetlah kathoung catoun teh hote ram daw k thongmui lah ao han.

7

Isaiah teh siangpahrang Ahaz koe patounnae

¹ Judah siangpahrang Uziah capa Jotham, a capa Ahaz siangpahrang se navah, Siria siangpahrang Rezin hoi Isarel siangpahrang Remaliah capa Pekah tinaw teh Jerusalem tuk hanlah a kamthaw aw hohet. Hateiteh, kangcoung hohet.

² Siria ram ni Ephraim ram hah a kâuep tie hah Devit imthung ni a thai navah, kahrawngum vah thingkungnaw teh kahlî ni a kâhuet sak e patetlah siangpahrang e lung hoi khocanaw e lung hai thouk a kâhuet.

³ Hat toteh, BAWIPA ni Isaiah koe lawk a dei pouh e teh, nang hoi na capa Shear-Jashub

hoi rei cet roi nateh, kapâsukung e laikawk teng ceinae lam, atunglae tuikhu teng vah, Ahaz siangpahrang hah dawn nateh, na kâhmo toteh na dei pouh hane teh, ⁴ Kâhruetcuets nateh, lawkkamuem lah awmh. Taket hanh. Hmai sungsung ka khu e hete thingtu kahni touh tie Siria siangpahrang Rezin hoi Remaliah capa tinaw teh a lung puenghoi ka khuek nakunghai, na lungpuen hanh. ⁵ Siria ram, Ephraim ram, Remaliah capanaw ni, maimouh ni Judah ram lah cei awh vaiteh, peng kayei awh sei, ⁶ ram lungui vah Tabeel capa hah siangpahrang lah tat awh sei, telah nange a vang lah kahawihoehe pouknae hoi a kâcai awh ⁷ Hatei, Bawipa Jehovah ni, hottelah kangcoung mahoe, hottelah tho mahoe ati. ⁸ Siria ram e lû teh Damaskas kho, Damaskas kho e lû teh Rezin, kum 65 touh thung Ephraim teh ram lah ao hoe nahanelah, a raphoe han. ⁹ Ephraim e lû teh Samaria, Samaria e lû teh Remaliah capa doeh. Na yuem awh hoehpawiteh, na kangdout katang awh mahoe atipouh.

Immanuel mitnout

¹⁰ Hahoi, BAWIPA na Cathut koe mitnoutnae hah het haw. ¹¹ Adungnae koehai thoseh, a rasangnae hmuen koehai thoseh, kâhet haw telah BAWIPA Cathut ni Ahaz koe atipouh.

¹² Hatei, Ahaz ni ka kâhet mahoe. BAWIPA hai ka tanouk mahoe atipouh. ¹³ Hat toteh, Isaiah ni Oe Devit imthungnaw, thai awh haw. Nangmouh ni tami na hnueai sak dueng laipalah, kai ni ka bawk e Cathut hai na hnueai sak awh han namaw. ¹⁴ Hatdawkvah, BAWIPA ma

ni nangmanaw hah mitnout na poe awh han. Khenhaw! Tanglakacuem buet touh ni capa vawn vaiteh, ca tongpa a khe han. Hote capa hah Immanuel telah a min phung han. ¹⁵ Ahni ni, kahawihoehe hah a takhoe teh, kahawi e hah a rawi thai totouh, sanutui pakak e hoi khoitui hah a ca han. ¹⁶ Hote camo ni, kahawihoehe a takhoe teh kahawi e a rawi thai hoehnahlan nang ni na taki e siangpahrang kahni touh ni, a uknaeram teh pahnawt e ram lah ao han.

¹⁷ Ephraim ni Judah koehoi a tâco takhai hnin hoiyah, kaawm boihoeh e hnin hah nange lathueng hai thoseh, na imthungnaw lathueng hai thoseh, BAWIPA ni a Assiria siangpahrang a tho khai han.

¹⁸ Hote hnin navah, Izip sawkcanaw dawk e bitseinaw hai thoseh, Assiria ram e khoinaw hai thoseh, BAWIPA ni a hroecoe han. ¹⁹ Hotnaw tho awh vaiteh, tami kingdinae koe ravonaw, lungga lungngounnaw, buruknaw, saring ni canei e ramnaw pueng dawk king akawi awh han.

²⁰ Hat hnin vah, palangpui namran lah kaawm e hlai e Assiria siangpahrang pataca hoi, na sam hoi na khokmuen hah BAWIPA ni na ngaw pouh han. Na pâkhamuen hai na ngaw pouh han.

²¹ Hat hnin vah, tami buet touh ni maito buet touh, tu kahni touh paca pawiteh, ²² sanutui buem pouh vaiteh, sanutui pakak e a ca han. Ram dawk ka cawi rae pueng ni sanutui pakak e hoi khoitui a ca awh han. ²³ Hatnavah, misurkung 1,000 touh ka tawn niteh, tangka 1,000 touh ka phu e misur takha pueng haiyah, pâkhing hoi akawi han. ²⁴ Licung hoi pala

patuem aw h vaiteh, hete hmuen koe a cei aw h han. Talaivan pueng p k hing hoi akawi han. ²⁵ Tokso hoi tai teh vu e law pueng hai, p k hing kecu apinihai a cei ngai hoeh dawkvah, maito p nae, tunaw ni coungroenae lah ao han.

8

Isaiah ni ca tongpa a khe

¹ Hahoi, BAWIPA ni, ca thut nahane a phen kalen e buet touh lat nateh, Maher-shalal-hash-baz telah ca cung hoi thut loe ati. Hot hateh, hno lawpnae hoi karangpoung lah raphoe haw tinae doeh. ² Hat toteh, kapanuekkhaikung lah ao nahanlah, yuemkamcu e kahni touh, vaihma Uriah hoi Jeberkhiah capa Zekhariah tinaw hah ka kaw toe.

³ Hathnukkhu, profetnu koe ka cei teh camo a von teh, ca tongpa a khe. BAWIPA ni a min teh, Maher-sahalal-hash-baz phung loe ati. ⁴ Bangkongtetpawiteh, hote camo ni anu apa telah a kaw thai hoehnahlan, Damaskas e bawinae hnopai hoi Samaria koe lawp e hnopainaw teh, Assiria siangpahrang ni koung na lawp aw h han ati.

Assiria siangpahrang a tho han

⁵ Hahoi, BAWIPA ni, hete taminaw ni yutyut kalawng e Shiloh palang hah a pahnawt aw h teh, ⁶ Rezin hoi Remaliah capanaw koe a lunghawi aw h dawkvah, ⁷ ransahu hoi cungtalah Assiria siangpahrang a thakaawmpoung palang tui hoi ahnimanaw teh koung ka ramuk sak han. Hote tui ni palang tuiko hoi rangoum pueng daw k

muen kawi vaiteh, ⁸ Judah ram muen the vaiteh, lahuen totouh a ramuk han. A ratheinaw hah kadai vaiteh a ram hah koung a ramuk han. Oe Immanuel, telah ati.

⁹ Oe taminaw, kamkhueng aw h nateh taket aw h haw. Ram hlanae koe e taminaw, na hnâpakeng aw h haw. Taran kâtuk hanelah, kârakueng aw h nateh, taket aw h haw.

¹⁰ Kâpan aw h haw, na pouknae teh banglahai tho mahoe h. Lawk tâtueng aw h haw, cak mahoe h. Bangkongtetpawiteh, Cathut teh kaimouh hoi ao.

Cathut taket haw

¹¹ Hete miphunnaw ni a dawn aw h e lamthung ka dawn hoe h nahanlah BAWIPA ni lawk na dei pouh e teh, ¹² hete taminaw e kamkhuengnae koe kamkhueng van hanh. Ahnimouh ni a taki aw h e hah taket van hanh, puen aw h hanh.

¹³ Rasahu BAWIPA hah bari aw h. Ahni dueng maha taket aw h nateh, puen aw h.

¹⁴ Hottelah na sak pawiteh, ahni teh, nang ni na kângue e lah aw m vaiteh, Isarel ram thung kaawm naw hoi Jerusalem kho thung kaawm naw hanelah, rawpnae talung, kamthuinae talung tangkhek hoi karap lah ao han.

¹⁵ Hahoi hawvah tami kapap ni a kamthui aw h han. Rawm aw h vaiteh a rek aw h han. Kâman aw h vaiteh man lah ao aw h han.

¹⁶ Hete lawkpanuesaknae hah ka hnukkâbangnaw koe tangoung nateh kâlawk hah tacikkin haw. ¹⁷ Jakop imthung koe minhmai ka hrawk e BAWIPA hah kai niteh, ka ngaihawi han.

¹⁸ Kai hoi BAWIPA ni na poe e camonaw heh, Zion mon kaawm e ransahu BAWIPA koehoi e Isarelnaw hanelah, mitnoutnae hoi noutnae lah ao.

¹⁹ Lawk duemduem hoi sipsap sipsap ka dei e kutkhetkathoumnaw hoi khueyuenaw koe cet aw haw tet aw haw pawiteh, taminaw ni amamae Cathut koe pacei kawi nahoehmaw. Kahringnaw ni kadoutnaw koe pacei kawi na maw.

²⁰ Cangkhainae hoi lawkpanuesaknae hah thai aw haw. Ahnimouh ni a dei aw haw e teh, lawk daw k nahoe h pawiteh, ahnimouh koe khodai hoeh rah. ²¹ Ram thungvah, lungpout hoi vonhlam hoi a kâva aw haw han. A vonhlam aw haw toteh, mahoima runae a kâpoe aw haw vaiteh, amamae siangpahrang hoi amamae Cathut hah thoebo aw haw. ²² Hahoi, kahlun lah a moun g aw haw han. Talai lah a khet aw haw nakunghai, runae hoi hmonae duenghoi akawi. Angnae ohoehnae koe, khohmo thung doeh kâen aw haw tih toe.

9

Maimouh han lah camo a khe toe

¹ Hatei, runae khang hnukkhu hmonae daw k hoi ram teh a hlout aw haw han. Zebulun ram hoi Naphtali ram teh, ahmaloe vah kayanae kâhmo nakunghai a to hmalah teh, tui pui rai ceinae lamthung, Jordan palangpui namran lae, Jentelnaw onae Galilee ram totouh barinae a coe aw haw han. ² Hmonae thung ka cet kaawm e taminaw ni, kalenpounge angnae hah hmawt aw haw vaiteh, duenae ram thung kaawm naw koe angnae ni a tue han. ³ Bawipa nang ni mip hun hah na pung sak teh, ahnimae lunghawinae hah na pung sak

pouh. Canga hnin patetlah lawp e hno kareinaw ni lunghawi e patetlah na hmalah ahnimouh ni a lunghawi awh. ⁴ Bangkongtetpawiteh, Midianaw koe na sak e patetlah ahnimouh ni apu awh e hnori, hemnae bongpai, ka rektapnaw e tahroenaw hah BAWIPA nang ni na khoe pouh toe. ⁵ Ransanaw e khokkhawm hoi thi kânep e khohna puenghai hmai koung sawi lah ao han. ⁶ Bangkongtetpawiteh, maimouh hanelah camo a khe toe. Maimouh hanelah capa buet touh na poe awh toe. Ahnie loung dawk uknae kâ ao han. Amin teh, Kângairu, Kâpokhaikung, Athakaawme Cathut, Yungyoe e Napa, Roumnae Bawi ti han. ⁷ A uknaeram rounng vaiteh, lungmawngnae pout mahoeh. Siangpahrang Devit e bawitungkhung dawk tahung vaiteh, a ram hah a uk han. Atu hoi a yungyoe totouh, kalan lah a uk han. Rasahu BAWIPA ni a sak roeroe hanelah a ngainae ao.

BAWIPA ni Isarel runae a poe han

⁸ Bawipa ni Jakop miphun koe a lawk a poe teh, Isarelnaw koe a pha han. ⁹ Amhru katim nakunghai, pathei tangcoung e talung hoi bout ka sak awh han. ¹⁰ Thailahei kungnaw teh ka rawm nakunghai, a yueng lah sidarkung ka ung awh han telah ka kâoup awh ni teh a lung kalen awh e Samaria khocanaw hoi Ephraim khocanaw pueng ni a panue awh han.

¹¹ BAWIPA ni ahnimouh hanelah, Rezin taranaw hah a thaw sak teh, Ephraim e tarannaw hah a thaw sak dawkvah, ¹² kanîtholah Sirianaw, kanîloumlah Filistinnaw ni a pahni ang awh

vaiteh Isarelnaw hah a kei aw h han. Hatei, a lungkhueknae teh roum hoeh, a kut teh pou a dâw.

¹³ Hete miphunnaw teh runae kapoekung koe-lah kamlang a hoeh. Rasahu BAWIPA hah tawng panuek aw h hoeh. ¹⁴ Hatdawkvah, BAWIPA ni Isarel miphunnaw koehoi lû hoi mai hai thoseh, samtue kang hoi pho hai thoseh hnin touh hoi a tâtueng han. ¹⁵ Lû teh matawng hoi bari kaawm-naw doeh. Mai hateh, laithoe ka dei e profet hah doeh. ¹⁶ Hete miphunnaw lam kapatuekungnaw ni lam a payon aw h nahanelah lamthung a pâtue aw h toe. Ka dawn e naw hai rawknae koe a pha aw h han. ¹⁷ Hatdawkvah, ahnimae thoundounnaw hah BAWIPA ni a lungyouk hoeh. Naranaw hoi lahmainunaw hai pahren hoeh. Ahnimouh pueng teh, cathutlaipa e naw hoi tamikathoutnaw lah ao aw h dawkvah, kamsoumhoeh lawk hah a dei aw h. Hatdawkvah, a lungkhueknae roum hoeh, a kut teh pou dâw e lah ao rah.

¹⁸ Kamsoumhoeh teh hmai patetlah ouk a kak. Pâkhing aphunphun hah ouk a kamtawi sak. Ratu hai hmaisawi teh, akungnaw teh hmaikhu hoi parang a kâyat han. ¹⁹ Rasahu BAWIPA e a lungkhueknae dawkvah, talai hmai a kak teh, talai taminaw teh hmai patawi nahane thing lah ao aw h han. Hmau nawng ha reira buet touh hoi buet touh kâpasai mahoe. ²⁰ Aranglah hoi ka bouk ei nakunghai, vonhlam mingming han rah. Avoilah hoi ka cat ei nakunghai, von paha mahoe. Imri reira e moi hah tami pueng ni a ca aw h han. ²¹ Manasseh miphun ni

Ephraim miphun, Ephraim miphun ni Manasseh miphun hah a kâkei aw hah. Hote miphun roi ni Judah miphun hah cungtalah a taran roi han. Hatei, a lungkhueknae teh roum hoeh, a kut teh pou a dâw rah.

10

¹ Vonhlamrinci hoi kaawm naw rektap nanelah thoseh, ² ka taminaw thung daw k e ka mathoenaw ni a coe aw hane kawi hah lawp nanelah thoseh, lahmainunaw rektap hane, naranaw e hnopai lawp nanelah kalanhoehe lah lawk katâtuengkung, caret kacailah ca kathutkungnaw, nangmouh teh na yawthoe aw h. ³ Runae na kâhmo hane hnin, rawknae ahlanae koehoi a tho navah, na kabawm nanelah, api koe maw na yawng aw h han. Na hnopai tawnta e naw teh namamouh ni na pâtung aw h han. ⁴ Taran tuknae koe na due aw h han, hoeh pawiteh, san lah na hrawi aw h han. Hatei, a lungkhueknae teh roum hoeh, a kut teh pou a dâw rah.

Cathut ni Assiria siangpahrang Lawk a ceng

⁵ Aya! Assiria teh ka lungkhueknae bongpai lah ao. Ahni ni a patuep e sonron teh, runae ka poe nanelah ao. ⁶ Cathut banglah ka ngâi hoeh naw onae koe ahni hah ka patoun. Ka lungkhueknae ka khang hane taminaw hah a lawp vaiteh, a raphoe vaiteh, lam daw k e tangdong patetlah a coungroe nahanlah lawk ka thui han. ⁷ Hatei, ahni teh, amae a lung thung vah, alouke pouknae hoi alouke ngainae a tawn. Ahni ni raphoenae hoi miphun moikapap hah

thei hanelah a ngainae ao. ⁸ Ahni ni hettelah a dei: Kaie ransabawinaw teh siangpahrangnaw nahoehmaw. ⁹ Kalno kho teh Kakhemish kho patetlah Hamath kho teh Arpad kho patetlah nahoehmaw, Samaria kho teh Damaskas kho patetlah nahoehmaw ao vaw.

¹⁰ Samaria meikaphawk hoi Jerusalem meikaphawk ka talue e meikaphawk ka bawk e uknaeramnaw hah ka lawp e patetlah thoseh, ¹¹ Samaria kho hoi a meikaphawknaw koe ka sak e patetlah thoseh, Jerusalem hoi ahnie meikaphawknaw koe ka sak han nahoehmaw.

¹² Hatei, BAWIPA ni Zion mon hoi Jerusalem vah thaw a cum hnukkhu, Assiria siangpahrang e a lungthin hoi a kâoupnae hoi, a mit hoi a kâlenna dawkvah, runae ka poe han.

¹³ Hote siangpahrang ni, kai teh kama e kut thao thasainae hoi, ka lungangnae hoi ka panue thai. Taminaw e khorinaw hah ka tahruet pouh toe. Ahnimae hnopai pueng ka lawp toe. Siangpahrangnaw hah maitotan patetlah beng ka sawn toe. ¹⁴ Ka kut ni tava tabu a kasum e patetlah ahnimae hnopainaw teh ka kasum pouh toe. A ceitakhai e tava tadui ka lae patetlah talai hno kaawm e pueng hah ka la toe. Apihai a rathei kâhuen sak hoeh. A pahni ang hoeh. Cairing hoeh ati.

¹⁵ Bongpai ni tami tawm hoeh, tami ni doeh a sonron a tawm e patetlah Cakâ ni ka hno kung lathueng a kâoup thai maw. Hlaw ni ka hno kung koe a kâoup kawi na maw.

¹⁶ Hatdawkvah, ransahu Bawipa Jehovah ni, kingking kaboumlah ka cat ka net e siang-

pahrang koe, pheng kamsoenae hah a patoun pouh han. A bawilennae rahim vah, hmai ka kang e patetlah a kak han.

¹⁷ Isarelnaw e angnae teh hmai lah ao han. Kathounge Cathut teh hmaipalai lah ao han. Hnin touh hoiyah, ahnimae pâkhing buruk hoi rapan pueng teh mueng ka yawng lah a kak han.

¹⁸ BAWIPA ni, ratu bawilennae hoi, caticamu a pawnae laikawk bawilennae hai a raphoe pouh han. A tak hoi muitha hai a tha baw vaiteh, ka ngouk e patetlah ao han. ¹⁹ Camo ni a touk thai nahanelah, ratu youn touh a cawi han.

Kacawie Isarel a ban aw h han

²⁰ Hat hnin toteh, runae ka hlout ni teh kacawie Isarelnaw hoi Jakop imthungnaw teh, amamouh karektapkungnaw koe bout kâuep aw h toung laipalah, Isarelnaw e Kathounge BAWIPA koe atangcalah a kâuep aw h han.

²¹ Kacawiraenaw bout a ban aw h han. Jakop miphun daw k kacawiraenaw teh, athakaawme Cathut koe bout a ban aw h han. ²² Oe Isarelnaw, nange taminaw teh, tuipei rai e sadi yit touh ka phat ei nakunghai, kacawie naw duengdoeh bout ka ban aw h han. Rawknae teh sut hmoun e lah ao dawkvah, lannae lahoi ahnimouh teh a ramuk han. ²³ Rasahu Bawipa Jehovah ni, talai van lungui vah a hmoun tangcoung e runae teh a sak han.

BAWIPA ni Assiria runae a poe han

²⁴ Hatdawkvah, ka Bawipa ransabawi Jehovah ni a dei e teh, Oe ka taminaw, Zion vah kaawm e naw, Assiria siangpahrang hah taket aw h hanh. Izip siangpahrang ni a sak e patetlah

ahnîe bongpai hoi sonron hoi na hem aw h han.
²⁵ Hatei, ahnimouh rawknae koe a pha e lahoi,
 dongdeng ca daw k ka lungkhueknae teh a roum
 han. ²⁶ Rasahu BAWIPA ni Oreb lungsong teng
 Midiannaw a hem e patetlah thoseh, tuipei van
 sonron dâw e patetlah thoseh, Izipnaw koe a
 sak e patetlah thoseh, ahnimanaw hah a hem
 han. ²⁷ Hatnae hnin dawkvah, ahnie hnokari teh
 na loung daw k hoi thoseh, na lahuen daw k hoi
 thoseh takhoe lah ao han. Thâwnaе kecu daw k
 na lahuen daw k e yawcu teh a rek han.

Taran teh a kâen

²⁸ Aiath kho daw k a pha toe. Migron a tapoung
 toe. Mikmash kho vah hnopainaw teh a ta aw h
 toe. ²⁹ Sanengnaw a tapuet aw h toe. Geba kho
 vah a tungpup aw h toe. Ramah kho teh a taki
 toe. Sawl onae Gibeah kho teh a yawng toe.
³⁰ Oe Gallim canu, hramki haw. Oe Laish kho
 na hnâpakeng haw. Anathoth kho a temdeng
 toe. ³¹ Madmenah kho teh a kampuen toe. Gebim
 khocanaw teh hloutnae koe a yawng aw h toe.

³² Nob kho vah sahnin ao aw h teh, Zion canu
 e mon lah kaawm e Jerusalem mon hah, a kut
 hoi a kahuet han. ³³ Rasahu Bawipa Jehovah
 ni thingkangnaw rabat e patetlah takikatho-
 pounge bahu hoi, a kangnaw hah bouk vaiteh,
 ka rasang e a kangnaw hah reprep a satut
 han. ³⁴ Ratu kathapounge hah cakâ hoi tâtueng
 vaiteh, Lebanon teh, athakaawme kut daw k hoi
 a rawp aw h han. Kaie lung hai a roum han.

11

Jesi cakang ni uknae

¹ Jesi kung dawk hoi a dawn a cawn han. A tangpha dawk e a cakang ni a paw a paw han. ² BAWIPA e Muitha, lungang-nae Muitha, thaipanueknae Muitha, kâponae Muitha, thaonae Muitha, panuenae Muitha, hoi BAWIPA takinae Muitha teh ahni dawk ao han. ³ Ahni teh BAWIPA a taki dawkvah, a mit hoi a hmu e patetlah lawkceng hoeh, a hnâ hoi a thai e patetlah lawk tâtueng hoeh. ⁴ Mathoenaw hah lannae hoi lawk a ceng teh, talai taminaw koelah, panguelpnae lahoi lawk a tâtueng pouh. Talai hah a lawk bongpai hoi a hem teh, tamikathoutnaw hah a kâha hoi a thei. ⁵ Lannae hoi yuemkamcunae teh a keng dawk kâyeng e taisawm lah ao. ⁶ Asui teh tuca hoi rei ao han. Kaisi teh hmaeca hoi rei a yan han. Maitoca, sendek, hoi ka thâw e saringnaw hoi reirei a ceio awh han. Camocanaw ni hotnaw hah a hrawi awh han. ⁷ Maitomanu hoi tavom teh reirei hrampa awh vaiteh, a canaw teh reirei a yan awh han. Sendek hai maito patetlah hram a ca han. ⁸ Sanu ka net e camo ni hai hrunchoe khu koe a pai han. Sanu kamphei e camo nihai, hrunchok khu dawk a tapu han. ⁹ Kaie kathounge mon dawk, kârektapnae, kâraphoenae awm mahoe. Bangkongtetpawiteh, tuipei ni amae hmuen hah a ramuk e patetlah talai van teh, BAWIPA panuenae hoi akawi han.

Santoungnae koehoi bout a ban awh

¹⁰ Hate hnin dawkvah, Jesi e tangpha teh cawn vaiteh, taminaw hanelah mitnoutnae lah ao han.

Hote mitnoutnae koe Jentelnaw teh a kâhnai aw hah. A onae hmuen hai a lentoe han. ¹¹ Hate hnin dawkvah, a kut dâw vaiteh, Assiria ram, Izip ram, Pathros ram, Kush ram, Elam ram, Shinar ram, Hamath ram, tuipei namran lah kaawm e ramnaw koehoi, a taminaw kacawiraenaw hah bout a thokhai. ¹² Jentelnaw hanelah mitnoutnae a ung pouh dawkvah, a pâlei e Isarelnaw hoi kho tangkuem kampek e Judahnaw hah, talai takin pali touh koehoi kaw vaiteh, a pâkhueng han. ¹³ Ephraim teh utnae lung a roum han. Ouk ka taran e Judahnaw hai taran ngainae lung a roum aw hah. Ephraim ni Judahnaw hah ut aw hah mahoe h toe. Judahnaw ni Ephraim hah taran aw hah mahoe h toe. ¹⁴ Ahnimouh ni kanîloum lah, Filistinnaw hah a tuk aw hah. Kanîtholae ramnaw e hnopainaw hah reirei a lawp aw hah. Edomnaw hoi Moabnaw hai a thei aw hah. Ammonnaw ni ahnimae lawk hah a ngai pouh aw hah. ¹⁵ BAWIPA ni Izip tuipei e lai hah khoeroe a raphoe pouh han. Kabetpoung e kahlî hoi a kut hah palangnaw van kahek vaiteh, palang sari touh a lawng nahanlah hem vaiteh, taminaw ni khokkhawm khawm vaiteh a raka aw hah. ¹⁶ Isarelnaw Izip ram hoi a tâco aw hah navah kaawm e patetlah Assiria ram hoi kacawie a taminaw ceinae lamthung lah a coung han.

12

BAWIPA teh ka tha hoi ka la doeh

¹ Hate hnin dawkvah nang ni na dei hane teh, Oe BAWIPA, nang koe ka lung ahawi. Kai koe na lungkhuek ei nakunghai, na lung bout a roum

teh, kai hah lung na pahawi toe. ² Khenhaw! Cathut teh na kaie rungngangnae doeh. Takinae tawn laipalah, ka taran ahawi han. Jehovah teh ka tha hoi ka la doeh. Kaie rungngangnae lah ao. ³ Nangmouh teh lunghawinae lungthin hoi rungngangnae tuiphuek tui hah na do aw h han. ⁴ Hate hnin dawkvah, BAWIPA teh pholen aw h. A min hah kaw aw h. A thaw tawknae hah taminaw koe panuek sak aw h. A min lentoenae hah pathang aw h. ⁵ BAWIPA koe pholen la sak aw h. Lentoenae lahoi thaw a taw k toe. Hete heh, talai tami pueng ni panuek aw h naseh. ⁶ Oe Zion vah kaawm e naw pueng, hram aw h nateh, lunghawi la sak aw h. Bangkongtetpawiteh, Isarelnaw e kathoungpounge Cathut teh, nangmae lungui vah a lentoe poung.

13

Babilon lawkcengnae

¹ Amoz capa Isaiah ni Babilon hoi kâkuen lah lawk a dei e teh,

² Ka nga e mon daw k luen aw h nateh, mitnout hah ung aw h haw. Kacaipounglah hramki aw h. Na kut hah kahek aw h. Ahnimouh teh, nangmouh onae longkha thung kâen aw h naseh.

³ Kai ni ka thoungsak e naw koe lawk ka thui toe. Kai ni ka poe e lentoenae dawkvah, a lung kahawi e, athakaawme taminaw hah ka lungkhuek e a roum nahanelah, ka kaw toe.

⁴ Monsom e pawlawk teh tamihupui e pawlawk doeh. Miphunnaw uknaeram kamkhuengnae koe ruengruengti e pawlawk, hoi ransahu BAWIPA teh taran tuk hanlah a

kâcai. ⁵ BAWIPA hoi cungtalah, a lungkhueknae senehmaica teh ram buemlah raphoe hanlah, a hlanae ram talai poutnae koehoi a tho awh.

⁶ BAWIPA e hnin teh a hnai toung dawkvah, khuikap awh haw. Athakasaipounge ni a rawk sak nahane hnin teh a tho han. ⁷ Kut kaawm pueng loungkanghawi han. Tami pueng a lung a pout awh han. ⁸ Lungpuen hoi awm awh vaiteh, patawnae aphunphun ni a cusin han. Camokhe patawnae ka khang e napui patetlah patawnae khang awh vaiteh, buet touh hoi buet touh a kâkhet awh toteh, ahnimae minhmai teh hmaipalai patetlah ao han. ⁹ Kenhaw! BAWIPA e hnin teh a tho lahun. A lungkhueknae, a lungkâannaehoi hote ram hah kingdi vaiteh, khocaramca tamikayonnaw hah peng raphoe hanelah a tho lahun. ¹⁰ Kalvan âsinaw hoi âsihunaw teh ang awh mahoe. Kanî hai a tâco navah a hmo vaiteh, thapa hai ang mahoe.

¹¹ Talaivan ni a yonnae hai thoseh, tamikathoutnaw e a payonnae hai thoseh, runae ka poe han. A lung kalennaw e kâoupnae hah ka pout sak vaiteh, kakaisuenaw e dudamnae hah ka pabo han. ¹² Kai ni taminaw teh sôlêi e sui hlak hai thoseh, Ophir sui hlak hai thoseh ka takang sak han. ¹³ Hatdawkvah, ransahu BAWIPA e a lungkhueknae hah, a lungphuennaehnin dawkvah, kalvan kahuet vaiteh, talai hai ama onae hmuen koehoi a kâtahruet han.

¹⁴ Tami pueng teh kahrawng pâlei e sayuk sakhi patetlah a yawng awh vaiteh, kapâkhuengkung kaawm hoe e tunaw patetlah awm awh vaiteh, amamae miphun koelah

kamlang aw h vaiteh, amamae ram daw k a yawng aw h han. ¹⁵ A kâhmo aw h e pueng thut lah aw m vaiteh, a man aw h e pueng teh tahloi hoi thei lah ao han. ¹⁶ Ahnimae a canaw hai amamae hmaitung vah, doukkâlat lah talai daw k raphet aw h vaiteh, ahnimae imnaw teh peng a raphoe pou h han. A yunaw hah a pacekpahlek pou h aw h han.

¹⁷ Khenhaw! Medesnaw hah ka hroecoe pou h han. Ahnimou h teh, sui hah banglahai ngâi aw h mahoe h, ngun hai ngai aw h mahoe h. ¹⁸ Ahnimou h ni thoundounnaw hah licung hoi a thei han. Ahnimou h ni a thun thung e camonaw hai pahrennae tawn aw h mahoe h. Ahnimae mit ni camocanaw hah pasai aw h mahoe h. ¹⁹ Uknaeram pueng hlak ka bawilen e Babilon, Khaldean taminaw ni kâoupnae lah kaawm e Babilon kho teh, Cathut ni a raphoe e Sodom hoi Gomorrah kho patetlah ao han. ²⁰ Hote kho daw k nâtuek hai tami khosak mahoe h toe. Bangpatet e Arabnaw hai hote hmuen koe rim sak mahoe h toe. Bangpatet e tukhoum ni hai hote hmuen koe a tunaw hah tabaw k sak mahoe h. ²¹ Hatej, thingyeyiaw n sarangnaw teh hote hmuen koe a tabo aw h han. Ahnimae imnaw teh kacaikaringe moithang hoi akawi han. Kalaukvanaw ni ao nah vaiteh, Athanaw a coukdouk aw h han. ²² Asuinaw ni kho longkha rapannaw koe thoseh, kahrawnguina w ni imnaw daw k thoseh, a cairing aw h han. Hote kho daw k atueng nâsittou h ao hoe hnahlan a tho han. Hote tueng hai saw mahoe h.

14

San lah onae koehoi Jakop bout bannae

¹ Bangkongtetpawiteh, BAWIPA ni Jakop imthung hah a pahren dawkvah, Isarelnaw hah bout a rawi teh, amamae ram dawk ahnimanaw hah a hmuen a poe han. Ramlouknaw ni ahnimouh koe ao aw h van han. ² Miphunnaw ni ahnimouh teh, amamae ram dawk a thokhai aw h han. Isarelnaw ni miphunnaw e napui tongpanaw hah san lah a tawn aw h han. Ahnimouh ni ahnimouh kamankungnaw hah a man aw h han. Ahnimouh ka rektap e naw hai a uk aw h han.

Babilon siangpahrang rawpnae

³ BAWIPA ni nange patawnae, temdengnae, ka ru e thaw na tawk saknae koehoi nang hlout sak nahan lah BAWIPA e hnin teh a tho han. ⁴ Hattoteh, nangmouh ni Babilon siangpahrang hanelah hettelah bangnue na dei aw h han, talai ka rektap e teh hete tami nahoehmaw, a uknaeram teh a rawp bo toung vaw. ⁵ BAWIPA teh tamikathoutnaw e sonron, ukkungnaw e tahroe hah a khoe pouh. ⁶ Hote ni pout laipalah hemnae hoiyah taminaw hah lungkhueknae hoi a hem. Pahrennae awm laipalah, rektap teh lungkhueknae miphunnaw hah a uk ⁷ Talaivan pueng teh duem a kâhat teh, la sak lawk ni a katin. ⁸ Hmaica thingnaw ni nang koe a lunghawi aw h. Lebanon mon kaawm e sidar thingnaw ni, nang na rawp hnukkhu, kaimouh na ka tâtueng hane luen takhang hoeh toe ati aw h.

⁹ Nang na tho toteh dawn hanelah, tami kadout kho teh a kâcai. Talai ukkungnaw pueng a hroecoe teh, ram tangkuem e siangpahrangnaw pueng hai amamae bawitungkhung dawk hoi a thaw sak. ¹⁰ Ahnimouh pueng ni na pathungnae lah a dei awh e teh, nang hai kaimouh patetlah na tha a youn teh, kaimouh hoi rei na kâvan bo vaw ¹¹ Nange raim onae, nange ratoung lawk teh tami kadout kho a cei awh toe. Pârinaw teh na yan nahanelah ao teh, ahrinaw teh na kâkhu e lah ao.

¹² Oe Khosei capa (Lucifer), amom tempalo, kalvan hoi na bo toe. Ram pueng na kata e, nang teh talai dawk rek na taben toe khe. ¹³ Nama ni teh na lungthung hoi hettelah na dei. Kalvan vah ka luen han. Cathut e âsinaw lathueng vah, ka tahungnae bawitungkhung ka rasang sak han. Atunglah kaawm e kamkhuengnae mon dawk ka tahung han. ¹⁴ Tâmainaw e lathueng ka luen han. Lathueng Poung e Cathut patetlah ka kâsak han. ¹⁵ Hatei, nang teh tami kadout kho, kadung poung e tangkom thung na bo toe.

¹⁶ Nang na kahmawt e naw ni nang hah na khet awh teh, talai kâhuen sak e tami, ram pueng kâhuen sak e tami, ¹⁷ talaivan heh kahrawngum patetlah ka coung sak niteh, khopuinaw hah ka raphoe e, a man e naw hah ama im bout ban sak hanelah kâ ka poe hoeh e teh hete tami han namaw, na ti pouh awh han. ¹⁸ Ram tangkuem e siangpahrangnaw pueng teh, amamae tangkom dawk bawilenna hoi a yan awh. ¹⁹ Hatei, nang teh panuetho e thingkang patetlah na tangkom dawk hoi takhoe lah na o toe. Thei lah kaawm

e, tahloi hoi thut lah kaawm e, talung tangkom thung ka cet e naw hoi ramuk lah na o teh, khok hoi coungroe e ro patetlah doeh na o toe.

²⁰ Nang teh ahnimouh hoi rei pakawp mahoe. Bangkoktetpawiteh, nang teh, nama e ram hah na raphoe teh, na taminaw hah na thei toe. Hawihoehnae ka sak e a catounnaw teh nâtuék hai a min bout dei mahoe toe. ²¹ Ahnimae a canaw teh, amamae napanaw e yon kecu dawkvah, thei nahane hmuen hah rakueng aw. Ahnimouh thung hoi apihai talai ukkung awm mahoe toe. Talaivan kho hai kangdout sak aw mahoe toe.

Cathut ni Babilon a raphoe han

²² Rasahu BAWIPA ni, ahnimouh hoi kâtaran lah ka o han. Babilon kho daw k hoi ahnie min hoi kacawie naw thoseh, a ca catounnaw hai thoseh ka raphoe han telah ati. ²³ Babilon kho teh sambuem lah ka o sak vaiteh, bukbu onae lah ka ta han. Raphoenae sampho hoi ka pâthoun han telah ransahu BAWIPA ni a pathang.

Cathut ni Assirianaw a raphoe han

²⁴ Rasahu BAWIPA ni, ka pouk e patetlah ao han. Ka noe e patetlah ka sak han. ²⁵ Assirianaw hah ka ram daw rek ka hem vaiteh, kama e monnaw dawkvah, rep ka coungroe han. Ahnie yawcu hah ka takhoe pouh vaiteh, a hno hah a loun g daw k hoi ka takhoe pouh han telah thoe a kâbo teh a dei. ²⁶ Hethateh, talai van puenghoi kâkuen e ka noenae doeh. Hathateh, ram pueng koe ka dâw e kut doeh ²⁷ Bangkoktetpawiteh, ransahu BAWIPA ni a noe toe. Apinimouh a

oun thai han. BAWIPA e kut teh a dâw toe. Apinimouh a hno sak thai han.

Cathut ni Filistinnaw a raphoe han

²⁸ Ahaz siangpahrang a duenae kum dawk hete lawk teh a tho. ²⁹ Filistin khocanaw, nangmouh na hemnae bongpai a lawt dawk na lunghawi aw hah. Bangkongtetpawiteh, tahrûn phun daw hoi hrûnthoe a khe aw hah. Hote a canaw hai kamleng thai e hmaitahrûn lah ao aw hah.

³⁰ Mathoenaw e caminnaw hai kawkhik lah ao han. Mathoemaranaw hai kahawicalah a i aw hah. Hatei, nange tangpha teh takang hoi ka thei han. Kacawie naw hai thei lah ao han.

³¹ Oe kho longkha, cingou haw. Oe khopui, khuikap haw. Filistinnaw pueng teh taki hoi a pâyaw aw hah. Bangkongtetpawiteh, atunglah hoi hmaikhu a tâco. Hote ransahu dawkvah, kampek e awm hoeh. ³² Ahnimouh ni, ram tangkuem e patounenaw koe bangtelamaw a dei pouh han vai. BAWIPA ni Zion kho hah a kangdue sak teh, mathoenaw ni hote kho daw hoi a kângue aw hah.

15

Moab koe rawknae a pha han

¹ Hethateh, Moab hoi kâkuen e lawk doeh. Moab ram Ar kho teh tangmin buet touh hoi rawknae koe a pha. Moab ram teh khoeroe a rawk toe. Moab ram Kir kho teh tangmin buet touh hoi rawknae koe a pha. Moab ram teh khoeroe a rawk toe. ² Khocanaw teh Dibon kho, a rasangnae koe e bawkim koe a cei aw hah teh a khuika aw hah. Moab khocanaw teh, Nebo kho,

Medeba kho hah a khuikakhai awh. Ahnimae lû dawк sam awm hoeh, ahnimae pâkhamuen pueng teh koung a ngaw awh. ³ Lamthung dawк buri a khohna awh teh, lempu hai thoseh, lam dawк hai thoseh, kaawm e pueng ni a khuika awh teh, mitphi dawк a kâkaawk awh. ⁴ Heshbon kho hoi Elealeh kho vah a khuika awh teh, Jahaz kho totouh a kâthai. Moab ransanaw hai pâyaw laihoi a khuika awh. ⁵ Kaie ka lungthin hai Moab hanelah a kâ van. Ka yawng e taminaw teh kum thum touh e, maitola patetlah Zoar kho totouh a kâhêi awh. Luhith mon dawк mitphi bo laihoi a luen awh. Horonaim kho koelah ceinae lamthung dawк hai, rawк kahmanae khuika lawк hoi a hram awh. ⁶ Bangkongtetpawiteh, Nimrim tuinaw kingdi teh, phonaw teh a ke awh toe. Caticamu hai a due toe. Kahring e kung touh boehai awmhoeh. ⁷ Hatdawкvah, ahnimouh teh, tawnta hnopainaw hah sumpa yawн koe a thokhai awh han. ⁸ A khuika lawк ni Moab ram peng a katin. A cingou lawк teh Eglaim kho totouh, Beerelim kho totouh a pha. ⁹ Bangkongtetpawiteh, Dibon tui teh thi hoi akawi. Dibon kho dawк alouke lacik bout ka pha sak han rah. Ka hlout e Moab khocanaw hoi, kacawie khocanaw hanelah sendek hah ka patoun han.

16

Moab hanelah ngaihawinae awm hoeh

¹ Zion canu mon dawк kaawm e ram ukkung bawi hanelah, Sela kho hoi kahrawngum lam lahoi tuca hah patawn haw. ² Arnon palang

rakanae koe e lamthungnaw dawk, Moab canunaw teh tabu raphoe lah ao teh kamlang e tavanaw patetlah ao awh. ³ Pouknae na poe awh haw. Lannaeh lahoi laideitâtueng awh haw. Kanî tuengtalueng thun nah e na tâhlip hah, karum patetlah awm sak awh haw. Pâlei e naw hah hrawk awh. Ka yawng e naw hah pahnawt awh hanh. ⁴ Moab ram hoi a pâlei teh a takhoe e naw hah nangmouh koe rei awm naseh. Ahnimouh karaphoenaw e kut dawkhaw hoi rawngkhan hanelah kângue e lah awm awh. Ka hnepnapnaw ao awh hoeh torei, raphoenae teh a roum torei, reprep ka coungroe e taminaw teh talai van hoi a kahma awh torei teh, ⁵ bawitungkhung teh lungpatawnae lahoi a cak han. Hote tahungnae dawkvah, Devit e lukkareim thung hoi buet touh ni lawkceng vaiteh, lannaeh hah tawng vaiteh, lannaeh hah karanglah sak vaiteh, yuemkamcunae lahoi a tahung han. ⁶ Moab e kâoupnae, banghloimaw a kâoup, ahnie lunglennae, a kâoupnae, a kaisuenae pueng teh maimouh ni thai awh toe. A kâoupnae pueng teh ahrawnghrang doeh.

⁷ Hatdawkvah, Moab khocanaw teh, Moab kho hanelah a cingou awh han. Khoca pueng a cingou awh han. Nangmouh teh Kirhareseth kho e misur vaiyeinaw hanelah na cingou awh han. Ahnimouh teh atangcalah puenghoi runae a kâhmo awh han. ⁸ Bangkongtetpawiteh, Heshbon laikawknaw, Sibmah misurkungnaw teh ketkamyai teh a ke awh toe. Miphunnaw ukkung bawinaw ni misurbomnaw teh a khoe awh toe. Hote akungnaw teh, Jazer kho totouh a pha

teh, kahrawngum totouh a yam awh. Hote a kangnaw teh, tuipui ka tapuet lah a yam awh. ⁹ Hatdawkvah, Jazer kho hoi cungtalah Sibmah misurnaw hanelah ka khuika. Oe Heshbon kho hoi Elealeh kho, nang hah ka mitphi hoi cupcup na duk sak han. Bangkongtetpawiteh, nange kompawi a pawhik hoi caâpawi a pawhiknaw teh a kâhat toe. ¹⁰ Lunghawinae hoi nawmnae teh talai kahawi dawk hoi takhoe lah ao toe. Misur takha dawk lunghawinae la saknae awm hoeh. Lunghawinae hoi hramnae awm hoeh. Misur paw katinnaw ni katinnae dawkvah misur paw hah katin awh hoeh. Hramki lawk ka kâhat sak toe. ¹¹ Hatdawkvah, kaie ka lung teh, Moab ram hanelah, ka lungthin teh Kirhareth kho hanelah ratoung lawk patetlah a cingou toe. ¹² Moabnaw ni a rasangnae hmuen koe, tawn-tam laihoi ratoum hanelah, amamae kathounge hmuen koe a tho awh navah, banghai hawinae hmawt awh mahoe. ¹³ Hethateh, atuvah Moab ram hoi kâkuen e BAWIPA ni a dei e lawk doeh. ¹⁴ Atu BAWIPA ni a dei e teh, kum thum touh thung, thaw ka tawk hanlah hlai e ni thaw a tawknae kum patetlah Moab e bawilennaeh teh tami moikapap ni a khet rahnoum awh han. Kacawie naw teh ekvoi ayounca awh dawkvah, a tha a baw awh ati toe.

17

Cathut ni Damaskas hoi Isarel runae a poe han

¹ Damaskas kho hoi kâkuen e lawk teh, Khenhaw! Damaskas kho teh kho lah awm mahoe. Ka rawk e songnawng lah doeh ao han toe.

² Aroer khonaw teh kahrawngum, saringnaw ni pânae lah, yannaeh lah awm vaiteh, ka hrui hane apihai awm mahoe. ³ Rapan teh Ephraim kho hoi a kahma han. Uknaeram teh Damaskas kho hoi a kahma han. Kacawie Sirianaw teh Isarelnaw e bawilennaeh patetlah ao awh han, telah ransahu BAWIPA ni ati.

⁴ Hote hnin dawkvah, Jakop bawilennaeh teh a roum han, a thâwnaeh teh a kamsoeh han. ⁵ Cang ka a kung ni cavuinaw a pâkhueng navah, a kut hoi cavuinaw a a awh e patetlah Rephaim yawn dawc cavui pâhma e racawng e patetlah ao han. ⁶ Hatei, olive paw hah karuek toteh, a som dawc kahni kathum touh ka paw e a kang, paw rah pawiteh, pali panga touh ouk ao e patetlah pâhma e cang a cawi nahanlah ao han telah Isarelnaw e Bawipa Jehovah ni ati.

⁷ Hat hnin vah, tami ni kasakkung koe a khet vaiteh, a mit ni Isarelnaw e kathounge Cathut hah a bari han. ⁸ Amamouh ni a kut hoi a sak awh e khoungroenaw koe kangvawi awh mahoe. Amamaeh kutdawnnaw hoi a sak awh e hmuitui sawinaeh Asherim khoungroenaw koe lah kangvawi awh mahoe. ⁹ Hat hnin dawkvah, amamaeh kacakpoung khonaw teh, Isarelnaw kecu dawc a ceitakhai e kahrawngum hoi monsom patetlah ao vaiteh, kingkadi e lah ao han.

¹⁰ Bangkongtetpawiteh, nang teh nama e rungngangnaeh Cathut hah na pahnim teh, nama e kânguenae talung hah pouk dounnaeh na tawn hoe. Hatdawkvah, nang ni na ngai e thingth-airompo na ung eiteh, ramlouknaw e misur kang hah na ung han. ¹¹ Na ungnah hnin dawkvah, na

rourng sak teh, cati na patuenae amom vah, a pei na pei sak han. Hatei, patawnae hoi kahmat thai hoeh e runae a tho hnin navah, caticamu anae tueng a kahma han.

¹² Aya! miphunnaw e hramki lawk bo aw. Ahnimouh teh, athakaawme tui a cairing e patetlah a cairing aw h han. ¹³ Miphunnaw teh tui moikapap e a cairing e patetlah ka cairing aw h nakunghai, Bawipa nang ni ahnimanaw hah na yue toteh, ahlanae koe a yawng aw h han. Mon vah kahlî palek e cahik patetlah bongparui ni a sin e songnawng patetlah pâlei lah ao aw h han. ¹⁴ Kanî a khup navah kenhaw! taki a tho poung khe. Khodai totouh ahnimouh aw m mahoe h toe. Hethateh, maimouh na ka tuk ni teh na ka lawm e naw ni a coe aw h hane ham, maimouh na ka lawm e naw koe kabawt hane cungpam doeh.

18

Cathut ni Kush runae a poe

¹ Kush palangnaw namran lah, cahucahu kacai e ratheinaw onae ram teh a yawthoe. ² Hothateh, tui pui lam hoi thoseh, tui van vah, lungpum longnaw hoi thoseh, patounenaw patoun e ram lah ao. Karang poung e kaoungkung naw, ka rasang ni teh a tak kâpi e miphun, kahnai kahlat kaawm e taminaw ni taki e miphun, palangnaw kamphinae koe e talai daw k kaawm e, a tha kaawm ni teh reprep ka coun groe e miphun koe cet aw h haw.

³ Talaivan kaawm e taminaw hoi talai daw k kaawm e taminaw, monnaw daw kvah mitnout a

ung awh toteh, nangmouh ni na hmu awh han. Mongka ueng toteh nangmouh ni na thai awh han. ⁴ Bangkongtetpawiteh BAWIPA ni, kai koe a dei e teh, duem ka o teh, kanî raeng dawk hoi ka ang poung e khumbei patetlah thoseh, canga tue kêannaeh tueng koehoi tadamtui kabawt sak e tâmai patetlah thoseh, ka onah hmuen koehoi ka khet han telah ati. ⁵ Bangkongtetpawiteh, a tue a pha hoehnahlan a pei ka pei niteh, a pei teh kahmin e a paw lah ao toteh, a dawnnaw hah ramalongkawi hoi bouk vaiteh, a kangnaw hai koug bouk teh tâkhawng lah ao. ⁶ Hotnaw pueng teh, mon vah moi kacate tavanaw hoi talai dawk e saringnaw hanelah ka cawi sak han. Moi ka cat e tavanaw ni ahnimah van vah, kompawiteh tue a loum sak aw hoi vaiteh, talai dawk e saring pueng ni ahnimah van vah kasik tue a loum sak aw hoi han.

⁷ Hate tueng dawkvah, ka rasang ni teh a tak kêpi e miphun, kahnai kahlat kaawm e taminaw ni taki e miphun, palangnaw kamphinae koe e talai dawk kaawm ni teh a tha kaawm reprep ka coungroe e miphun teh, kalvan ransanaw e BAWIPA min onah Zion mon daw, ayawm-poehtonaw hah a sin aw hoi han.

19

Cathut ni Izip runah a poe han

¹ Izip ram hoi kêkuen e lawk hateh, Khenhaw! BAWIPA ni karang poung e tâmai a kêcui teh Izip ram lah a tho. Izip ram e meikaphawknaw teh a hmalah a pâyaw aw hoi teh, Izipnaw e a

lung teh, amamae thungvah, a kamyawt pouh aw hah. ² Kai ni Izipnaw teh, buet touh hoi buet touh a kâtaran aw hah nahanelah ka hroecoe vaiteh, ahnimouh ni amamae hmaunawng ha reira, imri reira, kho reira, uknaeram reira a kâtuk aw hah. ³ Izipnaw e lungthin teh, amamae thungvah, hrawng hrang lah ao hah. A noenae hai ka kâsanu sak hah. Hatnavah, ahnimouh ni meikaphawknaw, taân kasinnaw, khueyuenaw, tonghmanaw koe a pacei aw hah. ⁴ Izip khocanaw teh, ka matheng e bawi kut daw k ka thak hah. Kâtawnnae kalen e siangpahrang ni ahnimouh hah a uk aw hah han telah, ransahu Bawipa Jehovah ni a ti.

⁵ Tuipui tuinaw rem aphui vaiteh, palang tuinaw rem hak vaiteh a ke aw hah. ⁶ Palangnaw teh a hmui kong vaiteh, Izip ram e palangnaw teh rem a hak hah. Lungpum hoi pho naw teh kamyai vaiteh a ke aw hah. ⁷ Nai palang rai kaawm e akungnaw hoi Nai palang teng patue e naw pueng teh, remke vaiteh, koug kahmat vaiteh, awm aw hah mahoe h toe. ⁸ Tanga kamannaw teh cingou aw hah vaiteh, Nai palang daw k hradang kasawnnaw pueng a khui a ka aw hah. Tui daw k tamlaw k kahengnaw hai a tha a tawn aw hah. ⁹ Raha kasawnnaw hoi lukkarei kakawngnaw teh yeirai a po aw hah. ¹⁰ A kâoupkhai e naw teh a raw k hah, thaw katawknaw pueng teh a lung a rek aw hah. ¹¹ Zoan kho e kahrawikungnaw teh a pathu aw hah. Faro siangpahrang e a lungkaang poung e kâpokhaibawinaw ni pathunae pouknae hah a poe aw hah. Nang ni Faro siangpahrang hah, kai teh

a lungkaangnaw e miphun, ayan e siangpahrangnaw e miphun lah ka o, telah bangtelamaw na dei thai han vaw. ¹² Atuvah, nange a lungkaangnaw teh nâmouh ao aw h va. Ahnimouh ni atuvah, ransahu Bawipa Jehovah ni Izipnaw hanelah a kâcai e hah atu dei aw h naseh, panuek aw h naseh. ¹³ Zoan kho e kahrawikungnaw teh, ka pathu e lah ao aw h toe. Memphis kho e kahrawikungnaw teh dumyennae hoi ao aw h toe. Izip catoun e kacuenaw ni Izip ram hah a payon sak toe.

¹⁴ BAWIPA ni Izip ram thung kâkapeknae muitha a patoun pouh dawkvah, yamu ka parui e tami ni amae a palo daw k rawraw a cu e patetlah, ahnimouh teh, Izip ram hah ahnie tawksaknae daw k, rawrawcu aw h han. ¹⁵ A lû nakunghai thoseh, a mai nakunghai thoseh, samtue kang nakunghai, lungpumpung nakunghai, Izip ram hanelah thaw ka taw k pouh thai hane api aw m hoeh.

¹⁶ Hote hnin navah, Izip khocanaw teh napui patetlah ao aw h han. Ahnimouh ni ahnimouh koe kut kahek e ransahu BAWIPA hmalah taket aw h vaiteh a pâyaw aw h han. ¹⁷ Izip ram hane kâtaran lah ka noe pouh e ransahu BAWIPA Cathut e a pouknae daw kvah, Judah ram teh Izip ram hanelah, takikathopounge lah a coung pouh han. Hote ram ka pouk e naw pueng ni a taki aw h han.

Izip ni BAWIPA a baw k han

¹⁸ Hote hnin daw k, Izip ram vah, Kanaan lawk ka dei niteh, kalvan ransanaw e BAWIPA hah thoe ka bo e kho panga touh ao han.

19 Hat hnin vah Izip ram lungui vah, Jehovah hanelah thuengnae khoungroe buet touh ao teh, hote ram ramri koevah, Jehovah hanelah lungdon ao han. ²⁰ Hote lungdon teh Izip ram vah, ransahu BAWIPA hanelah, mitnoutnae hoi kapanuekkhaikung lah ao han. Ahni ni rungngangkung hoi karingkung a patoun vaiteh, ahni ni a rungngang aw h han. ²¹ Hahoi, BAWIPA ni amahoima Izipnaw ni panue nahanelah a sak dawkvah, hat hnin vah, Izipnaw ni BAWIPA hah a panue aw h teh, sathei hoi pasoung hnonaw hoi BAWIPA hmalah lawk a kâkam aw h teh, a kuep sak aw h han. ²² BAWIPA ni Izip ram hah runae a poe han. Runae a poe eiteh, a hmâ teh a kahma han. Hat toteh, ahnimouh teh BAWIPA koe bout a tho aw h han. BAWIPA ni ahnimae ratoum lawk hah a thai pouh teh, ahnimae hmânaw teh ahawi sak pouh aw h han.

²³ Hat hnin vah Izip ram hoi Assiria ram totouh lamthungpui ao han. Assirianaw teh Izip ram lah thoseh, Izipnaw teh Assiria ram lah thoseh, cet awm aw h vaiteh, Izipnaw teh Assirianaw hoi reirei a bawk aw h han. ²⁴ Hate hnin dawkvah, Isarel ram teh Izip ram hoi Assiria ram hoi cungtalah, apâthum e ram lah a bawk teh, talai van lungui vah yawhawi lah ao han. ²⁵ Rasahu BAWIPA ni, ka mip hun Izip, ka kut hoi ka sak e Assiria, ka râw lah kaawm e Isarelnaw koe, yawhawinae awm seh telah dei vaiteh, ahnimanaw hah yawhawi a poe han.

20

Izip hoi Kush hanelah mitnoutnae

¹ Siria siangpahrang Sargon ni ransabawi Ashdod hah a patoun dawkvah, ahni ni Ashdod kho hah a tuk teh a lawp. ² Hote tueng nah, BAWIPA ni Amoz capa Isaiah koe, cet haw. na kâyeng e buri hah rading nateh, na khok dawk e khokkhawm haiyah rading haw atipouh navah, ahni ni khohna hnat laipalah, khokkhawm khawm laipalah a cei ao. ³ Hahoi, BAWIPA ni ka san Isaiah ni, Izip hoi Kush ramnaw hanelah, mitnout hoi kângairu hno lah, khohna hnat laipalah, khokkhawm khawm laipalah kum thum touh thung a ceio e patetlah, ⁴ Siria siangpahrang ni Izipnaw hoi Kushnaw kacue kanaw pueng teh, khohna hnat laipalah, khokkhawm khawm laipalah, laheibaw boehai ramuk laipalah, a hrawi awh han. Hethateh, Izip ram e yeiraiponae doeh. ⁵ Hatnavah, Ashdod khocanaw ni a taki awh han. Ahnimouh ni a kâuep awh e Kush ram hai thoseh, a kâoupkhai awh e Izip ram hai thoseh yeiraipo hoi ao awh han. ⁶ Hot hnin vah, hote palang rai kaawm e naw ni hai, khenhaw! Assiria siangpahrang e kut dawk hoi hlout nahanelah, maimouh ni ngaihawi teh kângue e naw koe, hettelah bo ao aw. Hat pawiteh, maimouh teh bangtelah hoi maw hlout thai awh han toung vaw, ati awh han a ti.

21

Babilon rawknae

¹ Tuipui teng kaawm e thingyeiyawn hoi kâkuen e lawk teh, akalah hoi bongparui ni a ceikhai e patetlah hothateh takitho e ramke

koehoi a tho. ² Taki ka tho e vision hah ka hmu toe. Yuemkamcu hoeh e tami teh yuemkamcu hoeh. Ka raphoe e tami teh a raphoe. Elam khocanaw luen takhang aw. Midian khocanaw kalup aw. Hote kho kecu ka tâcawt e cingounae kaawm e pueng hah karoumsak toe.

³ Hatdawkvah, ka keng teh patawnae hoi a kawi. Ca khenae hoi kâvan e puenghoi patawnae ni kai teh na katek. Kai teh ka thai thai hoeh nahanelah ka lung a kâsanu. Ka hmu thai hoeh nahanelah ka lung a puen. ⁴ Ka lungthin a kâhei teh, ka taki dawkvah, tâlueng laihoi ka o. Dikdik ka doun e tangminlah lenghrim patenghai kaluekalap kawi lah ao toe.

⁵ Ahnimouh ni caboi a rakueng aw. Imrasang daw ramveng ka ta toe. A ca aw. A nei aw. Oe kahrawikungnaw thaw aw. Bahlingnaw hah satui hluk aw.

⁶ Bangkongtetspawiteh, Cathut ni kai hanelah, cet haw. Ramveng ratawng sak haw. A hmu e patetlah dei sak haw. ⁷ Ahni ni, rangleng ransahu, marangransanaw, la ransahu, kalauk ransahu hah a hmu toteh, kancengcalah a hnâpakeng vaiteh, taranhawi nalaihoi thai naseh, telah a ti. ⁸ Ramvengim daw e sendek ni, Oe BAWIPA, kai teh khodai lah kanîruihui ka kangdue, karum lahai karum tuettuet ka kangdue. ⁹ Khenhaw! Atu rangleng ransahu hoi marangransanaw teh a tho aw lahun, titeh hram laihoi a dei. Hathnukkhu, a rawp toe. Babilon kho a rawp toe. Ahnie meikaphawk cathut kaawm e pueng teh, talai daw reppasei lah koun a rawp aw toe telah rek a dei.

¹⁰ Ka coungroe teh, katinkaawinae hmuen koehoi ka tho e miphun, ransahu BAWIPA tie Isarelnaw e Cathut ni a dei e hah, ka thai e patetlah nangmouh hah kâhruetcuetnae na poe awh.

Dumah ram hoi kâkuen e lawk

¹¹ Oe ramveng, karum lah bangtelane Oe ramveng, karum lah bangtelane, telah Seir mon hoi kai hah na kaw.

¹² Ramveng nihai, amom a pha doeh. Karum hai a pha doeh. Pacei han ngai pawiteh pacei awh. A hnukkhu bout tho awh, telah a ti.

Arabia hoi kâkuen e lawk

¹³ Kahlawng ka cet e Dedannaw, nangmouh teh Arabia ratu dawk karum na roe awh han.

¹⁴ Tema ram dawk kaawm e taminaw, tui kahrannaw hanelah tui sin pouh awh. Nangmouh ni ka yawng e naw hah vaiyei hoi na dawn awh toe. ¹⁵ Bangkongtetpawiteh, nangmouh teh tahloinaw e hmalah hoi thoseh, phawk e tahloi hmalah hoi thoseh, nue tangcoung e licung pala hmalah hoi thoseh, kâtuk nah um hoi thoseh na yawng awh toe.

¹⁶ BAWIPA ni kai koe hettelah a dei. Thaw tawk hanelah hlai e naw ni a parei awh e kum lahoi, kum touh thung vah, Kedar kho e bawilennaе pueng teh a pout han. ¹⁷ Kacawie athakaawme Kedar capanaw, lipala ka patuem e ransanaw teh a youn awh han. Bangkongtetpawiteh, Isarelnaw e Cathut Jehovah ni hottelah yo a dei toe.

22

Jerusalem hoi kâkuen e lawk

¹ marangransanaw Hethateh, ayawn hoi kâkuen e vision doeh. Nangmouh pueng teh lempu na luen awh nahanelah, nangmouh koe bang hno mouh ka tho vaw. ² Nang teh ka hrawang e kho, ka hramki e kho, ka kamlue e kho. Na tami ronaw teh, tahloi hoi kadout awh e nahoe. Taran kâtuknae koe kadout awh e hai nahoe. ³ Na kahrawikungnaw pueng teh cungtalah koug a yawng awh. Ahnimouh teh licung sin laipalah, katek lah ao awh. Ahlanæ koe a yawng awh eiteh, man e naw teh, cungtalah katek lah ao awh. ⁴ Hatdawkvah, kai hah na khen hanh. Puenghoi ka kap haw nei. Ka miphunnaw e tanglanaw hoi kâkuen lah, kai hah lungpahawi hanelah kâcai awh hanh lah a, telah ka ti. ⁵ Bangkongtetpawiteh, ransahu BAWIPA ni, vision hmunaæ ayawn dawkvah, paringparang lah onæ, rektapnae, kâsanunaæ, kho rapan raphoenaæ, monnaw hramkinae hoi kâkuen e hnin teh a hmoun toe.

⁶ Elam ram teh, rangleng ransa, marangransanaw hoi cungtalah caritpala a sin toe. Kir ram ni bahling hah a rasa toe. ⁷ Na ngai poung e ayawnnaw teh taran tuknae ranglengnaw hoi a kawi. Marangransanaw teh longkha koe hmuen a la awh. ⁸ Judah ram ni a kânguenæ teh takhoe pouh lah ao toe. Hatnae tueng dawkwang teh, ratu im dawkwang e senehmaica hah na khen vaiteh, ⁹ Devit kho dawkwang ni teh katim e moikapap na hmu

han. Nangmouh teh, akalae tuiim dawk e tui hai na pátung awh han.

¹⁰ Hathnukkhu, Jerusalem kaawm e imnaw hah na parei vaiteh, rapannaw hah kacaklah sak thai nahanelah, imnaw hah raphoe awh.

¹¹ Tuiim karuem dawk hoi tuinaw hanelah, tuiim hai rapan bokhni touh e rahak vah, a sak awh. Hatei, het naw ka sak e, nangmouh ni na khen awh hoeh, na panuek awh hoeh. Ayan hoi hote ka sak e haiyah, banglahai na ngai awh hoeh.

¹² Hatnae tueng dawkvah, khuika hanelah, sam ngaw hanelah, buri khohna hanelah, ransahu Bawipa Jehovah ni na coun teh na hroecoe awh. ¹³ Hatei, Khenhaw! Lunghawinae, maitonaw theinae, tunaw theinae, maitomoi canae, misur yamu neinae a sak awh teh, maimouh teh tangtho due awh han toung dawkvah, cat net awh sei, telah ati awh bo aw.

¹⁴ Rasahu BAWIPA ni a dei e teh, kaie ka hnâ dawk a pâpho e teh, atangcalah, nangmouh teh na due awh ditouh yontha lah na awm mahoe, telah ransahu Bawipa Jehovah ni a ti.

Shebna kâhruetcu et poenae

¹⁵ Ka Bawipa ransabawi Jehovah ni a dei e teh, tho nateh, hnokuemkung Shebna, ahni teh im ka ukkung lah kaawm e koe cet nateh, ¹⁶ a rasangnae koe nama hanelah phuen tangkom tai nateh, ma o nahane hmuen hah talung dawk ka thuk e, nang teh hete hmuen hoi bangtelamaw na kâkuet teh, phuen tangkom hah nama hanelah na thuk nahanelah, hete hmuen koe nang teh api hoi maw na kâkuet.

¹⁷ Oe, athakaawme tami, BAWIPA ni nang teh, puenghoi na pâlei han. Nang hah kacaklah na man han. ¹⁸ Nang hah pou na palet vaiteh, akawnae ram dawk na tâkhawng han. Nang teh hote ram dawk na due han. Hote ram dawk, nange lentoe ranglengnaw teh, na bawipa e imthungnaw hanelah, yeiraiponae lah ao han. ¹⁹ Na thaw dawk hoi na takhoe han. Na hmuen koehoi beng na sawn han.

²⁰ Hatnae hnin dawkvah, Hilkiyah capa, ka san Eliakim hah ka kaw vaiteh, ²¹ nange khohna hah, ahni ka khohna sak han. Na taisawm hai ka kâyeng sak vaiteh, nange kâtaawnae hah ahni kut dawk ka poe han. Ahni teh Jerusalem vah kaawm e naw hoi Judah miphunnaw e na pa lah ao han. ²² Devit im e tho cabi hah, ahnie a loung dawk ka patue pouh han. Ahni ni a paawng vaiteh, apinihai khan thai mahoe. Ahni ni a khan e teh apinihai paawng thai mahoe. ²³ Kacake hmuen koe pâkhinae rui patetlah ka caksak han. Ahni teh a na pa e im dawk, bawilenna bawitungkhung lah ao han.

²⁴ Kawlung koehoi kamtawng teh, ailo manang pueng, hnopai e pueng, na pa imthung hoi catounnaw e bawilenna teh, ahnie van vah bang lah ao han. ²⁵ BAWIPA ni a dei e teh, hatnae tueng dawkvah, kakak hmuen koe kaawm e pâkhinae rui teh, a hmuen koehoi puen vaiteh, thouk bouk vaiteh, a rawp han. Ahni van kaawm e hnokari hai takhoe lah ao han, telah Rasahu BAWIPA ni a ti.

Taire hoi Sidon hoi kâkuen e lawk

¹ Hete lawk teh Taire hoi kâkuen e lawk doeh. Tarshish longnaw, cingou aw haw. Bangkongtetpawiteh, Taire kho teh im awm hoeh. Tuirai kâhatnae ao hoeh totouh, raphoe lah ao toe. Kittim ram hoi patuen thai lah ao. ² Tuilum daw k kaawm e naw sairasuep lah awm aw haw. Tuipui daw k ka cet kaawm e Sidon hno ka yawt naw, nangmouh teh na tawnta sak aw haw toe. ³ Ka kaw poung e tui van vah, hot kho e aphawng teh, Shihor cati lah kaawm e Nai palang e a paw doeh. ⁴ Oe Sidon kho, kayak haw. Bangkongtetpawiteh, tuipui rapan niyah, kai teh camo hai ka vawn hoeh, ca hai ka khe hoeh, thoundounnaw hai ka khenyawn hoeh, tanglanaw hai ka paroung hoeh telah a ti.

⁵ Izip ram vah kamthang a pha toteh, Taire kho kamthang kecu daw k, ahnimouh teh puenghoi a lungpuen aw haw han. ⁶ Tarshish kho lah raka aw haw. Tuilum daw k kaawm e taminaw, cingou aw haw haw.

⁷ Akungtuen kamtawngnae teh, ayan hoi e lah ao teh, ahlanae koe na khok ni na ceikhai teh, nangmae na lamtunae kho teh, hettelah namaw ao vaw. ⁸ Bawilukhungnaw ouk ka poe e kho lah ao nahlangva, ahnie hno kayawtnaw teh, kahrawikungnaw lah a coung aw haw teh, hno kayawtnaw teh talai van oup e lah kaawm e Taire kho hoi kâtaran lah apimouh hete pouknae hah ka tâcawtkhai va. ⁹ Ransahu BAWIPA niyah, bawilenna kâoupnae kaawm e pueng hah, banglah ngaihoeh nahane hoi, talai van

e ouphlawpnae pueng yeiraipo sak hanelah, hottelah a noe toe.

¹⁰ Oe Tarshish kho tanglakacuemnaw, ka khoumkung ao hoeh toung dawkvah, Nai palang patetlah bout lawng lawih. ¹¹ Bawipa ni tupui van vah a kut a dâw teh, uknaeramnaw hah a kâhuet sak. Kanaan hoi kâkuen lah, kacakpounge rapanimnaw hah raphoe hanelah BAWIPA ni kâ a poe. ¹² Rektap lah kaawm e tanglakacuem, Sidon canu, nang teh na lung bout hawinae awm mahoe h toe. Thaw haw. Kittim ram lah raka haw. Haw e hmuen koehai nang hanelah, kâhatnae hmuen awm mahoe h, telah a ti.

¹³ Khaldeannaw e ram hah, khenhaw! Ahnimouh teh ayan vah awm aw h hoeh. Assiria ni hote ram hah, ramke um e moithangnaw hanelah a tawn aw h. Ahnimouh ni, rapan ramvengim a sak aw h teh, hote kho rapan hah a raphoe aw h teh, hote kho hah ka rawk e imrawng lah ao sak aw h.

¹⁴ Tarshish longnaw cingou aw h haw. Bangkongtetsawiteh, nangmae ramvengimnaw teh raphoe lah ao toe.

¹⁵ Hatnae hnin dawkvah, Taire kho teh, siang-pahrang buet touh e se patetlah kum 70 touh thung pahnim lah ao han. Kum 70 touh a baw navah, ka kâyawt e napui ni la sak e daw k e patetlah Taire kho vah ao han. ¹⁶ Oe pahnim lah kaawm e ka kâyawt e napui, ratoung hah lat nateh, kho hah lawngven haw. Nang hah hlawt na pouk aw h nahanelah, ngai kaawm lah kueng nateh, la moi sak haw.

¹⁷ Kum 70 abaw toteh, BAWIPA teh Taire kho khet hanelah a tho han. Hote kho teh, amae apfu koe bout ban vaiteh, talaivan uknaeram puenghoi yah bout a kâyo han. ¹⁸ Hatei, ahnie hnopai yonae aphunaw teh, BAWIPA han thounghnae lah ao han. Hot hah pâkuem mahoe. Ahnie hnopai yo e teh, BAWIPA hmalah kaawmnaw hanelah teh, ka khout e rawca hoi khohna kahawi naw hah a kabawp han.

24

Talaivan pueng lawkcengnae

¹ Khenhaw! BAWIPA ni talai hah peng raphoe vaiteh, tami kingkadi lah awm sak vaiteh, talai detpakhup vaiteh, hawvah kaawm e naw hai koungh a kâkayei sak han. ² Hattoteh taminaw koe kaawm e patetlah vaihma koe ao van han. San koe kaawm e patetlah a bawi koehai ao van han. Ka ran e koe kaawm e patetlah kâyawt e koehai ao han. Lai ka ba e koe kaawm e patetlah lai a ba pouh e koehai ao han. Apung ka poe e koe kaawm e patetlah apung kacate koehai ao han. ³ BAWIPA ni a dei dawkvah, talai teh hrawnghrang lah ao teh, lawp e lah ao han.

⁴ Talai teh a cingou laihoi a kamyai. Talaivan hai a tha ayoun teh a kamyai. Talai tami kalentoenaw hai a tha ayoun awh. ⁵ Talai teh, ama dawkkawm e taminaw e kâtapoenae, kâlawk ngaihoehnae, a yungyoe lawkkam tapoenae dawkvah, a khin toe. ⁶ Hatdawkvah, hete thoebonae ni talai a payawp toe. Talai dawkkawmnaw koe yon teh a pha toe. Hatdawkvah, talai dawkkawm e naw teh, a kak awh teh,

hoehoe a youn awh. ⁷ Misurtui a katha e teh a cingou. Misurkung hai a kamyai toe. Konawmnae hoi kaawm e pueng ni a cingou awh. ⁸ Tâbaw hoi panuiparing lawk hai kingdi toe. ⁹ La sak laihoi misurtui neinae awm hoeh toe. Yamu teh kanetnaw hanelah a kha pouh toe. ¹⁰ Paringparang lah kaawm e khopui teh a rawk toe. Apihai a kâen hoeh nahanelah im pueng teh khan lah ao. ¹¹ Misurtui a takang toung dawkvah, lamnaw daw k a cingou awh. Lung-hawinae kaawm e pueng teh kingdi toe. Talai lunghawinae teh pâlei lah ao toe. ¹² Kho thung teh, kingdinae doeh kaawm toe. Kho longkha teh, peng raphoe lah ao. ¹³ Bangkongtetspawiteh, talai lungui, ramnaw thung dawkvah, olivekung kahuet toteh kaawm e patetlah thoseh, misurpaw khi toteh a paw racawng e patetlah thoseh ao han.

¹⁴ A lawk hoe a cai sak awh teh, lunghawi laihoi la a sak awh. Kaniloumlah kaawm e naw ni BAWIPA taluenaeh teh a dei awh han. ¹⁵ Hatdawkvah, kanitholah kaawmnaw ni BAWIPA lentoenaeh a poe awh han. Talai poutnae koe, tupui rai kaawm e naw ni, Isarelnaw e Jehovah Cathut teh lentoenaeh a poe awh han. ¹⁶ Kalan e Bawipa teh lentoe lawiseh, telah talai poutnae koehoi la sak lawk ka thai. Hatei, kai niteh, kai kaawm hoeh toe. Kai kaawm hoeh toe. Ka kahma toe. Bangkongtetspawiteh, yuemkamcu hoeh e naw ni yuemkamcu hoeh lah kho a sak awh. ¹⁷ Oe talai taminaw, taki ka tho e hoi tangkom hoi karap naw ni sut na pawp awh. ¹⁸ Taki ka tho e pawlawk daw k kayawngnaw teh tangkom thung a bo awh han. Tangkom

thung hoi bout katâcawtnaw teh tangkam dawk a kâman awh han. Kalvan longkhanaw paawng teh, talai dunaw hai a kâhuet han. ¹⁹ Talaipui teh khoeroe a kâbawng toe. Talaipui teh khoeroe a tip teh a rawk toe. Talaipui teh khoeroe a kâhuet toe. ²⁰ Talaipui teh yamuhri patetlah dandan a rawp teh, lounghanghawi patetlah a kâhuet toe. A payonnae yon teh amae lathueng a ri poung dawkvah, a rawp han. Bout thaw thai mahoe h toe.

²¹ Hote hnin dawkvah, BAWIPA ni kalvan vah, ransabawinaw thoseh, talai van vah talai siangpahrangnaw thoseh, lawk a ceng han. ²² Ahnimanaw hah tangkom dawk hoi thongim ka bawt naw patetlah cungtalah kamkhueng sak vaiteh, thongim thung a paung han. Hnin moikapap a loum torei, ahnimanaw teh lawk-ceng lah ao awh han. ²³ Hathnukkhu thapa teh a minhmai mathout vaiteh, kanî hai yeirai a po han. Bangkongtetpawiteh, kalvan ransabawi ni Zion mon Jerusalem vah siangpahrang lah awm vaiteh, amae kacuenaw hmalah, a lentoe han.

25

Pholennae la

¹ Oe Jehovah, nang teh kaie Cathut lah na o. Na bari vaiteh, na min ka pholen han. Bangkongtetpawiteh, nang ni kângairu hnonaw hah na sak toe. Ayan e na pouknae teh, yuemkamcunae lahoi a cak awh. ² Kho hah songnawng lah na coung sak teh, kacakpounge kho hah na tip sak. Ramlouknaw e imnaw teh kho lah awm hoe h toe. Hotnaw hah nâtuek hai bout sak awh mahoe h

toe. ³ Hatdawkvah, athakaawme miphun teh, Bawipa nang na pholen awh han. Taki ka tho e miphunnaw e kho ni nang teh na taki awh han. ⁴ Bawipa nang teh mathoenaw e rapan, runae koe ka phat e vonhlmrincinaw hanelah kângue e, cakho a tho nah kâhatnae, khumbei um vah tâhlip lah na o. Bangkongtetpawiteh, taki ka tho naw e lungkhueknae teh, tapang kahmâng e cakho patetlah thoseh, ⁵ ramkenae koehoi e khumbei patetlah thoseh ao. Bawipa nang ni, ramlouknaw e pawrin teh na roum sak pouh. Tâmai tâhlip dawk khumbei a bet e patetlah taki ka thonaw e la sak lawk teh a kahma han. ⁶ Rasahu BAWIPA niyah, kahawipoung e ai kawî, cakawî naw hoi misur yamunaw hoi tami pueng hanelah, hete mon dawk canei pawî pui a to pouh awh han. ⁷ Tami pueng ka ramuk e minhmai ramuknae hoi ram pueng ka ramuk e minhmai ramuknae hah, hete mon dawk Bawipa ni a takhoe han. ⁸ Duenae hah a yungyoe a payawp han toe. Bawipa Jehovah ni, tami pueng e minhmai dawk hoi mitphi hui pouh vaiteh, a taminaw ni a khang awh e pathoenae hah, talai van dawk hoi takhoe pouh han toe. Bangkongtetpawiteh, BAWIPA ni hottelah a dei. ⁹ Hat hnin vah, khenhaw! Hete Bawipa teh, maimouh rungngang hanelah, maimouh ni ngaihawi e maimae BAWIPA doeh. Bawipa e rungngangnae dawkvah, maimouh teh lunghawi awh sei, telah la a sak awh han.

Cathut ni Moab runae a poe han

¹⁰ Bangkongtetpawiteh, BAWIPA e a kut teh, hete mon dawk ao han. Cakong teh vaipuen tangdong dawk vitvit coungroe patetlah Moab ram teh Bawipa e khok rahim vah, vitvit coungroe lah ao han. ¹¹ Tui ka kale e ni tui kale hanelah a kut a dâw e patetlah, Bawipa ni hote ram lungui vah a kut dâw vaiteh, hot ram e kâoupnae teh a thaonae kut hoi rahim lah a pabo han. ¹² Bawipa ni nange rapan koehoi kacakpounge ramvengim hah raphoe vaiteh, talai totouh a pabo dawkvah, vaiphu dawk a rawp han.

26

Cathut ni a taminaw tânae a poe

¹ Hat hnin vah, Judah ram dawk hete la heh a sak aw h han. Kaimouh koe kacakpounge kho ao. Rungngangnae rapannaw hoi kânguenae na poe han. ² Yuemkamcu e tamikalan mip hun a kâen nahanelah, kho longkhanaw hah paawng aw h haw. ³ BAWIPA ni ama kâuep ni teh a lung kathounge naw hah ka kuep e lungmawngnae thungvah, a khetyawt han. ⁴ BAWIPA hah poe kâuep aw h. Bangkongtetpawiteh, Jehovah Cathut teh kangning e lungsong doeh. ⁵ Ahni teh, a rasangnae hmuen, ka talue e kho daw k kaawm e naw hah a pabo han. Hote kho hah a rahnoum sak han. Hote kho hah rahnoum sak vaiteh, vaiphu daw k a ta han. ⁶ Khok ni khopui a coungroe han. Mathoenaw e khok, a thakatawnnaw e khok ni a coungroe han.

Cathut lanna e pholennae

7 Tami kalannaw e lamthung teh a lan. Oe kalan e BAWIPA, nama ni, tami kalannaw e lamthung hah na lan sak.

8 Oe BAWIPA kaimouh teh, nange lawkcengnae lamthung dawk nang hah na ring awh. Na min hoi pahnimhoehnae teh, ka muitha ni a doun e lah ao.

9 Tangmin vah ka muitha ni Bawipa nang na doun. Ka muitha ni ka thungvah, Bawipa nang na tawng. Bangkongtetpawiteh, talai dawc lawkcengnae ao toteh, talaivan kaawm e naw ni lannaehah a kamtu awh han.

10 Tamikathoutnaw teh, hawinae a hmu awh nakunghai, lannaehah kamtu thai awh hoeh. Ahni teh, lannaehah ram dawc patenghai kathout hno hah a sak awh teh, BAWIPA e taluenaehah banglahai ngai awh hoeh.

11 Oe BAWIPA, na kut hah na dâw eiteh, ahnimouh ni hmawt awh hoeh. Na miphunnaw hanelah, na lung patawnaehah ahnimouh patue nateh yeirai phawt sak haw. Na tarannaw hoi kâkuen e hmai ni ahnimouh teh, kang naseh.

12 Oe BAWIPA, nang ni kaimanaw hah lungmawngnae na poe han. Bangkongtetpawiteh, kaimouh hanelah nang ni na sak e seng doeh.

13 Kaimae BAWIPA Cathut, nang hloilah alouke bawipanaw ni kaimouh teh na uk awh toe. Hatei, nange na min duengdoeh kaimouh ni ka pâkuem awh.

14 Ahnimouh teh a due awh toe. Bout hring awh mahoehtoe. Ka dout e lah ao awh dawkvah, thaw awh mahoehtoe. Hatdawkvah, Bawipa,

tho nateh, ahnimanaw hah raphoe nateh, bout pâkuem kawi pueng hah raphoe pouh haw.

¹⁵ Bawipa nang ni, nama e miphun na pung sak toe. Oe BAWIPA nang ni nama e miphun na pung sak teh, lentoenae na kamnue toe. Ramrinaw hai na pakaw toe.

¹⁶ Oe BAWIPA, runae kâhmo toteh, nang koe ahnimouh teh a tho awh. Nang ni ahnimouh na yue toteh, a ratoum awh.

¹⁷ Oe BAWIPA, camovawn e napui ni, camo khe hnin a hnai toteh, a pataw dawkvah a hram e patetlah kaimouh hai nange hmalah hot patetlah ka o awh.

¹⁸ Kaimouh teh camo ka vawn awh niteh, patawnae puenghoi ka khang awh ei nakunghai, kahlî doeh ka khe awh. Kaimouh teh talai van vah, hloutnae hah ka tâcawt sak thai awh hoeh. Talaivan kaawm naw hai rawm awh hoeh.

¹⁹ Bawipa nange tami kadout naw teh a hring awh han. Ahnimaek tak teh a thaw awh han. Vai-phu dawkaawm e naw, kâhlaw hoi thaw awh vaiteh, lunghawi la a sak awh han. Bangkoktetpawiteh, Bawipa nange tadamtui teh, angnae tadamtui patetlah ao teh, talai ni hai kadout e naw hah a khe han.

²⁰ Ka taminaw tho awh. Namamaek rakhan thung kâen awh nateh, na hnuklah tho hah taren awh haw. A lungkhueknae a roum totouh, dongdeng kâhrawk awh.

²¹ Bangkoktetpawiteh, BAWIPA ni talai van kaawm e naw hah, a yonae patetlah runae poe hanelah, ama onae koehoi a tâco. Hat toteh, talai ni amae van rabawk e thi hah a pâpho han. Talai

dawk thei lah kaawm e naw hah bout ramuk thai mahoe h toe.

27

Isarel ratangnae

¹ Hote hnin dawkvah, BAWIPA ni kate niteh, kalen niteh, athakaawme tahloi hoi vi kathawn e tahrn Leviathan, kâpoum e tahrn Leviathan, tuipei dawk kaawm e khorui hah a thei han.

² Hote hnin dawkvah, ngai kaawm e misur takha hah la lah sak aw haw. ³ BAWIPA teh hote takha kakhenkung lah ao. Kai ni hote takha hah atuhoutu tui ka awi. Apinihai runae a poe hoe h nahanelah karum khodai pout laipalah ka khetyawt. ⁴ Kai dawk lungkhueknae awm hoe h. Pâkhing hoi pâkhingkungnaw kaawm nakunghai, hotnaw koe ka kamthaw vaiteh, vaitalahoi hmai ka sawi han. ⁵ Hoehpawiteh, kaie khetyawtnae dawk tha kâlat nateh, kai hoi roumnae lat aw h. Kai hoi roumnae lat aw h naseh.

⁶ Ka tho hane atueng dawk, Jakop mip hun ni a tangpha a payang teh, Isarel mip hun hai a pei pei vaiteh, ahnimouh ni talaivan pueng a paw hoi akawi sak aw h han. ⁷ Ahnimouh ka rektap e naw hah a rektap e patetlah ahnimouh hai a rektap a maw. Ahnimouh ka thet e naw teh thei lah ao e patetlah ahnimouh hai thei e lah ao aw h maw.

⁸ Bawipa ni a taminaw hah ramlouk lah bout bout ceisaknae lahoi runae a poe. Kanîtholae kahlî a tho toteh, amae a kâko hoi puenghoi ka tâcawt e kahlî hoi ahnimouh hah peng a takhoe . ⁹ Hatdawkvah, Jakop mip hun teh,

ahnimouh hno lahoi, amae yon hah a tha teh, thuengnae khoungroe talung kaawm e pueng hah talungpangaw patetlah rekrek a hem teh, Asherah khom hoi meikaphawknaw hah parawp toteh, hot hateh, amamouh yon takhoenae hoi ka kawi e a paw lah ao han.

¹⁰ Bangkongtetpawiteh, kacaklah sak e kho teh, kingkadi e hmuen, kahrawng patetlah hnoun e hmuen lah ao han. Maitoca ni hote hmuen koe a pâ vaiteh, hote hmuen koe a i vaiteh, a dawn a kangnaw hah pekhli e patetlah ao sak han. ¹¹ A kangnaw a ke toteh a khoe aw h han. Napuinaw ni tho aw h vaiteh, hmai a sawi aw h han. Bangkongtetpawiteh, hete miphunnaw teh hmuthainae kaawm hoeh e naw lah ao aw h. Hatdawkvah, ahnimouh kasakkung ni ah-nimanaw teh pahren aw h mahoe h. Ahnimouh kacangkhaie ni ahnimouh koe hawinae sak pouh mahoe h. ¹² Oe Isarelnaw, hote hnin dawkvah, Euphrates palangpui koehoi Izip palang totouh, BAWIPA ni cakang hah hem vaiteh, nangmanaw ni buet touh hnukkhu buet touh na rakhun aw h han. ¹³ Hote hnin dawkvah, kalenpounge mongka hah a ueng aw h han. Siria ram daw k kahmat e taminaw hoi, Izip lah pâlei e taminaw teh, bout tho vaiteh, Jerusalem kho, kathoung e mon dawkvah, BAWIPA hah a baw k aw h han.

28

Ephraim hoi Jerusalem lawkcengnae

¹ Ephraim yamuhri naw e kâoupnae baw-ilakhung hai thoseh, misur meng kaparuinaw e

talai kahawi monsom hoi kamyai thai e amamae lentoenae a pei hai thoseh, yawthoe lah ao. ² Khenhaw! Bawipa koe athakaawme teh, roun, cakho patetlah thoseh, athakaawme tûili patetlah thoseh, amae kut hoi talai totouh a tâkhawng han. ³ Ephraim yamuhrihaw e kâoupnae bawilakhung teh kho rahim reprep coungroe lah ao han. ⁴ Talai kahawi e monsom hoi kamyai thai e amamae lentoenae a pei teh kompawî hoehnahlan hmaloe kahmin e a paw patetlah ao han. Hote a paw ka hmawt e tami teh, amae kut dawk a pha tahma he tang a ca han. ⁵ Hote hnin dawkvah, ransahu BAWIPA ni, kacawie a taminaw koe bawilennaek lukhung, ka talue e bawilakhung lah ao han. ⁶ Lawkcengnaek koe katahungnaw hanelah, lannaek muitha lah ao vaiteh, tarannaw e longkha koehoi kabannaw hanelah, thaonae lah ao han.

Vaihma hoi profetnaw yamu a parui awh

⁷ Ahnimouh teh misur yamu kecu dawkrarawcawt awh vaiteh, yamu kecu dawka kamrit awh han. Vaihma hoi profetnaw teh rarawcawt awh vaiteh, misur hoi hmoungti awh toe. Yamu kecu a kamrit awh toe. Vision hmunaek koe a kamrit awh teh, lawkcengnaek koe paletpalut lah ao awh. ⁸ Ahnimaek canei pawî pueng teh, hmuen houng laipalah palo hoi a kawi.

⁹ Ahnimouh ni, apimouh panuenaek ka cangkhai awh han va. Kamthang hah apimouh ka deicai pouh han va. Nene nueng pâphei e naw nama. Nene ka net lahun e naw nama.

¹⁰ Bangkongtetpawiteh, kâlawk van kâlawk,

kâlawk van kâlawk, langri van langri, langri van langri, hitueng youn touh haw tueng youn touh lah bo ao vaw.

¹¹ Hatdawkvah, tamitavannaw e pahni hoi ramlouknaw e lawk hoi hete miphunnaw koe ahni ni lawk a dei han. ¹² Lawk a dei hane teh, het hateh, kâhatnae doeh. Ka tâwn e naw kâhat naseh, duem kâhat naseh, telah ahnimouh koe a dei pouh ei, ahnimouh ni thai ngai awh hoeh. ¹³ Hatdawkvah, ahnimouh teh a cei awh teh, hnuklah a rawp awh teh, a rawkphai awh teh, tangkam dawk a kâman awh teh, man lah ao awh nahan, BAWIPA e kâlawk teh ahnimae van vah, kâlawk van kâlawk, kâlawk van kâlawk, langri van langri, langri van langri, hitueng youn touh haw tueng youn touh lah ao han.

Zion hanelah takinlung

¹⁴ Hatdawkvah, Jerusalem kho vah, hete miphunnaw ka uk niteh, ka dudam e naw, BAWIPA e a lawk teh thai awh haw. ¹⁵ Bangkongtetpawiteh, nangmouh ni, kaimouh teh duenae hoi lawkkam ka sak awh toe. Phuen hoi lawkkâcat awh toe. Lacik kathout a tho toteh, kaimouh koe tho mahoe. Bangkongtetpawiteh, Laithoe hah kâuepnae lah ao teh, dумыennaе dawк kâhro awh toe, telah na dei awh. ¹⁶ Hatdawkvah, Bawipa Jehovah ni, kenhaw! talung, tanouknae talung, ka talue e a takinlung hah im du lah Zion mon dawkvah ka hruek toe. Ka yuem e tami teh kalue tâsuenae awm mahoe. ¹⁷ Kai ni lannae hah bangnuenae rui lah ka coung sak vaiteh, lannae hah bangnuenae paw lah ka o sak han.

Roun ni laithoe kâuepnae hah raphoe vaiteh, a kâhronae hmuen hai tui ni muen a khu han.

¹⁸ Duenae hoi lawkkam na sak e teh a rawk han. Phuen hoi lawkkam na sak e hai kangcoung mahoeh. Runae a pha toteh, nangmouh hah reprep na coungroe awh han. ¹⁹ Hote a cei toteh, nangmouh hai na ceikhai awh han. Hot teh amom buet touh hnukkhu amom buet touh a cei han. Kamthang na thai e ni karum kho-dai kaluekalapnae duengdoeh a tâcokhai han. ²⁰ Bangkongtetpawiteh, ikhun teh ma cawng hoeh hane totouh a duem, hni hai kâkhu thai hoeh hanlah a thoung. ²¹ BAWIPA ni a thaw ka talue e thaw hah tawk hane hoi ouk a tawk e lah kaawm hoeh e thaw hah tawk hanelah, Perazim mon dawk e patetlah a thaw sak han. Gibeon yawn dawk e patetlah a kâhlaw sak han.

²² Atuvah nangmouh teh, dudamnae sak awh hanh. Hoehpawiteh, puenghoi yuenae na khang awh han. Bangkongtetpawiteh, ram pueng dawk rawknae hoi lawkcengnae hah ransahu Bawipa Jehovah koehoi thai awh toe.

Cathut lungangnae

²³ Kaie ka lawk hah na hnâpakeng awh nateh thai awh haw. Ka lawk hah takuetluet thai awh haw. ²⁴ Cati patue nahanelah laikawka tawk e ni kanîrui talai a thawn maw. Talai hah patuenpatuen a pâpawnae teh a thawn maw. ²⁵ A palat toteh, catun hoi catun hah patue laipalah ouk ao maw. Catun hah aruirui lah a patue teh, catun hah a kawkkawka lah patue laipalah ouk ao maw. ²⁶ Bangkongtetpawiteh, ahni hah a cangkhai toe. A Cathut ni ahni hai a cangkhai

toe. ²⁷ Catun hah palatnae thingphek hoi kanawk hoeh. Catun hai lengkhok hoi palet sin hoeh. Catun hoi catun hah bongpai hoi doeh ouk hem. ²⁸ Vaiyei lah sak hane catun hah ouk tip sak awh. Hatei, pou kanek hoeh. Rangleng hah marang hoi a sawn sak eiteh, tip sak e nahoeh. ²⁹ Hethateh, ransahu BAWIPA koehoi doeh a tho. BAWIPA teh pouknae poenae koe kângairu hanelah ao teh, a pouknae hai a len.

29

Jerusalem ni kâhmo e hno

¹ Ariel kho, Ariel kho, Devit ni a tungpupnae kho a rawk toe. Kum touh hnukkhu kum touh pakawi awh. Pawinaw hah patuen patuen to awh. ² Hatei, kai ni Ariel kho hah runae ka kâhmo sak han. Hote kho dawk khuikanae hoi cingounae ao han. Hote kho teh ka hmalah Ariel kho patetlah ao han. ³ Kai teh nang-mouh petkâkalup lah ransanaw ka tungpup sak han. Ramvengimnaw hoi pet na kalup vaiteh, lampawpkhunaw hai ka tai han. ⁴ Nang teh rahnoum sak lah na o vaiteh, talai thung na deipan han. Rep na tabonae vaiphu thung hoi na lawk a tâco han. Na lawk teh kahrai lawk patetlah talai thung hoi a tâco han. Na lawk teh talai thung hoi paiyaicalah thai lah ao han. ⁵ Hatei, na tarannaw teh vaiphu patetlah ao awh vaiteh, kamathengnaw hai palek e cahik patetlah ao awh han. ⁶ Vaitalahoi pouk laipalah, ransahu BAWIPA ni khoparit lawk, tâlî, puenghoi kacai e lawk, ka kang e hmaipalai naw sin vaiteh, nang koe pai hanelah a tho han. ⁷ Ariel kho ka tuk

e ram pueng dawk e ransanaw, hote kho hoi hote kho hah ka tuk ni teh hote kho ka rektap e tami pueng teh, mang patetlah tangmin e vision patetlah ao han. ⁸ A von ka hlam e ni bu ka ca toe telah a mang a sak eiteh, a kâhlaw toteh, a von toungloung a hlam e patetlah thoseh, tui kahran e ni hai, tui ka nei toe telah a mang a sak eiteh, a kâhlaw toteh tui toungloung a kahran e patetlah thoseh Zion mon ka tuk e ram pueng dawk e ransanaw teh ao awh han.

Kâhruetcuetnae lawk apinihai banglahai ngâi awh hoeh

⁹ Hmoung tet awh nateh, hmoung ngam awh. Mit dawn awh nateh, hmawt laipalah awm awh. Misur net laipalah parui awh. Yamu net laipalah rawrawcu laihoi cet awh. ¹⁰ Bangkongtetpawiteh, BAWIPA ni inae hoi kâkuen e muitha hah nangmae lathueng a awi vaiteh, nangmae profet mitnaw hah tabuem vaiteh, na hmuna lûnaw hah a ramuk han.

¹¹ Nangmouh hanelah vision pueng teh, tacikkin e ca thung e lawklungnaw patetlah ao. Hot hah cakathoumnaw koe poe vaiteh, hete ca hah atu touk haw, telah na tetpawiteh, ahni ni, hete ca teh tacikkin lah ao dawkvah, kai ka touk thai hoeh, telah bout ati han. ¹² Hahoi hote ca hah, ca kathoum hoeh e koe bout poe nateh, hete ca hah atu touk haw, telah na tetpawiteh, ahni ni, kai teh ca ka thoum hoeh bout ati han.

¹³ Bawipa ni, hete miphunaw ni pahni hoi kai koe rek na hnai awh teh, amamae pahni hoi kai hah na pholen awh. Ahnimae lungthin teh kai hoi a kâhla poung. Ahnimouh ni tami

ni sak e kâlawk hoi kai hah na taki awh. ¹⁴ Hatdawkvah, khenhaw! Hete miphun koe kângairu hno buet touh hnukkhu buet touh hah puenghoi kângairu sak nahanelah, bout ka patue han rah. Ahnimouh thung e a lungkaangnaw e lungangnae teh a rawk han. Kathoumnaw e thoumnae hai a kahma han telah ati.

Kadumyengkungnaw

¹⁵ BAWIPA ni panue hoeh nahanelah pouknae teh kadung pounng lah a hro awh teh, amamae sakyoenae teh hmonae koe a sak awh teh, kaimouh hah apinimouh na hmu va, kaimouh hah apinimouh na panue va, telah ouk ka tet e taminaw teh a yawthoe awh. ¹⁶ Nangmouh ni palet lah na o sak awh toe. Hlaam ka bo e hah amhru patetlah pouk kawi na maw. Sak lah kaawm e ni kasakkung hanelah, ahni ni kai na sak e nahoe, telah ati kawi na maw. Sakyoe lah kaawm e hno ni, ka sakyoe hanelah, ahni teh banghai panuek hoeh, ati kawi na maw.

¹⁷ Lebanon mon teh talai ahawi lawhmuen lah ao teh, talai kahawi e lawhmuen teh ratu lah ao nahan sica doeh a ngai toe. ¹⁸ Hatnae hnin dawkvah, hnâ ka thai hoeh e naw ni Cakathoung e lawk a thai awh han. Mitdawnnaw ni vuivainae hoi hmonae daw k hoi hlout awh vaiteh, mit a hmu awh han. ¹⁹ Lung kârahnom e naw teh, BAWIPA daw k lunghawinae hah a katha lah bout a hmu awh han. Ayâ rahak kamathoe e taminaw teh, Isarelnaw e kathoung Bawipa daw k a lunghawi awh han. ²⁰ Bangkongtetpawiteh, ka mathengpaan e tami teh kahmat vaiteh, ka dudam e tami teh a kahma han. ²¹ Yonnae sak

hanelah a pawp teh, lawk lahoi tami buetbuet touh a yon sak teh, kho longkha koe ahni hanelah karap ka patung pouh e tami hoi yawmyin lah tami kalannaw e ham hah ka lawm e tami pueng teh, raphoe lah ao aw h han. ²² Hatdawkvah, Abraham ka rungngang e BAWIPA ni, Jakop miphun hoi kâkuen lah, Jakop miphun teh a hnukkhu kayanae hoi minhmai mathoenae hai awm mahoe h toe. ²³ Ahnimouh ni kai ni ka sak e hno a hmu aw h navah, kaie ka min hah amamae lungui vah a thounsak aw h han. Jakop miphun e kathounge BAWIPA teh a thoung tet aw h vaiteh, Isarel Cathut teh a taki aw h han. ²⁴ Lam ka phen e naw ni thaipanueknae hoi kâkuen e muitha hah coe aw h vaiteh, lungminhoehnae hoi ka cingou e naw ni hai cangkhae lawk hah a dâw aw h han telah ati.

30

Izip hoi lawkkam sak aw h hanh.

¹ BAWIPA ni a dei e teh, a lung ka patak e camonaw teh a yawthoe aw h. Ahnimouh teh, kaie pouknae lah kaawm hoe h e pouknae hah a tawksak aw h. Kaie muitha laipalah, a kâhuiko aw h teh, payonnae van payonnae a pakawi sin aw h. ² Ahnimouh teh, Faro siangpahrang e nguenae rahim vah, lungmawngnae a tawng aw h teh, Izip ram kângue hanelah a tawng aw h teh, kaie kâ het laipalah, Izip ram lah a cei aw h. ³ Hatdawkvah, Faro siangpahrang e nguenae teh, nangmouh hane yeirai lah ao han. Izip ram kânguenae teh, minhmai mathoenae lah ao han. ⁴ Ahnimae bawinaw teh, Zoan kho vah ao

awh teh, ahnimae laiceinaw teh, Hanes kho ka phat aw h nakunghai, ⁵ cungkeinae awm hoeh. Cawmpang han awm hoeh. Hawinae awm hoeh. Yeirai ponae hoi minhmai mathoena e dueng lah kaawm e taminaw kecu dawkvah, ahnimanaw pueng teh yeirai a po aw h han.

⁶ Akalae ram daw k e saringnaw hanelah Baw-
ipa ni a dei e teh; sendek la, sendektan, hrnthoe,
hoi kamleng e hmai tahrunnaw apapnae runae
hoi rucatnae ram hah ka raka niteh, hawinae
kaawm hoeh e miphun koe, la van vah amamae
hnpainaw thoseh, kalauk van vah hnpainaw
thoseh, a phu aw h. ⁷ Izip ni kabawpnae teh
cungkeihoeh, ayawmyin doeh.

Lawk ka ngaihoeh e miphun

⁸ Ka tho hane tueng daw k, kapanuekkhaikung
lah a yungyoe ao nahanlah, atu cet nateh, ahni-
mae hmalah a phen daw k thun pouh nateh, cauk
daw k hai thun pouh. ⁹ Bangkongtewpawiteh,
nangmouh teh ka taran e miphun, ka dумыen
e canunaw, BAWIPA lawk ngai hanelah ka ngai
hoeh e capanaw lah ao aw h. ¹⁰ Ahnimouh
ni, vision ka hmawt naw koe vision hmawt
aw h hanh aw h, profetnaw koe, katang e naw
hah kaimouh koe dei aw h hanh. Kaimouh koe
hnathai ka nawm e, lungthin kâdumnae naw
ma hah na dei pouh aw h. ¹¹ Lamthung katang
daw k hoi kâkhoe aw h. Lamthung daw k hoi
phen aw h. Isarelnaw e kathounge BAWIPA teh,
kaimae hmalah kahmat sak aw h, telah a dei aw h.
¹² Hatdawkvah, Isarel miphunnaw e
kathounge BAWIPA ni a dei e teh, nangmouh
ni hete lawk hah na hnoun aw h teh, rektap

hnephnapnae hoi kahuengkalang onae hah na kâuep awh teh, hotnaw hah na kâuep awh. ¹³ Hatdawkvah, hete payonnae teh, rak ka kâbawng niteh, coungkacoe kaawm e karasangpoung e kho rapan hoi a kâvan. Hote rawknae teh, pouk laipalah vaitalahoi a tho teh, ¹⁴ hlaamkabokung ni amae hlaam hah pasainae tawn laipalah, takhuen koe e hmaisaaan la nahane hoi, tui duek nahane boehai awm laipalah a hem e patetlah ao han.

¹⁵ Isarelnaw e kathounge ka Bawipa Jehovah ni hettelah a dei. Nangmouh teh pankângai laihoi duem na awm awh pawiteh, rungngang lah na o awh han. Nangmae thaonae teh duem na onae thung thoseh, yuemnae thung thoseh ao. Hateiteh, nangmouh ni na ngai awh hoeh. ¹⁶ Nangmouh niteh, kaimouh teh hottelah kaawm awh hoeh. Marang kâcui vaiteh, ka yawng awh han, telah na ti awh dawkvah, nangmouh teh na yawng awh han. Kaimouh teh, karang poung lah ka kâcui awh han na ti awh dawkvah, nangmouh na ka pâlei e teh a rang awh han. ¹⁷ Nangmouh ni monsom hoi mitnout khom patetlah thoseh, monsom e mitnout patetlah thoseh, na o awh nahan, buet touh ni na pakhi pawiteh, 1,000 touh na yawng awh vaiteh, panga touh ni na pakhi awh pawiteh, thong hra touh na yawng awh han. ¹⁸ Hatei, BAWIPA ni nangmouh koe hawinae sak hanelah na ngaihawi han. Lungmanae tawn hanelah, tawm lah ao han. Bangkongtetpawiteh, BAWIPA teh, lanna Cathut lah ao. Cathut Jehovah ka ngaihawi e pueng teh, yawhawinae ao.

Cathut ni a taminaw yawhawî a poe han

¹⁹ Oe Jerusalem vah kho ka sak e Zion kho-canaw, nangmouh teh na khuikap aw h mahoe h toe. Nangmae hramki lawk Bawipa ni a thai toteh, nangmouh na pahren aw h han. ²⁰ BAWIPA ni nangmouh hah runae vaiyei hoi rektapnae tui na poe aw h eiteh, nange kacangkhaikungnaw teh a hnukkhu bout kâhrawk aw h mahoe h toe. Amamae mit hoi amamae kacangkhaikungnaw hah a hmu aw h han. ²¹ Nang teh avoilah na kamlang nah, hoehpawiteh, aranglah na kamlang nah, hetteh lamthung doeh, hete lamthung daw k dawn haw, telah na hnuk lahoi dei e lawk hah na thai han. ²² Hatdawkvah, tangka pukhluk e nange meikaphawk hoi, sui pukhluk e nange meikaphawknaw hah koug raphoe vaiteh, hotnaw pueng teh kakhin e napon patetlah takhoe vaiteh, cet leih, telah ti pouh aw h han. ²³ Bawipa ni, talai daw k nang ni na kahei e cati hanelah kho teh a rak sak han. Talai a pawhik daw k hoi e vaiyei teh a pungdaw sak han. Hote hnin daw kvah, nange saringnaw teh, ka kaw e hmuen koe a hrampa aw h han. ²⁴ Talai daw k thaw ka taw k e maito hoi lanaw nihai, cuekkarue hoi para hoi karue teh pâsei tangcoung e rawca dueng a ca aw h han. ²⁵ Imrasangnaw a tip aw h teh, kalenpounge kâtheinae hnin navah, karasang e monnaw hoi, karasang e monrui kaawm e pueng daw k tui ka lawng e palangnaw ao han. ²⁶ BAWIPA ni a taminaw e rawknae hah a pathoup pouh vaiteh, ama ni runae a poe h h m a hah a kahma sak toteh, thapa e angnae teh kanî e angnae patetlah ao vaiteh, kanî e angnae

hai hnin sari touh e angnae patetlah let sari touh a ang han.

Cathut ni Assiria runae a poe han

²⁷ Khenhaw! BAWIPA e a min teh, ka kang e a lungkhueknae hoi kingkahmawt e hmaikhu naw hoi ahlanae koehoi a tho. Bawipa e a pahni teh, lungkhueknae hoi a kawi teh, a lai teh kamtawi e hmai patetlah ao. ²⁸ Bawipa e a kâha haiyah, rawknae hoi ram pueng karue teh pâsei hane hoi lam ka phen sak e pahni moumrui hah taminaw e pahni dawk moum hanelah, lahuen totouh ka phat e sawkca palang patetlah ao han. ²⁹ Pawitonae tangmin e patetlah sak hane la thoseh, Isarelnaw e talung lah kaawm e Cathut e mon koe vovit tum laihoi cei e patetlah lunghawinae lung hai thoseh nangmouh koe ao han.

³⁰ BAWIPA ni amae lentoe lawk hah na thai sak han. Puenghoi a lungkhueknae hoi hmaito hmaipalai thungvah, kho kanan e kho, kahlî hoi roun hoi amae kut thasainae hah na hmu sak han. ³¹ Bongpai hoi runae a poe toteh, Assirianaw teh BAWIPA e lawk dawk puenghoi a puen aw h han. ³² BAWIPA ni ahnimae van vah a toung e sonron ni vaivai touh a hem e tangkuem teh, ratoung hoi tâbaw lawk hoi cungtalah ao han. Taran tuknae koe kahek e senehmaica hoi ahnimanaw hah a tuk han. ³³ Bangkongtetpawiteh, kahrawng lae naw teh, yampa hoi sut a rakueng toe. Atangcalah, hot hah siangpahrang hanelah a rakueng toe. Thing hoi hmai hoi pâeng nahanelah hmuen adungsak

teh a pakaw toe. BAWIPA e a kâha teh, gan hmai palang patetlah a kamkai sak han.

31

Cathut ni Jerusalem a ngue han

¹ Kabawpnae coe nahanelah Izip ram lah cei teh, marangnaw kâuepkhai teh, taran tuknae rangleng moi ao dawk thoseh, athakaawme marangransanaw moikapap ao dawk thoseh, hotnaw hah kâuepkhai teh, Isarelnaw e kathounge Bawipa hah khen hoeh. Bawipa Jehovah hah tawng laipalah kaawm e tami teh yawthoe lah ao awh. ² Hatei, Bawipa nang teh, lungangnae ao dawkvah, ahnimouh koevah, runae a pha sak. Ama e lawk hah takhoe laipalah, tamikathoutnaw e avanglah hai thoseh, yonnae kasaknaw kabawm e naw koe lahai thoseh a thaw han. ³ Izipnaw teh Cathut nahoe, tami roeroe doeh. Ahnimae marang hai muitha nahoe, tak roeroe doeh. BAWIPA ni a kut hah a dâw toteh, ka bawm e tami teh kamthui vaiteh, kabawp e tami teh a rawp han. Ahnimouh pueng teh cungtalah rawknae koe a pha awh han. ⁴ Bangkongtetpawiteh, sendek hoehpawiteh, sendektanca ni amamouh ni a kei e moi dawk a huk navah, tukhoumnaw ni hramki laihoi pâlei ei nakunghai a taki hoeh e patetlah hrawang lawk dawk a kalue hoeh e patetlah ransahu BAWIPA nihai, Zion mon dawk hote monrui dawkvah taran tuk hanelah, hot patetlah a kum han. ⁵ Tava ni a awt e patetlah Rasahu BAWIPA ni Jerusalem hah a ngue han.

Ngue vaiteh a rungngang han. Pasai vaiteh a rungngang han.

⁶ Oe Isarelnaw, nangmouh ni thouk na taran aw h e Bawipa koe bout ban aw haw. ⁷ Bangkongtetpawiteh, hote hnin dawkvah, nangmouh hanelah, namamae kut hoi na thuk aw h e namamae sui kutsak, hoi namamae ngun meikaphawk naw hah tami pueng ni a ceitakhai aw h han. ⁸ Assiria tami ni hai, tongpa e tahloi nahoe h e tahloi hoi a due han. Tami rumram e tahloi hoe h e tahloi hoi thei lah ao han. Ahni teh tahloi daw k hoi hlout vaiteh, ahnie thoundounnaw teh, san lah ao aw h han. ⁹ Ahni hai a taki daw kvah amae a rapanim hloilah ahlanae koe a yawng han. Khobawinaw ni mitnout hah a hmu aw h toteh, a lung a pout aw h han telah, Zion mon daw k hmai ka tawn niteh, Jerusalem vah takhuen ka tawn e BAWIPA ni ati.

32

Kâhatnae siangpahrang

¹ Khenhaw! Siangpahrang buet touh ni lanna e hoi a uk han. A kut rahim e bawinaw ni hai lanna e hoi a uk aw h han. ² Tami buet touh teh, kahlî a tho nah kânguenae patetlah thoseh, thingyei yaw n daw k e palang patetlah thoseh, ngawt taw nnae koe lungsong e a tâh lip patetlah thoseh ao han. ³ Kahmawtnaw e mit kacaipanlah a hmu aw h han. Ka thai e tami pueng ni hai a hnâ a pakeng aw h han. ⁴ Lungtawtnae lung hoi ouk ka kâroe e ni hai a thaipanuek han. A lawk ka patak e ni hai kamcengcalah a dei thai hanelah coungkacoe

ao. ⁵ Tamipathu hah ka talue e telah thoseh, a lai kathout kamhnawng e hah bari kaawm e tami telah thoseh, bout kaw mahoe h toe. ⁶ Bangkongtetsawiteh, Cathut laipalah tawksak nahanelah, BAWIPA e kong hah laithoe lah dei nahanelah, vonhlamrincinaw e lungngai pakuep pouh laipalah paktha nahane hoi, tui kahran e hah tui pânei hoeh nahanelah, tamipathu ni pathunae hah a dei teh, ahnie lungthin ni yonnae sak hanelah a pouk ⁷ A lai kathout kamhnawng naw hanelah senehmaica teh yonnae hah doeh. Mathoenaw e kâheinae teh thuem pawiteh, mathoenaw hah laithoe lahoi raphoe nahanelah, ahni ni kathoute pouknae hah ouk a pouk. ⁸ Hatei, ka talue e taminaw niteh, ka talue e pouknae hah a pouk teh, ka talue e naw hah a kangduekhai. ⁹ Awpawp kaawm e napuinaw, thaw awh haw. Kaie lawk hah thai awh haw. Mahoima lungkayouk e napuinaw, ka lawk hah thai awh haw. ¹⁰ Mahoima lungkayouk e napuinaw, nangmouh teh hnin touh, kum touh thung na pâyaw awh han. Bangkongtetsawiteh, misurpaw khinae a pâpout awh han. A paw khinae tue phat mahoe h. ¹¹ Awpawp kaawm e napuinaw, taki hoi pâyaw awh haw. Mahoima lungkayouknaw, khohna rading teh, tawngtai lah o hnukkhu, buri hah kâyeng awh haw. ¹² Talai kahawi laikawknaw hoi a paw kara e misurkung hanelah, lungtabue ratum awh. ¹³ Pâkhing tangdunnaw ni a yawngyen e ka taminaw e talai hane hoi kamthang e kho thung hoi lunghawinae hoi kakawi e im pueng hanelah a tho. ¹⁴ Siangpahrang im teh ceitakhai lah ao

teh, tami alumnae kho teh hnoun lah ao toe. Imrasang hoi onae imnaw teh, sarang khu lah a yungyoe ao teh, la kacuetnaw hoi tunaw ni hrampanae hmuen lah ao han. ¹⁵ Kalvan hoi Muitha hah maimouh van a awi teh, ramke teh talai kahawi patue nahane kahawicalah a coung teh, talai kahawi lawhmuen teh ratu telah ti hnin totouh ao han. ¹⁶ Hattoteh lannae teh kahrawngum vah ao vaiteh, lannae teh talai kahawi lawhmuen dawk a yungyoe ao han. ¹⁷ Lannae ahawinae teh, lungmawngnae lah ao teh, lannae ni a thokhai e teh, a yungyoe roumnae hoi lungmawngnae lah doeh ao. ¹⁸ Ka taminaw hai roumnae hmuen, lungmawngnae hmuen hoi duem kâhatnae naw dawk ao aw h han. ¹⁹ Hatei, ratu teh talai dawk rep a tabo teh, kho hai talai hoi sue touh lah a rawk toteh, rounnaw a bo han. ²⁰ Tui onae hmuen pueng koe cati kahei vaiteh, maito e khok hoi la khok naw ka tha e nang teh na yawhawi aw h.

33

Kabawp nahan ratoumnae

¹ Raphoenae kâhmo laipalah ouk ka raphoe e hoi dumnae kâhmo laipalah ouk ka dum e naw teh, a yawthoe aw h. Nang ni na raphoe hnukkhu, nama hai raphoenae na kâhmo han. ² Oe BAWIPA kaimouh hah na pahren haw. Kaimouh ni nang teh na ring aw h. Amom karawitawi kaimae kut, runae kâhmo toteh kaimae rungngangkung lah aw m haw. ³ Ransanaw e lawk kecu daw k taminaw teh a

yawng awh. Bawipa nang na thaw toteh, mi-phunnaw teh koung a kâkayei awh. ⁴ Nangmae hnopainaw teh samtongnaw kamkhueng e patetlah lawp lah na o awh han. samtongnaw a kâtawm teh a cawkdawk awh e patetlah hotnaw e van vah a kâtawm awh vaiteh a yawng awh han.

⁵ BAWIPA teh tawm lah ao. Bangkongtet-pawiteh, a rasangnae hmuen koe ao teh, Zion kho hah kângingnae hoi lanna hoi a kawisak. ⁶ Bawipa teh nange tueng dawk na caknae, rungngangnae hnopai, lungangnae hoi panue-nae lah ao han.

⁷ Khenhaw! Ahnima ransanaw teh, lamthung dawkvah a hram awh. Lungmawngnae laiceinaw teh a khuika awh. ⁸ Lamthungnaw teh kingdi. Lamthung dawk kahlawng ka cet e awm hoeh. Lawkkam hah a raphoe awh toe. Khonaw hai a hnoun awh toe. Tami hah banglahai ngâi awh hoeh. ⁹ Ram teh a cingou teh, ayawmyin lah ao han. Lebanon kahrawng teh yeiraiponae hoi remke lah ao. Sharon hmuen teh kahrawngum patetlah ao. Bashan hoi Karmel mon dawk e thingkungnaw teh peng a sarut han.

Bawipa ni a tarannaw kâhruetcuetnae a poe

¹⁰ BAWIPA ni a dei e teh, atu kai ka thaw han. Atu kamahoima ka kâtawm han. Atu kai teh tawm e lah ka o han. ¹¹ Nangmouh teh, cahik na vawn awh vaiteh, cakong hah na khe awh han. Nangmae kâha teh, hmai lah ao teh, namamouh na kak awh han. ¹² Taminaw ni thungtalung hah hmai a raawng e patetlah thoseh, pâkhingkungnaw a bouk teh hmai a

phum e patetlah thoseh ao han. ¹³ Ahlanae koe e taminaw, kai ni ka sak e naw hah panuek awh haw. A hnainae koe e taminaw, kaie thaonae hah panuek awh haw.

¹⁴ Zion kho e tamikayonnaw teh a taki awh. Cathut laipalah e taminaw teh, a tâlueng awh. Maimouh dawkvah, apimouh ka kang e hmai hoi kaawm thai han. Maimouh dawkvah, apimouh a yungyoe e hmai hoi kaawm thai han. ¹⁵ Kalan lah ka cet niteh, kalan lah ka dei e, rektapnae lahoi hmu e hnopai hah a panuet teh, tadawngghno hah dâw hane hlak teh a kut kahek e, thi palawng hane pouknae hah tarawi hoeh nahanlah amae hnâ hah ka tabuem e, kathout hnonaw khet hoeh nahanelah, a mit ka tabuem e, ¹⁶ hote tami teh a rasangnae koe a tahung han. Ahnie a kâuepnae teh, talungmon ramvengim lah ao han.

Hmalah hane ngaihawinae

¹⁷ Na mit ni siangpahrang e meihawinae hah hmawt vaiteh, ahlanae koe e ram hai a hmu han. ¹⁸ Na lungthin ni taki ka tho e hah letlang a pouk toteh, ka parei e tami teh nâmouh ao va. Ka khing e tami teh nâmouh ao va. Imrasangnaw ka parei e tami teh nâmouh ao va. ¹⁹ Ka pathu e miphun, thai thai hoeh e lawk hah vaptivaptap lah ka pan niteh, panue thai hoeh e lawk ka pan e miphun hah na hmawt mahoe toe. ²⁰ Pawitonae kho Zion kho hah khenhaw! Khom buet touh boehai puen hoeh e, rui buet touh boehai ka pet hoeh e, kampuen thai hoeh e rim ti e, lungmawngnae im Jerusalem kho hah, nangmouh ni namamae mit hoi na

hmu aw h han. ²¹ Hote hmuen koe ka lentoe e BAWIPA teh, kakaw e palangnaw e hmuen lah ao han. hote hmuen koe tuisamlanae kaawm e long cet thai mahoe h. Atha kaawm e long hai cet thai mahoe h. ²² Bangkongtetpawite h, BAWIPA teh maimae lawkcengkung lah ao. BAWIPA teh maimae kâlawnaw kapoekung lah ao. BAWIPA teh maimae siangpahrang lah ao teh, maimou h hah na rungngang han. ²³ Nange long hninaw arui athawk teh, hote hnikhomnaw hah kacaklah kawm thai hoe h, hni hai kadai thai hoe h. Hatnavah, hmu e hnonaw hah kêrei aw h han. Khokkhemnaw ni patenghai lawp e hnonaw hah bout a lawp aw h han. ²⁴ Haw kaawm e buet tou h ni boehai, kai ka pataw, telah dei aw h mahoe h. Hote hmuen koe kho ka sak e pueng teh, yon ngaithoum lah ao aw h han.

34

Cathut ni a tarannaw runae a poe

¹ Oe! ramnaw, na thaithai aw h nahanlah hnai aw h haw. Oe! Miphunnaw, thai aw h haw! Talai hoi talai daw k kaawm e hno puenghai those h, talai van hoi talai van thung kaawm e hno puenghai those h thai aw h nase h. ² BAWIPA teh miphun pueng koe a lungkhue k dawkvah, a lungphuennae a hue teh ahnimae ransabawinaw koe a pha. Ahnimanaw hah raphoe vaite h, theinae koe a poe han. ³ Ahnimou h thung hoi thei lah kaawm e ronaw hah alawilah tâkhawng dawkvah, hote ronaw daw k hoi a hmuikawk teh, ahnimae thi hoi monnaw teh a kamyaw t. ⁴ Kalvan e hnonaw puenghai a hmawn teh,

kalvan teh cahna kalawng e patetlah kalawng lah ao. Hote kalvanlae hnonaw teh misur hna ka king e patetlah thoseh, thaibunglung dawkh oi a paw ka sarut e patetlah thoseh a sarut awh han.

⁵ Bangkongtetpawiteh, kaie tahloi teh, kalvan vah pâsu vaiteh, Edom ram dawkh thoseh, kai ni thoebo e taminaw lathueng lawkcengnae hoi a kum han.

⁶ BAWIPA e tahloi teh thi a boum toe. Athaw, tuca hoi hmaeca e thi, tutan e kuen thâwnae hoi thâw sak toe. Bangkongtetpawiteh, Bozrah kho dawkh thuengnae paw i ao teh, Edom ram dawkh puenghoi kâtheinae ao.

⁷ Sakraknaw teh ahnimouh hoi cungtalah a rawp awh han. Maitotancanaw teh maitotanpui hoi reirei a rawp awh han. Ahnimae talai teh thi a boum teh, ahnimae vaiphu hai athaw hoi akawi han. ⁸ Bangkongtetpawiteh, BAWIPA dawkh runae poenae hnin, Zion kho hane kecu dawkh moipathungnae kum lah ao.

⁹ Hote ram thung e palang tuinaw teh kattaya patetlah thoseh, haw e vaiphu teh gan patetlah thoseh, a kâthung vaiteh, hote ram pueng teh hmai ka kang e kattaya lah ao han.

¹⁰ Karum khodai hmai roum mahoe. Hote ram hmaikhu teh, pou a khu han. Hote ram teh mipun catoun totouh tami kingdi vaiteh, nâtuek hai hote ram hah tami ni raka boi mahoe toe.

¹¹ Mataw hoi kawrangnaw ni hote ram teh ao nah awh han. Bukbunaw hoi vonganaw hai hote ram dawkh ao awh han. Hote ram dawkh kâsanunae rui hoi hrawnghrang e bangnueae a payang sin han. ¹² Hote uknaeram dawkh e bawinaw hoi kâkuen lah, hote ram hah ram doeh telah ka kaw e tami hote ram dawkh awm mahoe.

Hote ram dawk e bawi kacue kanaw pueng teh ahrawnghrang lah ao awh han. ¹³ Ahnimae siangpahrang innaw dawk pâkhingkungnaw hoi, ahnimae ramvengimnaw dawk pâkhing hoi benyetnaw a pâw han. Kahrawnguinaw hrampanae hmuen, tavakalauknaw onae hmuen lah ao han. ¹⁴ Ramke um e sarangnaw teh kahrawnguinaw hoi reirei ao han. Athanaw ni hai buet touh hoi buet touh lawk a kâpan awh han. Hote hmuen koe karum lae tavanaw ni hai amamouh kâhatnae hmuen a pâphawng awh han. ¹⁵ Tahrûn ni hai hote hmuen koe tabu tuk vaiteh, tadui tadui vaiteh, a ca a khe toteh, amae a tâhlip dawk a tabo sak han. Matawnaw nihai, hote hmuen koe kamkhueng awh vaiteh, buet touh hoi buet touh âvâ a kâyawng awh han. ¹⁶ BAWIPA e a Cakathoung hah khen awh nateh, touk awh. Hotnaw thung dawk hoi buet touh boehai ceitakhai e awm mahoeh. Buet touh boehai hui tawn laipalah awm mahoeh. Bangkongtetpawitech Bawipa e lawk dawk hottelah ati. Bawipa e Muitha ni hai ahnimanaw hah a pâkhueng sak. ¹⁷ Bawipa ni ahnimouh hanelah cungpam a rayu teh, a kut hoi rui a payang teh, ahnimanaw hah a rei. Ahnimouh ni hote ram hah a yungyoe râw lah pang awh teh, miphun catoun totouh hote ram dawk ao awh han.

35

Man e naw bout a ban han

¹ Ramke hoi ka ke e talai teh a lunghawi awh han. Ayawn hai a lunghawi vaiteh, a kamhlawng

han. ² Puenghoi kamhlawng vaiteh, lunghawinae hoi la saknae hoi a lunghawi aw h han. Ahni ni Lebanon mon e bawilennaehai thoseh, Karmel mon hoi Sharon hmuen meihawinaehai thoseh, poe lah ao han. Ahni teh BAWIPA e lentoenaeh, maimaeh Cathut e bawilennaeh hah a hmu aw h han. ³ Tha ka baw e kutnaw hah tha aw m sak aw h. Pouk ka ca e khokpakhu hah caksak aw h. ⁴ Lung ka tâsue e naw na lung tha aw m sak aw h. Taket aw h hanh aw h telah tet aw h. Kenhaw! Nangmaeh Cathut teh moipathungnaeh, Cathut e runaeh poenaeh hoi a tho han, nangmouh na rungngang han. ⁵ Hat toteh, mitdawnaw ni mit bout hmawt aw h vaiteh, hnâpangnaw ni hnâ bout a thai aw h han. ⁶ Khokkhemnaw ni sayuk patetlah a doukcouk aw h han. Lawkanaw ni hai la a sak aw h han. Bangkongtetpawiteh, ramke um vah tui puk tâcawt vaiteh, thingyeiyawn daw k tui a lawng han. ⁷ Kâan poung e thingyei teh, tuikamuem lah ao aw h han. Ka ke e talai teh tuiphuek lah ao han. Kahrawnguinaw a inae lungpum yueng lah marangpho a paw han. ⁸ Hote hmuen koe lamthungpui aw m vaiteh, thoungnaeh lamthung telah a phung aw h han. Kathounghoehe naw teh, hote lamthung daw k dawn aw h mahoeh. Hote lamthung teh, hote lamthung daw k ka dawn naw e lah ao teh, a pathu aw h nakunghai lam phen a mahoeh toe. ⁹ Hote hmuen daw k bangpatet e sendek hai aw m mahoeh. Ka matheng e sarang buet touh boehai hote lamthung daw k luen aw h mahoeh. Ratang e naw ni duengdoeh hote lamthung teh a dawn aw h han.

¹⁰ BAWIPA ni a ratang e naw teh bout tho aw h vaiteh, la sak laihoi Zion kho daw k a kâen aw h han. A yungyoe lunghawinae teh ahnimae lû daw k ao han. Ahnimouh teh lunghawinae hoi lungnawmnae tawn aw h vaiteh, lungmathoenae hoi cingounae teh a yawng aw h han toe.

36

Sennacherib ni Judah a tuk teh a lawp

¹ Hezekiah siangpahrang a bawinae kum 14 nah Assiria siangpahrang Sennacherib ni Judah ram kacakpoung e pueng hah a tuk teh a lawp. ² Hathnukkhu Assiria siangpahrang, Rabshakeh hah ransanaw moikapap hoi Lakhish kho hoi Hezekiah onae Jerusalem vah a patoun. Hote ransabawi a tho teh, kapâsukung e laikawk teng kaawm e lamthung lamtung e tuiim teng vah a kangdue. ³ Hat toteh, Hilkiyah capa Eliakim, cakathutkung Shebna hoi Asaph capa Joab cayin kuenkung tinaw teh ahni koe a cei aw h. ⁴ Rabshakeh ni ahnimouh koe a dei e teh, Hezekiah siangpahrang koe bout dei pouh aw h. Ka lentoe e siangpahrang, Assiria siangpahrang ni nang teh bangpatet e kânguenae nama hettelah totouh na kâuep va. ⁵ Taran tuk thainae lamthung hoi tithainae kai koe ao na ti teh, ahrawnghrang lawk hah na dei. Kai taran hanelah apimouh na kâuep va. ⁶ Khenhaw! Nang teh lawtkâkhoe e lungpum sonron tie Izip ram nahoehmaw na kâuep hah vaw. Hot ni teh ka kâuepnaw e kut hah a ruk pouh han. Hethateh, ama ka kâuep e naw pueng koe Izip siangpahrang Faro ni a kamnue sak e doeh.

⁷ Nang ni, kaimae BAWIPA Cathut doeh ka kâuep aw h na tetpawiteh, Hezekiah teh, hete thuengnae khoungroe hmalah duengdoeh a baw k han, telah Judah khocanaw hoi Jerusalem khocanaw hah dei pouh nateh, hote Cathut e karasang hmuen puenghoi thuengnae khoungroe pueng hah a takhoe toe nahoehmaw. ⁸ Atu kaie bawipa Assiria siangpahrang hoi lawkkam sak leih. Nang ni marang ransa kakhoutlah na ta thai e nah boi pawiteh, marang 2,000 touh na poe han. ⁹ Nang ni taran tuknae marangnaw hane hoi marangransanaw hanelah, Izip ram hah na kâuep nakunghai, kaie bawipa e a thaw katawknaw thung daw k kathoungpounge patenghai bangtelamaw a tuk thai han vaw. ¹⁰ Hothloilah kai teh, BAWIPA e kâ laipalah hete ram raphoe hanelah ka tho hoeh. Hete ram heh BAWIPA ni raphoe loe telah kai koe a dei toe telah ati telah atipouh.

¹¹ Hat toteh, Eliakim, Shebna, hoi Joab tinaw ni kaimouh ni ka thai thai aw h nahanlah Aramaih lawk lahoi na dei pouh haw. Rapan daw k kaawmnaw ni a thai thai aw h nahan, Judah lawk lahoi dei hanh loe telah Rabshakeh koe ati pouh aw h. ¹² Hatei, Rabshakeh ni, ka bawipa ni nangmouh hoi nangmae bawipa koe doeh hete lawk dei hanelah na patoun. Amamae ei ka cat niteh, amamae payungtui ka net e rapan daw k kaawm e naw koe dei hanelah nahoe h atipouh.

¹³ Hathnukkuh, Rabshakeh ni a kangdue teh Judah lawk lahoi kacaipounglah hram laihoi a dei e teh, ka lentoe e Assyria siangpahrang ni a dei e lawk teh thai aw h haw. ¹⁴ Siangpahrang

ni hettelah a dei. Hezekiah ni nangmouh na dum hanh naseh. Bangkongtetpawiteh, ahnin ni nangmouh na rungngang thai mahoe.

¹⁵ BAWIPA ni doeh na rungngang tih. Hete kho teh Assyria kut dawak phat mahoe telah ati teh, nangmanaw hah BAWIPA na kâuep aw h nahanlah kâ poe aw h hanh. ¹⁶ Hezekiah e lawk hah ngâi aw h hanh. Assyria siangpahrang ni a dei e teh, kai hoi cungtalah roumnae aw m sak aw h. Kai koe tho aw h. ¹⁷ Ka tho vaiteh, nangmanaw hah, namamae ram hoi kâvan e, cai, tui, misurtui apapnae koe, vaiyei hoi misur takha apapnae koe na thak hoehroukrak, namamae misur paw lengkaleng cat aw h nateh, namamae tuikhu tui hah lengkaleng net aw h. ¹⁸ Hezekiah ni, BAWIPA ni maimouh na rungngang han doeh telah a dei e lahoi na dum aw h nahanh seh. Ram pueng teh Assyria siangpahrang kut dawak hoi amamae ram hah a rungngang aw h maw. ¹⁹ Hamath ram hoi Arpad kho cathutnaw teh nâne. Ahnimouh ni Samaria ram hah ka kut dawak hoi a rungngang aw h maw. ²⁰ Hete ram pueng e cathutnaw hlakvah, bangpatet e cathut maw amae ram hah ka kut dawak hoi ka rungngang thai han. Jerusalem kho hah Jehovah ni ka kut dawak hoi bangtelamaw a rungngang thai han telah a ti. ²¹ Hatei, ahni hah pato aw h hanh aw h telah siangpahrang ni ati dawkvah, apinihai pato laipalah lawkkamuem lah ao aw h. ²² Hat toteh, Hilkiyah capa siangpahrang im ka ring e Eliakim, cakathutkung Shebna, Asaph capa cunpam kakhoekung Joab tinaw teh, Hezekiah koe a cei aw h teh, amamae khohna a phi aw h

teh, Rabshakeh ni dei e lawk hah ahni koe a dei pouh awh.

37

Hezekiah ni Isaiah koe kabawpnae a hei

¹ Hezekiah siangpahrang ni hote lawk hah a thai toteh, amae angki a phi teh, buri a kâkhu teh, BAWIPA e im thung a kâen. ² Hat toteh, buri ka kâkhu e im karingkung Eliakim, cakathutkung Shebna, hoi kacue e vaihmanaw hah Amoz capa profet Isaiah koe a patoun. ³ Ahnimouh ni, Hezekiah siangpahrang ni het-telah a dei, sahnin teh runae, yuenae, hoi yeiraiponae hnin doeh. Camo khe tue a pha navah, khe thai nahane tha awm hoeh. ⁴ Na BAWIPA kahring Cathut dudam hanelah, ahni-mae bawi lah kaawm e Assyria siangpahrang ni a patoun e Rabshakeh e lawk hah Jehovah na Cathut ni thai naseh. Na Cathut Jehovah ni a thai e lawk patetlah yue na lawiseh. Nang ni hai kacawiraenaw hanelah patuen ratoum loe ati pouh.

⁵ Hezekiah e a sannaw teh Isaiah koe a pha awh toteh, ⁶ Isaiah ni, nangmae na bawipa koe hettelah dei pouh awh. BAWIPA ni Assyria siangpahrang e sannaw ni kai hah na dudam awh teh, na thai e lawknaw dawkvah taket hanh. ⁷ Kai ni ahni thung muitha buet touh ka thum pouh vaiteh, ahni ni kamthang buet touh a thai toteh, amamae ram koelah bout a ban han. Hathnukkhu, a ram thung e tahloi hoi ka due sak han ati telah a dei.

⁸ Hathnukkhu Assyria siangpahrang teh Lakhish kho hoi a tâco toe tie Rabshakeh ni a thai teh a ban navah, siangpahrang ni Libnah kho a tuk e hah a hmu. ⁹ Atuvah Kush siangpahrang Tirhakah hoi kâkuen lah, ahni teh nang tuk hanelah a tho toe telah kamthang a thai. Hottelah kamthang a thai toteh, Hezekiah siangpahrang koe patounenaw a patoun teh, ¹⁰ nangmouh ni Judah siangpahrang Hezekiah koe hettelah na dei awh han. Jerusalem kho teh Assyria kut dawc phat mahoe telah na kâuep e Cathut ni na dum hanh naseh. ¹¹ Khenhaw! Assyria siangpahrangnaw ni khoram tangkuem a raphoe awh teh, hotnaw koe a sak e naw hah na thai toe. Ahni teh ka hlout na ou. ¹² Ka mintoenaw ni a raphoe e miphun, Gozan, Haran, Rezeph, Telassar kho kaawm e Eden miphunnaw hah ahnimae cathutnaw ni a rungngang awh maw. ¹³ Hamath siangpahrang, Arpad siangpahrang, Sepharvaim kho e siangpahrang, Hena siangpahrang, Ivvah siangpahrang tinaw teh nâne ao awh telah lawk a thui.

Hlout nahanelah Hezekiah ratoumnae

¹⁴ Hezekiah siangpahrang ni patounenaw kut dawc hoi ca hah a la teh a touk. Hahoi, BAWIPA e im dawc a cei teh, BAWIPA hmalah ca hah a kadai. ¹⁵ Hatnavah, Hezekiah siangpahrang teh BAWIPA koe a ratoum. ¹⁶ Cherubim e lathueng vah ka tahung e Isarelnaw e Cathut, ransahu BAWIPA Cathut, nang teh talai uknaeram pueng lathueng vah buet touh dueng e Cathut lah na o. Nang ni kalvan hoi talai na sak. ¹⁷ Oe BAWIPA, na hnâpakeng nateh na thai pouh haw. Oe

BAWIPA, na mit padai nateh khenhaw! Sennacherib siangpahrang ni kahring Cathut dudam hanelah a patoun teh a dei sak e lawknaw hah thai haw. ¹⁸ Oe BAWIPA, Assyria siangpahrangnaw ni miphunnaw hoi amamae ram naw hah kingkadi lah a ta teh, ¹⁹ ahnimae cathutnaw hai hmai dawk a phum pouh. Bangkongtetpawiteh, hotnaw teh cathut nahoe. Tami e kut hoi sak e thing hoi talung naw doeh. ²⁰ Oe kaimae Cathut Jehovah, nang dueng doeh Cathut lah na kaawm tie hah, talai uknaeram pueng ni a panue aw hanelah, hote siangpahrang kut daw hoi, kaimanaw hah a tu na rungngang haw telah a ratoum.

Sennacherib e rawpnae

²¹ Hattoteh Amos capa Isaiah ni Hezekiah koe a patoun teh, Isarelnaw e Cathut Jehovah ni hettelah a dei. Nang ni Assyria siangpahrang Sennacherib hoi kâkuen lah kai koe na ratoum toe. ²² Hote siangpahrang hoi kâkuen lah Cathut ni hete lawk hah a dei. Tanglakacuem Zion canu ni nang hah na noutna hoeh teh na dudam toe. Jerusalem tangla ni na hnuk lahoi a lû a kahek toe. ²³ Nang ni apimouh na dudam teh na pacekpahlek vaw. Nang ni apimouh na hram sin teh, na minhmai na moun sin. Isarelnaw e Kathounge koe hottelah na sak aw h toe. ²⁴ Na sannaw e kut hoi Cathut hah na dudam aw h teh, kai teh ka tawn e ranglengnaw hoi monsom vah thoseh, Lebanon mon a poutnae koe thoseh, ka luen toe. Hawvah ka rasang poung e sidarkungnaw hoi kahawihloe e hmaicakungnaw hah ka tâtueng toe. A rasangpoungnae koe thoseh, a

paw a thawnae ratu koe thoseh ka kâen toe. ²⁵ Tuikhu ka tai teh tui ka nei toe. Ka khoktabei hoiyah Izip ram e palang kaawm e pueng kahak sak toe telah na dei. ²⁶ Ayan hoi hetnaw heh kai ni sut ka pouk tangcoung toe tie na thai boihoeh maw. Nang ni kacakpounge kho rapannaw hah na raphoe teh, songnawng kâpawppawm e lah na o sak nahanelah, atu ka sin e naw hah ayan hoi sut ka hmoun toe. ²⁷ Atha ka baw e hote khocanaw teh, a lungpout laihoi yeirai a phu aw h teh, kahrawng e phonaw patetlah thoseh, a len hoehnahlan tang kamyai e lempu e phokung patetlah thoseh, ao aw h. ²⁸ Na tahungnae, na ceinae, na thonae, na kâennaе, na tâconae, koe na lungkhueknae naw hah ka panue. ²⁹ Nang teh kai koe na lungkhuek daw k thoseh, namahoima na kâuepnae hah ka hnâ koe a tho daw k thoseh, kai sumhradang teh na hnawng dawkvah thoseh, kaie pahni moumnae teh na pahni dawkvah thoseh, ka mawp vaiteh, na thonae lam daw k hoi na ban sak han.

³⁰ Nang hanelah mitnout teh hettelah ao. Takum dawkvah amahmaw k ka paw e naw thoseh, a kum pahni vah hot daw k hoi ka pâw e naw hai thoseh na ca han. A kum pâthum vah, kahei nateh a aw h. Misurnaw hah patue aw h nateh, a paw hah cat aw h. ³¹ Kacawie Judahnaw teh, a tangpha bout payang aw h vaiteh, asawi lah a pâw a paw aw h han. ³² Bangkongtetpawiteh, kacawie naw teh Jerusalem kho hoi thoseh, kahlout e naw teh Zion mon daw k hoi thoseh, a tâco aw h han. Cathut e a lungthonae teh hetenaw hah a sak han.

³³ Hatdawkvah, Cathut ni Assyria siang-pahrang hoi kâkuen lah hettelah a dei. Ahni teh hete kho dawk kâen mahoeh. Hete hmuen koe pala hai ka mahoeh. Bahling hoi hete kho hai hnai mahoeh. Hete kho avanglah na tungpup awh mahoeh. ³⁴ Hete kho koe a thonae lam dawk hoi a ban han. Hete kho thung kâen mahoeh. Cathut ni a dei e teh, ³⁵ Kai ni hete ka minhmai hoi ka san Devit e minhmai hah ka khet teh, hete kho rungngang hanelah, hete kho hah ka ring han, telah a ti.

³⁶ Hat toteh, BAWIPA e kalvantami a tâco teh Assyria ransahu thung e tami 185,000 touh a thei. Amom toteh a thaw awh navah, ahnimanaw teh ro lah ao awh. ³⁷ Assyria siangpahrang Sennacherib hai a tâco a ban teh, Nineveh kho dawkvah ao. ³⁸ Hathnukkhu, ahni teh, amae cathut Nisroch Bawkim dawk a bawk lahun nah, ahnie capa Adrammelek hoi Sharezer tinaw ni tahloi hoi a thei awh. Hahoi teh, ahnimanaw teh Ararat mon lah a yawng awh. Hat toteh, capa Esarhaddon teh a na pa e hmuen dawk a tahung.

38

Hezekiah patawnae hoi damnae

¹ Hatnae hninnaw dawkvah, Hezekiah teh meimei kadout lah a pataw. Hatnavah, Amoz capa Isaiah ahni koe a tho teh, hettelah ati pouh: BAWIPA ni hettelah a dei. Nang teh na hring mahoeh toe. Na due han toung dawkvah, na imthungnaw hah lawk thui lawih, atipouh. ² Hattoteh Hezekiah teh tapang koelah a kangvawi teh, BAWIPA koe, ³ Oe! BAWIPA, kai

teh Bawipa na hmalah yuemkamcunae hoi ka lungthin abuemlah kho ka sak e hoi na hmalah hnokahawi ka sak e hah na pouk pouh haw, telah a ratoum. Hathnukkhu, Hezekiah siangpahrang teh puenghoi a khuika.

⁴ Hahoi, BAWIPA e lawk teh Isaiah koe bout a tho teh, ⁵ nang teh Hezekiah siangpahrang koe cet nateh, na pa Devit e Cathut Jehovah ni hettelah a dei. Nange ratoum lawk teh ka thai toe. Nange mitphi hai ka hmu toe. Nange hringnae daw kum 15 touh ka thapsin han. ⁶ Nang hoi hete kho hah Assyria kut daw k hoi ka hlout sak han.

⁷ Hethateh, BAWIPA ni ka sak roeroe han titeh lawk a kam e, nang hanelah BAWIPA e mitnoutnae doeh. ⁸ Khenhaw! Ahaz e kanîsuimilam daw k a tâhlip lakhout hra touh hnuklah bout ka ban sak han ati. Ati e patetlah kaloum tangcoung e a tâhlip lakhout hra touh hnuklah bout a ban.

⁹ Judah siangpahrang Hezekiah ni a patawnae koehoi bout a dam hnukkhu a thut e ca hateh, ¹⁰ muengmueng ka o navah, ka due han doeh toe. Kaawm rae hringnae ka coe hoeh toe telah ka ti. ¹¹ BAWIPA teh ka hmawt mahoe h toe, kahringnaw onae koe BAWIPA teh ka hmawt mahoe h toe ka ti. ¹² Tukhoumkung e rim patetlah kai ka onae im hah beng a sawn awh teh, yout a la awh toe. Hni ka kawng e ni a kalawng e patetlah kahringnae hah kalawng lah ao teh, hnikawngnae daw k hoi kai teh na takhoe han toe. Hnin touh hoi kai hah na poutsak awh han toe. ¹³ Kaie ka hrunaw hah sendek patetlah a khoe, kai teh amom ditouh duem ka o. Hnin

touh hoi rum touh thung dawk kai teh poutnae koe na phakhai. ¹⁴ Pingpit patetlah kahram teh bakhu patetlah ka cingou. Kahlun lah ka khet boteh, ka mit a tha a tawn. Oe Bawipa, runae thouk ka kâhmo dawkvah, kai hanelah hloutnae amahkhan lah awm haw ka ti. ¹⁵ Bangtelamouh ka dei han toung. Bawipa ma ni na dei pouh e patetlah ama ni a sak toe. Ka muitha ni a khangnae dawkvah, kai teh paiyaica hoi doeh kahring nathung lam ka cei han toe. ¹⁶ Oe Bawipa, hot patet e hnonaw hoi doeh taminaw teh a hring aw. Hotnaw daw doeh ka muitha teh a hring. Bawipa, nang ni kai hah na dam sak nateh, na hring sak haw. ¹⁷ Puenghoi ka khangnae teh, kai hanelah hawi nahane doeh. Bawipa nang ni na lungpataw dawkvah, rawknae koehoi na rasa toe. Bawipa, nang ni kaie yonnae pueng hah hnuk lah na tâkhawng pouh toe. ¹⁸ Bangkongtetpawiteh, phuen niteh, nang koe lunghawilawk dei thai hoeh. Tami kadout ni nang na pholen thai hoeh. Tangkom daw ka bawt e ni nange yuemkamcunae hah ngaihawi thai hoeh. ¹⁹ Kahring e, kahring e ni dueng doeh, sahnin kai ni lunghawilawk ka dei e patetlah lunghawilawk a dei. Na pa ni canaw koe nange yuemkamcunae hah a cangkhai. ²⁰ BAWIPA ni na rungngang han lah coungkacoe ao. Hatdawkvah, kahring nathung hnintangkuem vah, BAWIPA e im dawkvah, rui thueng e naw hah ka kueng han.

²¹ Hathnukkuh, Isaiah ni, thaibunglung paw abuem hah sin aw. h nateh, a hmâ daw ramuk pouh aw. Siangpahrang teh bet a dam han atipouh. ²² Hezekiah siangpahrang nihai, BAW-

IPA e im dawk kai ka luen nahanelah bangpatet e mitnout maw kaawm telah a pacei.

39

Babilon ram hoi ka tho e laicei

¹ Hatnae tueng navah, Babilon siangpahrang, Baladan capa Merodakbaladan ni Hezekiah siangpahrang teh damhoehnae koehoi bout a dam toe tie a thai navah, ca hoi poehno a sin sak teh laicei a patoun. ² Hezekiah teh a lunghawi poun dawkvah, amae sui kuemnae hoi sui, ngun, hmutui, apu kaawm e satui, senehmaica hmouknae, hoi hnopai hmouknae dawk kaawm e hno pueng hote laiceinaw hah a patue. Ama e imthung e kaawm e hoi a ram thung e kaawm e naw hah a patue hoeh e awm hoeh. ³ Hat toteh, profet Isaiah ni, Hezekiah siangpahrang koe a cei teh, hete taminaw ni bangmaw a kâhei aw. Ahnimanaw heh nâhoi maw nang koe a tho aw telah a pacei navah, Hezekiah siangpahrang ni, ahnimouh teh, ahlanae koe e ram Babilon hoi a tho aw, telah ati.

⁴ Hathnukkhu, nange im thung e hno bangmaw ahnimouh ni a hmu aw toun, telah bout a pacei navah, im thung e hno pueng koun a hmu aw toe. Hno hmouknae thung hoi ka patue hoeh e hno banghai awm hoeh, bout atipouh.

⁵ Hat toteh, Isaiah ni, ransahu BAWIPA e lawk hah thai haw. ⁶ Nange im thung kaawm e puenghoi, sahnin ditouh mintoenaw ni a hmouk aw e pueng hah, Babilon kho lah a phu aw nahane hnin teh ka phat han. Bang hno ca boehai cawi mahoe. BAWIPA ni ati. ⁷ Nang

ni na khe e na canaw hoi na catounnaw hai koug hrawi awh vaiteh, ahnimouh teh, Babilon siangpahrang hanlah tuenlanaw lah ao awh han, telah Hezekiah koe a dei pouh. ⁸ Hezekiah ni, atangcalah kai dawg lungmawngnae hoi roumnae ao han doeh telah Isaiah koe atipouh navah, Isaiah ni, na dei e BAWIPA e lawk teh ahawi doeh telah atipouh.

40

Ngaihawinae lawk

¹ Lungpahawi awh, ka taminaw hah lungpahawi awh haw, telah nangmae Cathut ni a ti. ² Tarantuk thaw na tawknae tueng akupe toe. Nange yon hai ngaithoum toe telah Jerusalem kho koe lawkkanem lahoi dei awh nateh, oung pouh awh haw. ³ Ramke dawg Oung pouh e teh, BAWIPA e lamthung teh rasoun awh. Thingyeiyawn dawg maimae Cathut e lamkalen teh sak awh. ⁴ Ravo kaawm e pueng paten awh nateh, monnaw hah tanghling sak awh. Ukuk kacoum e lamthungnaw hah kânging sak nateh, duradiduradup e naw hah kâpi sak awh. ⁵ BAWIPA e bawilennae kamnuek vaiteh, tami pueng ni a hmu awh han. Bangkongtetpawiteh, BAWIPA ni a dei toe.

Cathut e lawk teh a kangning

⁶ Hote lawk ni hramkhai haw ati navah, kai ni bangmouh ka hramkhai han ka ti pouh navah, tami pueng teh phokung lah doeh ao. Ahnimae hawinae pueng hai kahrawng e a pei patetlah doeh ao. ⁷ BAWIPA e a kâha ni a kanawi toteh,

phokungnaw teh a kamyai awh teh, a peinaw hai a sarut awh. Atangcalah, taminaw teh phokung lah doeh ao awh. ⁸ Phokung teh a kamyai teh, a pei hai a sarut. Maimae Cathut lawk teh a yungyoe a kangning a ti. ⁹ Zion mon dawk kamthang kahawi kasinkung, ka rasang e mon dawk luen haw. Jerusalem vah kamthang kahawi kasinkung, puenghoi hramkhai haw. Taket hanh. Na Cathut hah kenhaw! telah Judah khonaw koe dei pouh haw. ¹⁰ Kenhaw! Bawipa Jehovah teh thaonae kut hoi tho vaiteh, amae kutbuembue ni ama hanelah a uk han. Ama e tawkpheu teh ama ni a thokhai han. Ama e kutphu hai a hmalah ao. ¹¹ A tuhunaw hah tukhoumkung patetlah kaww vaiteh, tucanaw hah a kut hoi tawm vaiteh, a tawm han. A ca kanaw kaawm e tunaw hai paiyai hoi a hrawi han.

Isarel Cathut teh bang hoi hai bangta thai lah awm hoeh

¹² Tuinaw hah amae kuttabei hoi ka bangnue e, kalvan hah a kut hoi ka pakhap thai e, talai van e vaiphunaw hah yawcu kxingnae daww ka hrueng thai e, monnaw hah yawcu hoi ka kxing niteh, monruinaw hah kxinglung hoi ka kxing thai e teh api nama. ¹³ BAWIPA e Muitha hah apinimaw a bangnue thai han. Apimaw ama hoi kâpan niteh, ama hah ka panuek sak. ¹⁴ Bawipa ni api hoi maw a kâpan teh, ahni ni Bawipa hah a thai panuek sak thai vaw. Apinimaw Bawipa hah a cangkhai teh, lamthung hah a patue teh, a thai panuek nahanelah ka dei pouh vaw. ¹⁵ Miphunnaw teh sikrei daww hoi padekca e

patetlah ao teh, yawcu dawk e vaiphuca patetlah doeh ao. Khenhaw! Tuilumnaw teh, mungpoung e patetlah doeh ao. ¹⁶ Lebanon mon teh hmai patawi nahanelah khout hoeh. Hote mon dawk kaawm e moithangnaw hai hmaisawi thueng nahanelah khout hoeh. ¹⁷ Khoram pueng hai Bawipa e hmalah teh, banghai bang hoeh e patetlah ao teh, banghai bang hoeh e hlah hai a thoungca e patetlah ao awh teh, ahrawnghrang patet lahai ao awh. ¹⁸ Hatdawkvah, Cathut hah api hoi maw bangnue han. Bawipa hah bang hoi maw bangnue han. ¹⁹ Meikaphawknaw teh, kasakkung ni sui puk a hluh teh, ngundingyin hai ouk a sak pou awh. ²⁰ Pasoumhno poe thai hoeh hane totouh, ka roedeng e tami niteh, kahmawn thai hoeh e thing hah a kârawi teh, kâroe thai hoeh e meikaphawk sak hanelah, kasakthaie naw hah ouk a tawng awh. ²¹ Na panuek awh hoeh maw. Apuengcue hoi nangmouh koe dei awh hoeh maw. Talai pek a pâw hoiyah na thaipanuek awh hoeh maw. ²² Talai kamhluem e van vah ka tahung niteh, talai van kaawm e taminaw teh awsi patetlah ao awh. ²³ Ukkung bawinaw hah banghai bang hoeh lah a coung sak teh, talai lawkcengkungnaw hah ahrawnghrang lah a coung sak. ²⁴ Atangcalah ahnimouh hah patue hoeh. Atangcalah ahnimae cati hai kahei hoeh. Atangcalah ahnimae khawngyang teh talai daw kâung hoeh. Ahnimouh hah phohmu toteh ahnimouh teh, bongparui ni cahik patetlah a palek awh han. ²⁵ Hottelah pawiteh, Kai teh api hoi maw a kâvan na ti awh han vaw telah

kathounge Bawipa ni a ti. ²⁶ Nangmae na mit naw hoi kahlun lah kenhaw. Hete hnonaw hah apinimaw a sak. Hote Bawipa ni teh hotnaw pueng hah koung a parei thai. A min lahoi koung a kaw thai. A thasai teh, bahu hoi a kawi dawkvah, buet touh boehai kahmat mahoe. ²⁷ Ka ceinae lamthung teh BAWIPA ni a hro. Ka coe hane kawi hai Cathut ni banglahai ngâi hoeh telah Oe Jakop miphun ni bangkongmaw na dei awh. Oe Isarel miphun bangkongmaw na dei awh. ²⁸ Na panuek hoeh maw. Na thai boihoeh maw. Jehovah teh a yungyoe kangning e Cathut, talai pout ditouh kasakkung Cathut lah ao. A tâwn tie awm hoeh. A patang tie awm hoeh. Bawipa e panuenae hoi thaipanueknae teh apinihai tawng thai hoeh. ²⁹ Bawipa ni ka tâwn e naw hah tha a poe teh, tithainae ka tawn hoeh e naw hah tithainae a poe. ³⁰ Nawsainaw teh a tâwn awh vaiteh, a tha a baw awh han. Camonaw hai kamthui awh vaiteh, a tâlaw awh han. ³¹ BAWIPA ka ngaihawi e naw teh, thaonae a katha hoi a kawi awh han. Matawnaw patetlah amamae rathei hoi kahlun lah a kamleng awh han. A yawng awh toteh patang awh mahoe. A ceio awh to hai tâwn awh mahoe.

41

Taket hanh, Kai teh nang koe ka o

¹ Oe tuilumnaw, a hmalah sairasuep lah awm awh. Taminaw ni tha hoi bout kawi awh naseh. Rek hnai awh naseh, lawk dei awh naseh. Lawkcengnae koe kahnaicalah tho awh naseh. ² Kanîtholah hoi tami buet touh hah

apinimaw a kangdue sak, apimaw lannae koe a khok rahim vah a kaw. Apinimaw a hmalah miphun hah a poe teh, siangpahrangnaw e lathueng vah lawk a ceng sak. Apinimaw vaiphu patetlah a tahloi koe a poe teh, cahik kahli ni a palek e patetlah apinimaw licung koe a poe. ³ Apinimaw ahnimanaw hah a pâlei teh, a khok hoi a coungroe boihoeh e lam dawk hoi a yawngtahrei. ⁴ Apinimaw hete hnonaw hah a sak teh, miphunnaw hah a kamtawngnae koehoi a kaw vaw. Kai Jehovah, ahmaloe poung e hoi a hnukteng poung e koe kaawm e kasakkung teh kai doeh. ⁵ Tuilumnaw ni a hmu aw hawh teh a taki aw hawh. Talai poutnae naw teh a pâyaw aw hawh. Rek a hnai aw hawh teh, a kamkhueng aw hawh. ⁶ A imri buet touh hoi buet touh a kâkabawp aw hawh teh, tha kâlat nateh na taranhawi sak aw hawh telah tha a kâpoe aw hawh. ⁷ Kutsakkathoum e ni suihlunkathoum e hah tha a poe. Cakkin hoi ka pacai e nihai, sum ka dêi ni teh kahei ka pacawng e tami hanlah ahawi atipouh. Ahnimouh ni hote meikaphawk hah a kâroe hoeh nahanlah sum hoi kacaklah a het aw hawh. ⁸ Hatei, nang Isarel, ka san, kai ni na rawi e Jakop, ka hui Abraham e catoun, ⁹ Kai ni nang teh talai poutnae koehoi ka kut hoi na sawn teh, ahlapoungnae hmuen koehoi na kaw teh, nang teh kaie thaw ka tawk e lah na o. Kai ni nang teh na rawi toe. Kai ni nang teh na pahnawt hoeh. ¹⁰ Taket hanh. Kai teh nang hoi rei ka o. Na lungpuen hanh. Kai teh na Cathut lah ka o, tha na o sak han. Na kabawp han. Lawkkamcaknae aranglae ka kut hoi na tawm han. ¹¹ Nang koe a lung ka khuek

e naw teh, yeiraipo awh vaiteh, minhmai a kaya awh han. ¹² Nang na katuknaw hah na tawng hai na hmawt mahoe h toe. Nang hoi taran ka tuk e naw teh ayawmyin patetlah ahrawnghrang patetlah ao awh han. ¹³ Bangkongtetpawiteh, nange Jehovah na Cathut ni nang hanelah, na lungpuen hanh, na kabawp han ati teh, nange aranglae kut hah a kuet. ¹⁴ Oe Tangraet Jakop, miphun kathoengcae Isarel, taket hanh. Kai ni na kabawp han. Nang karatangkung teh, Isarelnaw e kathounge Bawipa lah ao telah BAWIPA ni a ti. ¹⁵ Kenhaw! Cangkatinnae seh katha, kahran e, hâ ka tawn e lah na counsaks awh han. Monnaw hah katin vaiteh kâbawng sak han. Monruinaw hah cahik patetlah ao sak han. ¹⁶ Na hut awh vaiteh kahlî ni ahnimanaw hah a palek awh han. Cakho ni hai a palek awh han. Nang teh BAWIPA daw k na lunghawi han. Isarelnaw e kathounge Bawipa hah na lentoesak awh han. ¹⁷ Ka mathoe e hoi kavoutthoupnaw ni tui a tawng awh teh a hmu awh hoe h dawkvah, tui a kahran awh toteh, Kai BAWIPA ni ahnimouh hah ka pato han. Isarelnaw e Cathut Jehovah lah kaawm e Kai ni ahnimanaw hah ka pahnawt mahoe h. ¹⁸ Arasangnae cailum hmuen koe palangnaw thoseh, ayawnnaw lungui vah tuiphueknaw thoseh, ka tâco sak han. Kahrawng thingyei hah tuikamuem lah ka counsaks vaiteh, ka ke e talai hah palang lah ka counsaks han. ¹⁹ Thingyei um vah sidar thing, anri thing, tuihan thing hoi olive thingnaw hah ka ung han. Kahrawngum dawkvah, hmaica thing, saipres thing, kongkang thingnaw hah ka pâw sak han. ²⁰ Hettelah hoi

BAWIPA e kut ni hete hnonaw hah a sak teh, Isarelnaw e kathounge Bawipa ni hotnaw a sak tie hah, hmawt aw h vaiteh, panuek aw h vaiteh, pouk aw h vaiteh, a thaipanuek aw h han doeh. ²¹ Nangmae hno ka tâcawt e hah pâpho aw h haw telah BAWIPA ni ati. Kacake kapanuekkhaikung hah na patue aw h haw telah Jakop miphun e siangpahrang ni a ti. ²² Ka tâcawt hane naw hah pâpho aw h nateh, dei aw h naseh. Ka pouk aw h vaiteh, ka panue thai aw h nahanelah, yampa e naw hah dei aw h naseh. Hoehpawiteh, ka tâcawt hane naw hah kaimouh koe dei aw h naseh. ²³ Nangmouh teh cathutnaw lah na o aw h e ka panue aw h nahanelah, ka tâcawt hane naw hah dei aw h haw. Kaimouh teh buet touh hoi buet touh kâkhet teh, ka taki aw h nahan kahawi e hoehpawiteh, kahawihoehe hnonaw hah dei aw h naseh. ²⁴ Khenhaw! Nangmouh teh ayawmyin doeh toe. Nangmae na tawksak aw h e hai ahrawnghrang hlak a rahnoum. Nangmouh na ka rawi e teh panuet a tho. ²⁵ Buet touh hah atung lahoi ka tâcosak vaiteh, ahni teh a tho han. Kanîtholah hoi buet touh a tho vaiteh, ahni ni ka min hah a kaw han. Hlaamkabokung ni amhru hah a katin e patetlah ahni ni bawinaw hah amhru patetlah a katin han. ²⁶ Kaimouh ni ka panue aw h nahan, bokheiyah sut ka ti aw h nahan, ahmaloe hoi apinimaw a dei boi. Ka dei e awm hoeh. Ka pâpho e awm hoeh. Hothloilah nangmae lawk hah ka thai boi e buet touh hai awm hoeh. ²⁷ Kai teh Zion kho hah khenhaw! haw o ho hmaloe ka tet e lah ka o. Kamthang kahawi ka dei hane tami hai Jerusalem lah ka

patoun. ²⁸ Hatei, ka khet navah buet touh boehai awm hoeh. Bout dei hanelah ahnimanaw hah ka pacei torei teh, ahnimouh thungvah, kâpankhaikung buet touh boehai awm hoeh. ²⁹ Khenhaw! Ahnimouh pueng teh dумыennaе buet touh duengdoeh kaawm. Ahnimouh ni a tawksaknae hai yawmyin doeh. Ahnimouh ni a hlun aw h e meikaphawk hai kahlî hrawnghrang lah doeh ao.

42

BAWIPA ni a san a rawi

¹ Khenhaw! kai ni ka tawm e ka san, ka lungkuepkhai teh, ka rawi e san doeh. Ka Muitha hah ahni van ka patue han. Ahni ni lannae hah miphunnaw koe a thokhai han. ² Ahni teh, hramki mahoe h. Oung mahoe h. Ahnie lawk hai lamthung daw k apinihai thai mahoe h. ³ Coungroe e lungpum hah khoe hoeh, hmai ka taw k e hmaiim hah padout hoeh. Lannae hah yuemkamcunae hoi a thokhai han. ⁴ Talaivan vah lannae phung a kangdue sak hoehroukrak, a thayoun mahoe h, a lungpout mahoe h. Ahlanae koe kaawmnaw ni hai ahnie kâlawk hah a ngaihawi aw h han.

⁵ Kalvan ka sak nite h, talai hoi talai thung kaawm e pueng ka sak e, talai van kaawm e naw hah kâha hai those h, talai van lam kacetnaw hah muitha hai those h, ka poe e, Cathut Jehovah ni a dei e teh, ⁶ kai teh Jehovah doeh. Kai ni nang hah lannae lahoi na kaw vaite h, na kut daw k hoi na hrawi han. ⁷ Nang ni mit ka dawnnaw e mit na hmu sak thai nahane hoi, paung lah kaawm

e naw hah thongim thung hoi thoseh, hmonae koe ka tahung e naw hah hmonae thongim thung hoi thoseh, rasa tâcokhai hanelah, taminaw hoi lawkkam e lah thoseh, miphunnaw hanelah angnae lah thoseh, nang hah kai ni na ta toe. ⁸ Kai teh Jehovah doeh. Hothateh, kaie ka min doeh. Kai bawilennae hah apihai thoseh, kai ni ka coe e pholennae hah meikaphawknaw hai thoseh, ka poe hoeh. ⁹ Yampa e hnonaw teh a loun toe. A katha e hnonaw hah atu ka pâpho. Hotnaw a tâco hoehnahlan vah, nangmouh sut na thai sak.

BAWIPA pholennae la

¹⁰ Tui dawk ka cet kaawm e naw hoi ahlanae koe ramlouk lah kaawm e naw, BAWIPA koe la katha sak awh. Ahni hah talai apoutnae koehoi pholen awh. ¹¹ Kahrawngum hoi hot thung e kho kaawm e pueng, hoi Kedar kho kaawm e taminaw pueng ni pholen awh naseh. Sela kaawm e naw pueng ni monsom vah hram laihoi lunghawi laihoi la sak awh naseh. ¹² BAWIPA e bawilennae kamnue sak laihoi, tuilum apoutnae koe a lungmanae teh pholen awh. ¹³ BAWIPA teh athakaawme tami patetlah a tâco teh, ransa patetlah a taran ahawî. Tânae hoi a hram teh, a tarannaw hah a tâ.

BAWIPA kabawp lawkkamnae

¹⁴ Kai teh atueng kasawlah duem ka o. Kai teh duem ka o teh, ka taminaw hah ka pato hoeh. Atuteh, camo ka khe e napui patetlah kahram han. Hongho hongho kâha vaiteh, ngawt ka tawn han. ¹⁵ Monnaw hoi monruinaw ka

raphoe han. Thingkung ramkungnaw puenghai ka ke sak han. Tuipuinaw hai tuilumnaw lah kacounsak vaiteh, talinaw pueng hai kahaksak han. ¹⁶ Mit kadawnnaw hah a panue aw h hoe h e lam daw k hoi ka thak vaiteh, a panue aw h hoe h e lamthung daw k lam ka patue han. Ahnimae hmalah hmonae hah angnae lah kacounsak han. Lamthung tangkomnaw hah, ka kânging sak han. Hetnaw hah ka sak vaiteh, ahnimanaw hah ka hnoun mahoe h. ¹⁷ Meikaphawk ka baw k aw h nite h, meikaphawk hanelah, nang teh kaimae cathutnaw doeh katetenaw teh puenghoi kayak aw h vaiteh, hnuklah a kamlang aw h han.

Isarelnaw ni panuek thai aw h hoe h.

¹⁸ Hnâpangnaw thai aw h haw. Mitdawnnaw, na hmu thai nahanelah khenhaw. ¹⁹ Kaie ka san hloilah apimouh a mit ka dawn va. Ka patoun e laiceinaw patetlah apimouh a hnâ ka pang va. Kaie ka hui patetlah apimouh a mit ka dawn va. BAWIPA e san patetlah apimouh a mit ka dawn va. ²⁰ Ahni ni moikapap a hmu eiteh, kâhruetcuethai hoe h. A hnâkâko eiteh thai thai hoe h. ²¹ BAWIPA teh amae kâlawk rasangsak hane hoi a lentoesak hanelah, amae lannae daw k a lungyouk. ²² Hete miphun teh, tuk e hoi lawp e miphun lah doeh ao. Ahnimouh teh, tangkom daw k tangkam a kâman aw h teh, thongim daw k hro e lah ao aw h. Kahloutsakkung kaawm hoe h e lawp e lah ao aw h. Tuk teh lawp lah ao aw h navah, na poe leih telah ka tet hane awm hoe h. ²³ Nangmouh thung daw k apinang mouh hete lawk hah na ka thai aw h han va. Atu hoi hmalah te, apinang

mouh na ka thai awh han. ²⁴ Jakop teh tuk e hoi lawp e lah thoseh, Isarel hah kalawmkungnaw koe thoseh, apimouh ka hnawng va. Maimouh ni taran awh teh, ahni koe yonnae sak awh e BAWIPA ni nahoehmaw. Ahnimouh teh Bawipa e lamthung dawn awh hoeh. Bawipa e kâlawk hai tarawi awh hoeh. ²⁵ Hatdawkvah, puenghoi a lungkhueknae teh, ahnimouh lathueng a rabawk teh, takikatho e tarankâtuknae hah ahnimouh koe a pha sak. Ahnimouh tengpam vah hmai a sawi. Hateiteh, panuek awh hoeh. Amamouh hoi amamouh a kak awh. Hatei, pâkuem awh hoeh.

43

Isarel ratangnae

¹ Hatei, atuteh Oe Jakop nangmouh kasakkung hoi, Oe Isarel nangmouh kapâkhuengkung Jehovah ni telah ati, taket awh hanh, bangkongtetpawiteh na ratang awh toe, na min lahoi na kaw awh teh kaie lah doeh na o awh toe. ² Tui na raka awh nahaiyah nangmouh koe ka o vaiteh, tuipei na raka nahai na pâyawt awh mahoe. Hmai dawk na cei awh nakunghai na kang awh mahoe. Hmaipalai ni hai na kang awh mahoe. ³ Bangkongtetpawiteh, kai teh nangmae Jehovah na Cathut, Isarel Tami Kathoung, nangmouh ka rungngangkung doeh. Nangmouh ratang hanelah, Izipnaw koe na poe teh, Ethiopia hoi Sheba nangmae yueng lah ka poe. ⁴ Ka mithmu vah ka talue poung e lah na o awh teh, bari kawi e lah na o awh. Hatdawkvah, nangmouh na ban thai awh nahanelah tami

na poe vaiteh, na hringnae kâthung nahanelah tamihu na poe han. ⁵ Taket aw hah, nangmouh koe ka o, na catounnaw hah kanîtho koehoi ka thokhai vaiteh, kanîloumlah hoi ka pâkhueng han. ⁶ Atunglah pou thak aw hah ka ti vaiteh, akalah katek aw hah lawih telah ka ti pouh han. Ka capa hah ahlapoungnae koehoi thokhai aw hah, ka canu hah talai poutnae koehoi thokhai aw hah. ⁷ Ka min lahoi ka kaw e tami pueng hoi, ka lentoe nahanelah ka sak e tamipueng teh thokhai aw hah telah ka ti han. ⁸ Mit tawn eiteh mitdawnaw hoi hnâ tawn eiteh hnâpangnaw kai koe thokhai aw hah. ⁹ Miphun pueng hoi tami-maya hmuen touh koe kamkhueng aw hah naseh. Ahnimouh thung daw k apinimaw a pâpho thai teh, ayan e hno hah a hmu sak thai han. Lan sak lah o thai nahanelah, kapanuekkhaikung hah thokhai aw hah naseh. Telah hoeh nakunghai hnâ hoi thai aw hah nateh, hethateh lawkkatang doeh tet aw hah naseh. ¹⁰ Na panue aw hah teh na yuem thai aw hah nahanelah, kai teh ahni doeh tie na panue thai aw hah nahanelah, nangmouh teh kapanuekkhaikung hoi ka rawi e ka sannaw doeh telah BAWIPA ni ati. Ka hmalah sak e thung daw k bangpatet e cathut hai aw m hoeh, ka hnuk lahai aw m mahoe. ¹¹ Kai teh Jehovah doeh. Kai laipateh rungngangkung alouke aw m hoeh. ¹² Kama ni ka dei teh ka rungngang, na panue sak daw k nangmouh rahak cathut alouke roeroe aw m hoeh. Hatdawkvah, nangmouh teh kapanuekkhaikung lah na o aw hah telah BAWIPA ni ati. Kai teh Cathut doeh. ¹³ Ahnintha ao hoehnahlan kai teh ahni doeh. Ka kut

dawk hoi ka rungngang thaikung apihai awm hoeh. Ka sak hnukkhu apinimaw a rakhout thai han. ¹⁴ Isarelnaw e Kathoung Poug, nangmouh karatangkung BAWIPA ni telah a dei, nangmouh kecu dawk Babilon kho dawk ransa ka patoun, hottelah abuemlah hoi Khaldean taminaw, a lunghawinae long dawk kayawngnaw a ceikhai e patetlah na ceikhai awh. ¹⁵ Kai teh, Jehovah, nangmae Tami Kathoung, Isarel kasakkung, nangmae siangpahrang doeh. ¹⁶ Tuipui dawk lamthung ka sak niteh, athakaawme tuinaw dawk lamthung ka sak e, ¹⁷ athakaawme tami, rangleng hoi marangnaw ka cetkhai niteh, bout thaw thai hoeh nahanelah karawmsakkung, hmaim padue e patetlah karoumsakkung BAWIPA ni hettelah a dei, ¹⁸ hnuk lae naw bout pouk hanh lawih, ayan e naw na lungthin dawk tat aw hoi hanh leih. ¹⁹ Thai aw haw, hno katha ka sak han. Atu roeroe kamnue han. Nangmouh ni na panue katang han. Ramke lam ka sak vaiteh, thingyeiyawn dawk tui ka lawng sak han. ²⁰ Kahrawng e sarang, kahrawnguinaw, hoi kalaukva ni kai na bari han. Bangkongtet-pawiteh, ka rawi e taminaw ni a nei aw hane ramke vah tui ka poe teh thingyeiyawn dawk tui ka lawng sak. ²¹ Kama hanelah ka pâkhueng e taminaw ni ka pholennae a kamnue sak aw hoi han.

Yuemkamcu hoeh e Isarelnaw

²² Hateiteh Oe Jakop, nangmouh ni na kaw aw hoi hoeh. Oe Isarel, nangmouh ni kai na hmawtcei aw hoi. ²³ Hmaisawi thuengnae tu hah kai koe

na thokhai aw hoh. Thuengnae lahoi kai na pholen aw hoh. Hnopoena lahoi hnori na phawt sak boihoeh. Hmuitui hoi nangmanaw tha na tawn sak boihoeh. ²⁴ Hmuitui kacinge hah tangka hoi na ran pouh boihoeh, thuengnae sathei thaw hoi kai ka lung na kuep sak boihoeh. Yonnae phu phu hanelah thaw letlang na tawk sak, lam vah thoesaknae lahoi kai letlang na tawn sak aw. ²⁵ Kai kama roeroe ni doeh kama hanelah nangmae kâ na tapoena naw na takhoe pouh. Nangmae yonnae ka pouk mahoe toe. ²⁶ Na kapanuekkhaikung, pouk aw haw sei. Na lan aw nahanelah, na lawk dei aw haw. ²⁷ Hmaloe e na pa ni, yon a sak teh, laiceinaw ni kâtapoe laihoi kai na taran aw. ²⁸ Hatdawkvah, hmuen kathoung koe e kacuenaw, kakhin sak han, Jakop hah thoebo hanelah ka poe vaiteh, Isarelnaw pacekpahleknae khang hanelah ka pahnawt toe.

44

Isarelnaw koe Cathut yawhawinae

¹ Atuteh, ka san Jakop, ka rawi e Isarel thai haw. ² Nangmouh na kasakkung, von thung hoi na kasakkung, nangmouh kabawmkung lah kaawm e Jehovah ni hettelah a dei, Oe Jakop, ka san, kai ni na rawi e Jeshurun, taket hanh. ³ Bangkongtetpawiteh, tui kahrannaw koe tui ka awi han. Talai kaphui daw palangpui ka lawng sak han. Na catounnaw koe muitha ka awi vaiteh, na canaw koe yawhawinae ka poe han. ⁴ Hot patetlah, ahnimouh teh tui teng ka

pâw e sumpathing patetlah a dawn han. ⁵ Tami buet touh ni BAWIPA e tami doeh telah alouke ni Jakop min a kâphung han. Alouke ni Jakop e tami telah a kut dawk thun aw h vaiteh, Isarel min teh amamae miphun min lah a hno aw h han. ⁶ Isarelnaw e siangpahrang Jehovah ni karatangkung ransahu BAWIPA ni hettelah a dei, kai teh ahmaloe e lah ka o teh a hnukteng e lah ka o. Kai laipalah teh Cathut alouke roeroe aw m hoeh. ⁷ Ayan e taminaw kai ni ka kangdue sak hnin hoi kai ni ka sak e patetlah apimaw ouk ka pâpho. Hot patetlah, pâpho sak haw. Kai hanlah kaawm lahun e hno kaawm han rae hno heh kai koe kamphawng sak naseh. ⁸ Taket aw h hanh, puen hai puen aw h hanh. Hmaloe vah nangmouh koe ka dei teh na panue sak aw h toe. Kai hloilah Cathut ao maw. Oe, lungsong alouke roeroe aw m hoeh. Buet touh boehai ao tie ka panuek hoeh.

Meikaphawk baw e teh pathunae doeh

⁹ Meikaphawk kasaknaw teh, abuemlah hoi hno han kamcu hoeh e naw doeh. A sungren sak aw h eiteh, banglahai tho hoeh. Kaimouh teh ka hmawt thai aw h hoeh, ka panuek thai aw h hoeh tie kayanae hah amamouh ni a pâpho aw h. ¹⁰ Apinimaw cathut a sak. Apinimaw banglah ka tho hoeh e meikaphawk hah a sak. ¹¹ Kenhaw! a huiko pueng ni a kaya aw h han. Thaw katawkkungnaw hai tami kahring doeh. Abuemlah hoi kamkhueng nateh kangdout aw h naseh. Taket aw h vaiteh yeirai a po aw h han. ¹² Sum ka dêi ni cakâ ouk a dêi. Hmaisaaan daw k a phum teh a kut tha kâsanguekhai teh,

cakkin hoi a dêi. A vonhlam toteh a tha ouk a tawn. Tui a nei hoeh toteh tui a kahran. ¹³ Lettama ni rui a payang teh cacung hoi a ruen. Lettama hnopai hoi a sak hnukkhu imvan ao thai nahanlah kompa hoi a thut teh, tami mei hoi a kâvan nahanelah tami hoi mei kâvan lah a sak. ¹⁴ Sidar thing a tâtueng aw h teh, hmaica thing hoi saipres thing a la aw h teh, ratu daw k e thing buet touh teh a ham lah o nahanlah a cak sak. Sidar thing a ung aw h teh khotui ni a roun g sak. ¹⁵ Hathnukkhu hoi teh, tami hane thing lah doeh a tho toe. Thing lah a bet aw h teh, hmai a kamber aw h. Hmai a bet aw h teh vaiyei hai a pâeng aw h, cathut lah a sak aw h teh a baw k aw h. Hote thing hah meikaphaw k lah a sak aw h teh, hot hah tabo laihoi a baw k aw h. ¹⁶ Hote thing hah a tangaw n hmai a bet aw h, a tangaw n moi thaw ng nahanlah a hno aw h, moi a pâeng aw h teh kaboumlah a ca aw h. Hmai a kamber aw h teh huthutbet toe ati aw h teh, hmai hai ka hmu toe ati aw h. ¹⁷ Ka cawi e hai a la aw h teh, cathutkaphaw k lah a sak aw h. Hote meikaphaw k hmalah a tabo aw h teh a baw k aw h. Ahni koe a ratoum aw h, na rungngang haw, bangdaw kmaw kaie cathut nahoe hmaw, atipouh aw h. ¹⁸ Panuek aw h hoeh ni teh thaipanuek aw h hoeh. Bangkongtetpaw iteh, a hmu thai hoeh nahan a mit a tabuem pouh teh, a thai thai hoeh nahan a lungthin khik a khan pouh. ¹⁹ Hahoi apinihai pouk thai aw h hoeh, panuek thai aw h hoeh. Atangaw n teh hmai a bet aw h teh, hmaisaa n daw k vaiyei hai a pâeng aw h, moi hai a pâeng aw h teh a ca aw h. Ka cawi

rae naw teh panuetho e lah maw ao han toung. Thingtalong hah tabo laihoi bawk han na maw tie ka panuek e hoi ka thaipanuek e khoeroe awm hoeh bo toung aw. ²⁰ Hraba hoi kâkaw k teh dумыennaе lungthin hoi lam a payon aw h toe. Hatdawkvah a hringnae hah rungngang thai hoeh. Aranglae kut daw k hai laithoe ao tie panuek thai aw h hoeh.

Isarel teh pahnim hoeh

²¹ Oe Jakop, hote hnonaw teh pahnim hanh. Isarel hai pahnim hanh. Nangmouh teh kaie ka san doeh. Kai ni na sak e ka san doeh. Oe Isarel, nang teh ka pahnim e lah na awm mahoe h. ²² Kâtapoenae hateh, kathapoung e tâmai kâhin e patetlah ka kâhin sak han. Kai koe bout ban aw h leih, kai ni yo na ratang aw h toe. ²³ Oe kalvannaw lunghawi hoi la sak aw h. BAWIPA ni a sak toe. Nangmouh talai taminaw hram aw h haw. Monnaw, ratunaw hoi thingkungnaw hram nateh la sak aw h haw. Bangkongtetpawiteh, BAWIPA ni Jakop teh a ratang toe. Isarelnaw lah a lentoenae a kannue toe.

Judah bout thawng han

²⁴ Nang karatangkung BAWIPA, vonthung na ka sak e ni hettelah a dei, Kai heh Jehovah hnonaw pueng kasakkung, kalvannaw haiyah madueng lahoi ka sak niteh, kama dueng lahoi talai kapakawkung doeh. ²⁵ Kai ni a lai kathoutnaw e mitnoutnaw hai ka raphoe pouh. Khueyuenaw hai ka pathu sak, a lungkaangnaw kamlang sak teh, a panuenae pathu lah kacoungsakkung. ²⁶ Kai ni ka sannaw e lawk hah

ka caksak teh, ka patounenaw ni a dei e patetlah ouk ka sak. Jerusalem kho hanelah nang teh tami onae lah na o han telah thoseh, Judah kho hah sak lah na o han, ka rawk e naw hah pathoup lah ao han telah thoseh ka dei. ²⁷ Talîpui hai tui hak seh, nange palangnaw pueng ka hak sak han telah thoseh, ²⁸ Sairas siangpahrang hanelah nang teh kaie tukhoumkung doeh, kai ni ka ngai e pueng na kuep sak vaiteh, Jerusalem kho pathoup seh, Bawkim adu ung seh telah thoseh ka dei.

45

Sairas Cathut e hnopai

¹ BAWIPA ni satui a awi e Sairas miphun hah a hmalah tabut sak hane hoi, siangpahrangnaw e taisawm rading sak hane hoi, a hmalah tho paawng sak hane hoi, kalupnae longkha khan hoeh nahanelah, aranglae kut hoi ka man e koevah hettelah a dei. ² Kai ni na hmalah ka cei vaiteh, kânging hoeh e hah ka kânging sak han. Rahum longkha hah be ka raphoe vaiteh, tarenae thing hai be ka bouk han. ³ BAWIPA min ka kaw e Isarel Cathut lah ka o e hah na panue thai nahan, khohmo thung e râw hah na poe vaiteh, hro e hnopai hah na poe han. ⁴ Bangkoktetpawiteh, ka san Jakop hoi ka rawi e Isarelnaw kecu dawk ka min lahoi na kaw e a tho. Kai na panuek awh hoeh eiteh min na phung awh. ⁵ Kai teh Jehovah doeh, alouke khoeroe awm hoeh. Kai hoeh laipateh Cathut alouke roeroe awm hoeh. ⁶ Kai hloilah alouke khoeroe awm hoeh tie hah

kanîtho koehoi kanîloum totouh a panue thai aw h nahan, na panue aw h hoeh nakunghai, na keng na yeng pouh han. Kai teh Jehovah doeh alouke khoeroe aw m hoeh. ⁷ Angnae ka sak teh hmonae ka o sak, roumnae ka o sak, yawthoenae hai ka o sak, hete hnopueng ka sak e BAWIPA kai doeh. ⁸ Kalvannaw lathueng lahoi khorak sak haw, Tâmainaw lannae kho awi haw. Talai kamawng nateh rungngangnae hoi lannae paw aw h naseh. Kai Jehovah ni hottelah ka o sak. ⁹ Ama kasakkung ka taran e teh a yawkathout e lah ao. Talai hlaam thung daw k e hlaam rumram e ni, kasakkung koe bangpatet e lah maw na sak atipouh han maw. Hoehpawiteh, na kut ni a sak thai e bang hai na thoum e aw m hoeh ati han na maw. ¹⁰ A na pa koe bangpatet e maw na khe, a manu koe bangpatet e maw na vawn, ka tet e tami teh a yawthoe. ¹¹ Isarelnaw e Jehovah, Kathounge ni a dei e teh, ka tho hane hno hah kai koe het haw. Ka capanaw e kong hoi ka thaw taw k e kong daw k kê na poe aw h haw. ¹² Talai ka sak teh avan kaawm e tami ka sak. Ka kut hoi kalvan ka phai teh ransahu hah kê ka poe. ¹³ Ama teh lannae hoi ka kangdue sak teh, a lamthungnaw hah kalan sak han. Ka khopui hah a kangdue sak han. Thongim paung e ka taminaw hah aphu laipalah, taw kphu hai patho laipalah, cetsak naseh telah ransahu BAWIPA ni a ti.

BAWIPA amadueng rungngangkung

¹⁴ BAWIPA ni hettelah a dei, Izipnaw patetlah thawtawkkung hoi Ethiopia hno kayawtnaw hoi

Sabeawaw ka rasang poung e naw hah nangmouh koe a tho aw h vaiteh, na hnukkâbang e lah ao aw h han. Sumrui pâkhi laihoi a tho aw h han. Hottelah tabo nalaihoi barinae na poe aw h han. Cathut teh nangmouh koe ao katang doeh. Alouklah khoeroe aw m hoeh. Cathut alouke khoeroe aw m hoeh telah nangmouh koe kâheinae a sak aw h han. ¹⁵ Oe Isarel Cathut, rungngangkung ama lungpouk lahoi kâhrawk e Cathut roeroe doeh. ¹⁶ Yeiraipo hoi ao aw h han, abuemlah kayanae hoi ao aw h han. Meikaphawk kasaknaw hah pouknae aw m laipalah rei a cei aw h han. ¹⁷ Isarelnaw hah yungyoe hloutnae hoi BAWIPA ni a rungngang han. A yungyoe hoi a yungyoe totouh poutnae aw m laipalah kayayeirai aw m mahoe h toe. ¹⁸ Kalvan kasakkung BAWIPA ni ama teh Cathut, talai hai kasakkung lah ao. Ama ni talai hah a cak sak. Banglahai ka tho hoeh lah sak hoeh, tami o nahanelah a sak e doeh. Hettelah a dei, kai teh BAWIPA lah ka o, alouke khoeroe aw m hoeh. ¹⁹ Arulah hoi hmonae daw k lawk ka dei boihoeh. Ka rawi e Jakop miphun koe na tawng aw h ka tet pouh boihoeh. Kai BAWIPA ni lanna e lawk ka dei teh, kalan e lawk hah ouk ka dei. ²⁰ Kamkhueng aw h nateh tho aw h haw. Miphun ka kuep reknae daw k hoi ka hlout e naw, cungtalalah na hnai aw h haw. Thing meikaphawk kasaknaw, tami ka rungngang thai hoeh e, cathut koe ouk karatoumnaw ni panuenae roeroe tawn aw h hoeh. ²¹ Dei pouh aw h. Tâcawt sak haw. Pouknae kâpoe aw h naseh. Ayan hoi apinimaw a panue sak, apinimaw a dei pouh

boi. Kai BAWIPA ni ka sak e nahoehmaw. Kai laipalah Cathut alouke roeroe awm hoeh. Kalan e hoi rungngangkung Cathut lah ka o. Kai hoeh laipateh alouke roeroe awm hoeh. ²² Talai pout totouh kaawm e pueng hah khenhaw! rungngang e lah awm hoeh. Bangkongtetpawiteh, kai teh Cathut lah ka o, alouke khoeroe awm hoeh. ²³ Khokpakhu hoi tami pueng ni ka hmalah a cuengkhuem aw h han. Talai tami pueng ni ka hmalah thoe a kâbo aw h hoi lawk a kam aw h han. Lawk teh lannae hoi ka pahni daw k hoi a tâco vaiteh ban mahoe h toe. ²⁴ BAWIPA daw k dueng lannae hoi thaonae ao telah a dei aw h han. Ama koe a tho aw h vaiteh, ama koe a lung kakuep hoeh e pueng teh yeirai a po aw h han. ²⁵ Isarel ca catounnaw pueng BAWIPA daw k lannae lah o aw h vaiteh, BAWIPA teh a bawilennae lah ao han telah a ti.

46

Kadout e meikaphawk hoi ka hring Cathut

¹ Bel ni a lû a saling teh, Nebo a kârahnoum sak. Ahnimae meikaphawknaw teh, a khok pali touh e saring e van doeh a hung aw h. Na phu rumram hanelah doeh sak e lah ao teh, saringnaw ni nget ka tâwn lah a phu aw h.

² A kârahnoum aw h teh, rei a rawp aw h. Amamae hnokari kârungngang thai aw h hoeh. Amamanaw san lah letlang a ceikhai aw h.

³ Oe Jakop imthungnaw ka lawk thai aw h haw. Ka cawi rae imthungnaw, pek na khe hoi vonthung na o na hoi doeh kai ni na tawm toe.

⁴ Na matawng totouh hai na sam a po ditouh, kai teh hot patetlah e tami lah ka o teh, nangmanaw na tawm awh han, na sak awh e patetlah na ring awh vaiteh, na rungngang awh han.

⁵ Nangmouh ni api hoi maw na mei na kâla sak awh han. Api hoi maw na kâvan sak awh teh, api hoi maw na bangnue awh han.

⁶ Yawngya thung hoi sui moikapap rasa e patetlah ngun hai yawcu dawk a khing, sum kahlun e koe meikaphawk lah na sak sak awh teh, na tabo sin awh teh na bawk awh.

⁷ A loung dawk a hrawm awh teh, a ceikhai awh teh, amae hmuen dawk ouk a pâhung awh. Pou a kangdue teh, a onae hmuen koehoi kampuen mahoe toe. A kaw awh nakunghai lawk dei pouh thai mahoe. A rucatnae koehoi hai rungngang thai mahoe.

⁸ Oe lawk kaeknaw, hetheh pahnim awh hanh. Tongpa katang lah awm awh nateh, bout pouk awh.

⁹ Ayan e hno hah pahnim hanh awh. Bangkongtetpawiteh, Kai teh na Cathut lah ka o teh, kai hloilah Cathut alouke awm hoe. Kai hoi kâvan e awm hoe.

¹⁰ Kamtawngnae koehoi apout totouh thoseh, ayan hoi kaawm rah boihoe e hnonaw thoseh, ka dei teh ka pouknae a kuep han, ka ngai e pueng be ka sak han telah a ti.

¹¹ Kanîtholah hoi e ka matheng e tava, ahlanae hmuen koehoi ka pouk e hah ka kaw, yo ka dei e patetlah ka sak han.

¹² Lanna hoi ahla pounnae koe kaawmnaw ka lawk thai awh haw.

¹³ Kahnaicalah lannae ka thokhai han. Ahla poungnae koe kaawm mahoeh. Rungngangnae, lungmanae nihai, na ring mahoeh. Zion vah rungngangnae ka ta vaiteh, ka bawilenna Isarel hanelah ka hruék han.

47

Babilon yeiraiponae

¹ Oe Babilon canu tanglakacuem, kum nateh vaiphu dawk tahung haw. Oe Khaldean canu, bawitungkhung dawk laipalah, talai dawk tahung haw. Bangkongtetpawiteh, kanem e hoi kanaw e telah bout dei awh mahoeh toe.

² Sum hah lat nateh, cakang hah phawm haw. Minhmai ramuk hah hawng haw. Angkidung hah rading haw. Na hna hah na phai totouh kalim nateh, palang raka haw.

³ Nang teh, caici lah na o han, Yeirai na po han. Moi ka pathung vaiteh, apihai ka pasai mahoeh.

⁴ Maimouh na karatangkung min teh, ransahu BAWIPA, Isarelnaw e kathounge Cathut tie doeh.

⁵ Oe Khaldean canu, duem tahung nateh, hmonae koe kâenh. Bangkongtetpawiteh, nang teh Napui e uknaeram teh lah na kaw mahoeh toe.

⁶ Ka taminaw koe ka lungkhuek dawkvah, ka râw hah ka khin sak teh na kut dawk na poe. Nang ni na lungma hoeh. Katawngnaw koe hnokari na phu sak.

⁷ Kai teh siangpahrang lah pou ka o han telah na pouk dawkvah, hete hnonaw hah na pouk hoeh. Nang dawk a hnukteng ka phat hane hai bout na panuek hoeh.

⁸ Hatdawkvah, hringnawmnae dueng ka tawng niteh, pamda laihoi kaawm e, ma imthung dawk kai doeh toe, kai hoi kâvan e apihai awm hoeh. Lahmainu lah kaawm mahoe. Camo duenae ka khang mahoe ka tet e, atu thaw haw.

⁹ Hete hno kahni touh: camo duenae hoi lahmainu lah onae ni hnin hni touh, tawkkadek daw na tho sin han. Na onae hoi na kâringnae teh kapap nakunghai hotnaw teh nang koe puenghoi a tho han.

¹⁰ Bangtelamaw tetpawiteh, na hawihoehnae hah na kâuep teh, apinihai na hmawt hoeh na la ti. Na lungangnae hoi na panuenae ni na dum teh, kai doeh toe, kai hloilah alouke awm hoeh toe telah na lungthung hoi na ti.

¹¹ Hatdawkvah, nang koe thoenaeh teh a tho han. Nâhoi maw, a tho tie hah na panuek mahoe. Yawthoenae ni na tho sin vaiteh, hot teh na kahmat sak thai mahoe. Na panue thai hoeh e rawknae hah nang koe vaitalahoi a tho han.

¹² Na nawca hoi na tawk e na kâringnae hoi taânsinnae naw hah kangdoutkhai ka lawnh. Hawinae hmu hai na hmu yawkaw han, tâ hai na tâ yawkaw han doeh.

¹³ Nang teh, kâpankhaikung apap kecu daw ngawt na tâwn toe khe. Atuvah asikhetkathounaw hoi âsi karadounghaw, thapa khet lahoi ka dei thai e naw teh nang daw ka tho hane hno daw hoi kangdout aw h naseh. Nang hah atu na rungngang naseh.

¹⁴ Khenhaw! ahnimanaw teh, caphon patetlah ao aw h, hmaisawi lah ao aw h han. Hmai ka

kang e dawk hoi na rungngang thai aw h mahoe h. Ka bet sak e hmaisaa n aw h hoe h, kamben hane hmai aw m mahoe h.

¹⁵ Hot patetlah na taw k e hno teh nang hanlah ao han. Na naw nah hoi na pátung e hnonaw hah amamae lam daw k koug káva vaiteh, apinihai na rungngang thai mahoe h.

48

Isarel ni Cathut bawilennae a kamnue sak

¹ Oe Jakop imthung, Isarel telah min kaw e lah kaawm e, Judah tuikhu thung hoi ka lawng e Jehovah e min lahoi thoebo e, yuemkamcu hoe h e, a lawk hoi kamcu hoe h lah, Isarel Cathut min ka pholen e, ka lawk thai haw.

² Kathoung khopui taminaw telah amamouh a min a kâphung aw h teh, ransahu BAWIPA lah kaawm e, Isarel Cathut kakânguenaw, ka lawk thai aw h haw.

³ Ka aw m tangcoung e hnonaw hah, nangmouh koe ka dei toe. Ka pahni daw k hoi ka tâco sak teh, na thaisak aw h toe. Tang ka sak daw kvah a kuep aw h.

⁴ Bangkongtetpawiteh, a lung ka patak e tami lah na o aw h teh, na lahuen teh sumtaboung doeh. Na tampa teh rahum tampa doeh tie yo ka panue toe.

⁵ Ayan hoi doeh nangmouh koe ka dei toe. Hno a pha hoe hnahan na panue sak toe. Hatdawkvah, nang ni kaie meikaphawk teh na sak toe. Kai ni ka sakhlawn e meikaphawk, ka hlun e meikaphawk ni, hete hno a sak e doeh na ti payon aw h han.

⁶ Na panue awh toe. Hetnaw pueng heh kenhaw! namamouh ni na dei awh mahoe haw. Atu hoi teh hno katha na panue awh boihoe e, ka panuek e lah na o awh han.

⁷ Hotnaw teh atu doeh sak e lah ao. Sut la sak e nahoe haw. Nangmouh ni sahnin totouh na thai awh hoe haw. Hatdawkvah, nangmouh ni yo la ka thai awh toe na te payon awh vaih.

⁸ Na panuek roeroe awh hoe haw. Na thai boi awh hoe haw. Ayan hoi na hnâkâko awh hoe haw. Bangkongtetpawiteh, nang teh yuem na kamcu hoe haw. Vonthung hoi patenghai nang teh, kâlawk na ka tapoe e telah kaw e lah na o tie ka panue toe.

⁹ Koung na raphoe awh hoe haw nahanelah, ka min kecu daw k ka lungkhueknae teh, ka panguep han. Oup e lah ka o nahanelah, nangmouh daw k ka panguep han.

¹⁰ Kenhaw! na thoung sak awh toe. Hatei, ngun sôlêi e patetlah nahoe haw. Rucatnae tah-manghmai hoi na tanouk awh han.

¹¹ Kama hanelah kai ni na sak han rah. Ka min teh bangkong a mathoe han. Bawilennaeh teh tami alouke koe ka poe mahoe haw.

Cathut ni Isarel kawnae

¹² Oe Jakop hoi ka kaw e Isarel, Ka lawk thai awh haw. Kai teh Cathut doeh. Ahmaloe e hoi a hnukteng poung lahai ka o.

¹³ Ka kut ni talai du hah a ung. Aranglae kut hoi kalvannaw ka sak toe. Ka kaw teh hmuen touh koe a kamkhueng awh.

¹⁴ Koung kamkhueng awh nateh, thai awh haw. Nangmouh thung daw k hoi apinimaw hete

hnonaw hah a dei boi. BAWIPA a lung ka pataw e Babilon khopui daw k a ngainae a kuep sak han. A kut hah Khaldean taminaw koe a pha sak han.

¹⁵ Kai kama roeroe ni lawk ka dei. Ahni teh, ka kaw. Ka ceikhai vaiteh, a lamthung a cawn han.

¹⁶ Na hnai aw h nateh, hete lawk hah thai aw haw. Apuengcue hoi arulaho i lawk ka dei boi hoeh. Apuengcue hoi hawvah ka o toe. Atuvah, Bawipa Jehovah Cathut e Muitha ni kai hah na patoun toe.

¹⁷ Nangmanaw na ka ratang e, Isarelnaw e Kathoung Poung e BAWIPA ni a dei e lawk teh, kai heh nangmae Jehovah na Cathut, na hawi aw h nahanlah nangmouh na kacangkhaikung, na dawn aw h hanelah lamthung daw k nangmouh ka cetkhai hanelah doeh ka o.

¹⁸ Oe kâpoelawknaw na poe e tarawi aw h haw khe. Hottelah na sak aw h pawiteh, rounnae teh palang tui patetlah thoseh, na lannae teh tui pui tuicapa ka thaw e patetlah thoseh, ao han.

¹⁹ Na catounnaw hai sadi patetlah pap vaiteh, na catounnaw hai sadi patetlah a pap aw h han. A min teh ka hmaitung hoi raphoe e lah aw m mahoeh.

²⁰ Babilon khopui thung hoi tâcaw t aw h. Khaldeannaw hai yawng takhai aw h. Hetheh, la sak pawlawk hoi thai sak nateh, dei aw h. Talai pout totouh kamthang sak aw h. BAWIPA ni a san Jakop hah a ratang toe telah dei aw h atipouh.

²¹ Thingyeyawn laho i a hrawi aw h navah, tui kahran boi aw h hoeh. Lungsong thung hoi ahnimouh han tui a lawng sak. Lungsong a kâbawng sak teh, tui hah a tâco sak.

22 Tami kahawihoehnaw hanelah, roumnae awm hoeh telah BAWIPA ni a dei.

49

BAWIPA e san

¹ Oe tuilum taminaw, ka lawk hah thai aw haw. Ahla koe e miphunnaw na hnâpakeng aw haw. Vonthung ka o nah roeroe vah BAWIPA ni na kaw toe. Anu e vonthung vah ka min a pakhum toe.

² Ka pahni hah tahloi kahran e patetlah a sak teh, a kut tâhlip daw k na hro. Pala pikhluk e patetlah na coung sak teh, a palabom dawkvah na pâseng.

³ Oe Isarel nang teh kaie san doeh. Nang daw k hoi ka bawilennae a kamnue han telah ka ti toe.

⁴ Kai ni hai hawinae awm laipalah ka taw k toe. Ayawmyin lah ka tha hai a baw toe. Hatei, ka lannae taw kphu teh BAWIPA koe ao teh, ka taw kphu teh Cathut koe ao tie hah ka cai telah ati.

⁵ Atuvah, BAWIPA ama koe Jakop bankhai hane hoi, ama koe Isarel ka pâkhueng hane a san lah o nahanelah, von thung hoi na kangd-outkhai e ni a dei. Bangkoktetpawiteh, BAWIPA hmaitung vah ka sungren e lah ka o. Ka Cathut teh ka thasainae lah ao han.

⁶ Bokheiyah, ama ni, Jakop miphun kangdue sak hane hoi Isarelnaw thung daw k kahloutnaw hah bout kangdue sak hanelah, ka san lah na o e heh hno ka pâhawca doeh. Talai pout totouh ka rungngangnae lah na o nahan, Jentelnaw kaangsakkung lah onae hai na poe han.

⁷ Isarelnaw hah a ratang teh, a tami kathoung-naw ayâ ni a pacekpahlek e, miphun ni a panuet e, lawkcengkung san, Jehovah ni hettelah a dei. Yuemkamcu, BAWIPA, Isarel tamikathoung, na karawikung kecu dawkvah, siangpahrangnaw ni hmawt awh vaiteh, a thaw awh han, bawinaw ni hai a bawk awh han telah ati.

Isarel bout pâkhuengnae

⁸ BAWIPA ni hettelah a dei. Ngai kaawm e tueng dawk na lawk hah ka tarawi toe. Rungngangnae hnin dawk nang hah na kabawp toe. Na ring vaiteh, miphunnaw hanelah lawkkamnae hah na poe han. Ram bout kangdue sak hane hoi kingkadi e râw lah bout coe hanelah,

⁹ Thongkabawtnaw koe tâcawt awh. Hmonae koe kaawmnaw koevah, kamphawng awh telah na dei thai nahanelah, na ta awh han. Lamthungnaw dawc cet awh vaiteh, arasangnae cailum hmuen dawc pawngpanae lah ao awh han.

¹⁰ Vonhlam awh mahoeh, tui kahran awh mahoeh. Khumbei ni runae poe awh mahoeh. Kanî raeng ni daw awh mahoeh. Bangkoktet-pawiteh, ahnimouh ka pahren e ni cetkhai awh vaiteh, tui onae koe a ceikhai han.

¹¹ Kaie mon pueng teh lamthung lah ka coung sak han. Kaie lam kalennaw hai ka tawm han.

¹² Kenhaw! Ahnimanaw teh ahlanae koehoi tho hanelah a kâcai awh. Kenhaw! ahnimanaw teh atunglah hoi kanîloumlah hoi tho hanelah a kâcai awh. Ahnimouh teh Sinim ram hoi tho hanlah kâcai awh e naw doeh.

¹³ Oe kalvannaw lunghawi hoi la sak awh haw. Oe talai lunghawi haw. Oe monnaw la sak

awh haw. Bangkongtetpawiteh, BAWIPA ni a taminaw a lung a pahawî. Runae kâhmonaw hai a pahren han.

Cathut ni Zion pahnim hoeh

¹⁴ Hateiteh, Zion ni, Jehovah ni na ceitakhai teh, Bawipa ni na pahnim toe ati.

¹⁵ Napui ni a ca a khe e hah, a pahren hoeh totouh, sanu a pânei lahun e camo a pahnim thai han na maw. Pahnim thai nakunghai kai ni na pahnim hoeh.

¹⁶ Kai ni ka kuttabei dawck ca ka thut teh, na kâkalupnae rapan teh ka hmalah pou ao.

¹⁷ Na canu capanaw ni karanglah a kâroe aw h han. Nang karaphoenaw hoi, nang ka hmawt sak e naw ni na tâco takhai han.

¹⁸ Na tengpam vah kenhaw! Ahnimanaw teh a kamkhueng aw h teh nang koe a tho aw h. BAWIPA ni a dei e teh, Kai teh ka hring dawkvah, nang teh langa a kamthoup e patetlah phunkuep hoi na kamthoup dawkvah, rumram nahoe h ati.

¹⁹ Raphoe teh kingdi e hmuen hoi ka rawk tangcoung e na ram teh, atuvah kho ka sak e apap dawkvah, abueng toe. Nangmouh na kapayawpna w teh ahlanae koe ao aw h han.

²⁰ Na canaw a due hnukkhu, bout na tawm e capanaw ni hmuen khout aw h mahoe h. A hmuen na poe ei telah a hei aw h han.

²¹ Hatnavah, nang ni na lungthung hoi, hetnaw heh apinimouh na khe pouh aw, ka canaw be kadout niteh, madueng kaawm e, yuengyoe kâva e lah bout ka o. Hetnaw hah apinimouh a thokhai aw h. Kai teh ka madueng kaawm e lah

ka o dawkvah, hetnaw heh nâmouh ao aw h aw na ti han.

²² Bawipa Jehovah ni a dei e teh, khenhaw! Kai ni khoram tangkuem kaawm e miphunnaw koe ka kut ka dâw teh, mitnoutnae hah ka vo pouh han. Ahnimouh ni nange na canu capanaw hah a kut hoi tawm aw h vaiteh, a loung daw k hrawm aw h vaiteh, a thokhai aw h han.

²³ Siangpahrangnaw ni nange camo tawm aw h vaiteh, siangpahrangnaw teh nange camo ka khoum e lah ao aw h han. Na hmalah tabaw k aw h vaiteh, na khok daw k e vaiphu hah a palem aw h han. Kai teh Jehovah lah ka o e hai thoseh, kai na kangaihawinaw teh kayanae a ohoehnae hai thoseh na panue han.

²⁴ Athakaawme kut daw k hoi hnopai lawp han na maw. Taki ka tho e san hah rungngang han na maw.

²⁵ BAWIPA ni a dei e teh, atangcalah, athakaawme ni man tangcoung e tami hah bout la han. Takitho e ni lawp tangcoung e lawphno hah bout la han. Bangkongtetpawiteh, nang ka taran e hah kai ni ka taran vaiteh, na capanaw hah ka rungngang han.

²⁶ Nang na karektapnaw hah amamae tak ka ca sak han. Amamae thi hah misurtui nei e patetlah koung ka boum lah a nei aw h han. Hatdawkvah, kai Jehovah teh nang ka rungngangkung, nang karatangkung, Jakop miphun daw k athakaawme Cathut, ao tie hah tami pueng ni a panue aw h han telah a dei.

50

Isarelnaw yonnae dawk hoi hloutnae

¹ BAWIPA ni hettelah a dei. Nangmae manu manae ca, kâmanae hah nâne ao. Nahoe pawiteh, ka laiba dawkvah api koe maw nangmanaw hah na yo awh. Bangkongtetpawiteh, namamae na payonnae dawkvah san lah na o awh. Namamouh kaya poenae dawkvah, nangmae manu ka manae doeh.

² Kai ka tho navah bangkongmaw taminaw ao awh hoeh. Bangkongmaw na kaw awh lahun nah na pato awh hoeh. Kai ni na ratang thai awh hoeh nahanelah, ka kut a duem namaw. Rungngang thai hoeh nahanlah bahu ka tawn hoeh na maw. Kenhaw! kai ni ka yue teh, tuipei hai remphui. Palang pui hai kahrawng patetlah ka o sak. Tui ao hoeh dawktanganaw a pawk awh. Tui kahran hoi a due awh.

³ Kalvan teh hmonae hoi ka tangoung teh, burihni ka kâkhu sak.

⁴ Ka tâwn e koe lawk hoi a tawnae ka dam sak thai nahanelah, Bawipa Jehovah ni thoumthainae lai na poe. Amom tangkuem kai hah na pâhlaw, ca ka kamtu e patetlah thaisak hanelah ka hnâ heh a pâhlaw.

⁵ Bawipa Jehovah ni ka hnâ hah a paawng teh, kai hai kangek mahoe. Ka taran mahoe. Hnuclah kâhnawn mahoe.

⁶ Ka keng kahemnaw koe thoseh, hmaibeisam kapawnnaw koe thoseh, hmaibeika patueng. Yeiraiponae hoi tamthawinae dawktanganaw hoi ka minhmai ka hrawk hoeh.

⁷ Bangkongtetpawiteh, Bawipa Jehovah ni na kabawp han. Hatdawkvah, yeirai ka po mahoe. Hatdawkvah, lungtaw patetlah ka minhmai ka hruek teh, kayak mahoe tie ka panue.

⁸ Kai tangnae na kapoekung teh a hnai toe. Apimaw na tuk han. Na ka tuk hane teh apimaw. Kamtueng awh sei. Na ka tuk hane teh apimaw, rek na hnai naseh.

⁹ Bawipa Jehovah ni na kabawp roeroe han. Apinimaw kai hah na sung sak han. Hot patetlah e taminaw teh napon patetlah ao awh vaiteh, khakbara ni koug a ca awh han.

¹⁰ Nangmouh daw k apimaw BAWIPA ka taket, ahni teh a san e lawk ngai naseh. Apimaw angnae tawn laipalah hmonae daw k ouk ka cet. Jehovah min hah kâuep nateh, amae Cathut daw k kamngawi naseh.

¹¹ Hmai hah patawi teh, amamouh hmaitali hoi muen kâkatum e taminaw, namamae hmaiang daw k thoseh, namamouh ni patawi e hmainaw daw k thoseh, cet awh. Hetheh ka kut daw k hoi ka sin e hmai teh namamouh koe lah tangpek vaiteh, lungmathoe laihoi na yan awh han.

51

BAWIPA ni Zion lung a pahawi

¹ Lannae ka pâlei niteh, BAWIPA ka tawng e taminaw ka lawk thai awh haw, nangmouh na kâdêinae lungsong hoi na tai awh e tangkom kâko khenhaw.

² Nangmae na pa Abraham hoi nangmouh na kakhekung Sarah hah khenhaw. Bangtelamaw

tetpawiteh, ahni dueng doeh ka kaw, yawkahawi sak teh, tami moikapap lah ka coung sak.

³ Hahoi BAWIPA ni Zion kho lung a pahawi han. Ahnie tami kingdinae hmuen pueng, lung a pahawi vaiteh, kahrawngum hah Eden hmuen patetlah ka sak vaiteh, ramkenae hah BAWIPA takha patetlah ka sak han. Lunghawilawkdeinae hoi nawmnae, lunghawilawk deinae hoi la saknae lawknaw athung vah hmu lah ao han.

⁴ Ka taminaw ka dei e thai awh haw. Ka miphunaw na hnâpakeng awh haw. Kai koehoi kâlawk a tâco vaiteh, lawk ka tâtueng e teh taminaw hanelah, angnae lah ao han.

⁵ Ka lannae teh a hnai toe. Kaie rungngangnae teh a tâco toe. Ka kut ni tamipueng lawk a ceng awh han. Tuilum ramnaw ni a panue awh vaiteh, ka kut a kâuep awh han.

⁶ Kalvan lah radoung awh haw, a rahim lae talai hai khenhaw. Kalvan teh hmaikhu patetlah a kahma teh, talai teh khohna patetlah a pawn han. Talai taminaw teh, tangkarang patetlah a due awh han. Hatei, rungngangnae teh a yungyoe a kangning vaiteh, lannae hai pahnawt thai lah awm mahoe.

⁷ Lannae phung ka panuek niteh, kaie kâlawk a lungthin dawk katatnaw, ka lawk thai awh haw. Taminaw e pathoenae taket awh hanh. Hnephnapnae hai taket awh hanh.

⁸ Bangkongtetpawiteh, ahnimanaw teh, khohna patetlah hmonae ni koung a ca awh han. Tumuen patetlah ahnimanaw teh pâri ni a ca awh han. Hatei, ka lannae teh a yungyoe a

cak vaiteh, ka rungngangnae teh a se buet touh hnukkhu buet touh a kangning han.

⁹ Kâhlaw leih, kâhlaw leih, thaonae kâmahrawk leih. Ayan e tueng dawk palang na kâhlaw e patetlah kâhlaw leih. Rahab ka rek niteh, khorui hah patawnae kapoekung teh, BAWIPA nang nahoehmaw.

¹⁰ Nang teh, kadung ni teh ka kaw e tuipui kahaksakkung, na rungngang e taminaw a cei nanelah, tuipui a dungpoungnae koe lamthung na ka sak pouh kung teh nang nahoehmaw.

¹¹ Hot patetlah a ratang e taminaw ni, BAWIPA koelah a ban awh vaiteh, amamae lû dawk a yungyoe lunghawinae la sak nalaihoi Zion lah a ban awh nahan, lunghawinae hoi a nawmnae a hmu awh vaiteh, lungmathoenae hoi khuikanae teh, koug a kahma han toe.

¹² Na lung ka mawng sak kung teh kai kama roeroe doeh. Tami capa pho patetlah kasakkung hoi kadout hane tami ka taket e tami teh apimaw.

¹³ Talaidu adu ka ung niteh, kalvannaw kasakkung hoi nang na kasakkung BAWIPA na pahnim teh, pacekpahlek e tami ni kai na raphoe tawmlei toe telah na pouk teh ahnie lungkhueknae pou na taki. Ka pacekpahlek e tami a lungkhueknae teh atu nâmwaw ao.

¹⁴ Tangkom thung dout mahoe. Rawca hai pout mahoe, Karang lah hloutnae koe a phan.

¹⁵ Kai teh, tuipui ka yue ni teh tuicama kahramsakkung nangmae Jehovah na Cathut doeh. A min teh ransahu BAWIPA doeh.

16 Kalvan ka kangdout sak niteh, talai adu ka ung e ni Zion koevah, ka tami lah na o telah ka ti thai nahanelah, ka lawk na pahni dawk ka hrucek toe. Ka kut e tâhlip hoi nang teh na ramuk toe telah ati.

Cathut e lungkhueknae ka patawpoung e

17 Oe, Jerusalem, BAWIPA e kut dawk e lungkhueknae manang kanetkung napui, kâhlaw leih, thaw nateh kâhlaw leih. nang ni tâluengsaknae manang hai koung na nei toe. A radue hai koung na nei toe.

18 Na khe e na capanaw thung dawk, nama lam kapâtuekung buet touh hai awm hoeh. Na kaw k e capanaw thung dawk nama kut hoi na ka hrawi hane tami buet touh hai awm hoeh.

19 Takang a tho vaiteh tami kingdinae hoi, tahloi hoi theinae, hete runae kahni touh nange lathueng a pha toe. Apinimaw na ka khai vaiteh, lung na pahawi han.

20 Na capanaw ni kângai a ru aw h han. Tangkhek daw k kâman e Atha patetlah lam tangkuem daw k ayan aw h vaiteh, BAWIPA e lungkhueknae hoi Cathut e yuenae teh a boum aw h han.

21 Hatdawkvah, pacekpahlek e ka khang e tami, misurtui hloilah alouke paruinae hoi ka parui e tami thai aw h haw.

22 Na BAWIPA, a taminaw lawk ouk ka kâpankhai e, na Bawipa Jehovah ni a dei e teh, khenhaw! pâyawnae manang, ka lungkhueknae manang daw k e a taisawm hah na kut daw k e ka la vaiteh, nang teh bout na net mahoe h toe.

²³ Hatei, nang koe vah na tak van coungroe thai nahanelah, tabawk haw telah a titeh, na lathueng kacetnaw hanelah, lamthung patetlah na tak a phai teh, patawnae na kapoekungnaw e kut dawk, hote yamu manang ka hruek han.

52

Cathut ni Jerusalem a ratang

¹ Oe, Zion kâhlaw, kâhlaw. Na thaonae hoi kamthoup. Oe Jerusalem kho, kathoung khopui, khohna kahawi hoi kamthoup. Bangkongtet-pawiteh, atu hoi teh, vuensom ka a hoehnaw hoi kamhnawngnaw teh na thung vah kâen mahoehtoe. ² Oe Jerusalem, vaiphu na kâbetnae tâkhawng haw. Thaw nateh, tahung haw. Oe Zion canu san lah na onae na lahuen dawkpâkhi e ratham haw. ³ BAWIPA ni hettelah a dei. Banghai bang hoehtah lah na yo aw. Hot patetlah tangka laipalah hoi na ratang han toe telah atipouh. ⁴ Bangkongtetpawiteh, Bawipa Jehovah ni hettelah a dei. Ka taminaw Izip ram o hanelah hmaloe a cathuk aw teh, Assirianaw ni a khuekhaw awm laipalah hoi rep a coungroe aw. ⁵ Ka taminaw hah banglahai awm laipalah a ceikhai aw. Hatdawkvah, bangmaw hi ka sak han telah BAWIPA ni ati. Ahnimouh tak dawka ukkungnaw ni lungmathoe hoi a khuika sak aw telah BAWIPA ni ati. A hnintangkuem pout laipalah ka min a pacekpahlek aw a ti. ⁶ Hatdawkvah, ka taminaw ni ka min hah a panue aw han, lawk kadeikung hah kai doeh telah hat hnin vah a panue aw han. Khenhaw! kai doeh telah a ti. ⁷ Monsom vah kamthang

kahawi ka phatkhai e, roumnae lawk hah ka hramkhai e, hawinae kamthang ka phat sak e, rungngangnae lawk hah ka oung e, Zion koevah, na Cathut ni a uk katetkung e a khok teh a meihawi poug. ⁸ Na ramveng ni a lawk hah a tâco sak han. A lawk tâco hoi cungtalah la a sak aw h han. ⁹ Ka rawk e Jerusalem hmuennaw vaitalahoi na lunghawi aw h. Cungtalah la sak aw h. Bangkongtetpawiteh, BAWIPA ni a taminaw hah a lungmawng sak teh, Jerusalem hah a ratang toe. ¹⁰ BAWIPA ni a mip hun abuemiae a mithmu vah, kathoung e a kut a pâtu e teh, kalvan e kaawmnaw pueng ni Cathut e rungngangnae a hmu han. ¹¹ Tâcawt aw h. Tâcawt aw h. Haw hoi tâcawt aw h. Ka khin e tek hanh aw h. Haw hoi tâcawt aw h. BAWIPA e hnopai ka phawt naw, kathoungcalah aw m aw h. ¹² Nangmouh teh, ka rang lah na tâcawt aw h hoeh, yawng hai na yawng aw h hoeh. BAWIPA hah na hmalah cet vaiteh, Isarel Cathut teh na hmalah hoi kountoukkung lah ao han.

Yonnae kaphawtkung san

¹³ Khenhaw! ka san ni lungangcalah a sak han. Ahni teh karasangpoug lah ka talue lah ka tawmrasang e lah ao han. ¹⁴ Tami moikapap ni a kângairukhai e patetlah a mei teh tami mei hlak hai a mathoe teh, a takthai hai tami e takthai hlak a mathoe. ¹⁵ Hot patetlah, ahni ni mip hunnaw pueng hah a thoung sak han. Siangpahrangnaw ni amamae pahni a tabuem aw h han. Bangkongtetpawiteh, dei boihoeh e a hmu aw h han, thai boihoeh e hai a thai aw h han.

53

¹ Maimouh ni pathang awh e lawk heh apinimaw a yuem. BAWIPA kut teh api koe maw a kamnue. ² Bangkongtetpawiteh, a hmalah talai hoi cati kapaw e patetlah ama teh, a paw. Ama ka hmu awh teh, ka ngai awh nahanelah, a meihawinae banghai tawn hoeh. Ngai kawi e minhmai awm hoeh. ³ Ama teh taminaw e dudam hoi pahnawt e lah ao. Reithainae ka tawn e hoi patawnae ka panuek e lah ao. Tami ni a minhmai a thung takhai e patetlah taminaw ni a dudam e lah ao teh, kaimouh ni hai banglah ka noutna van hoeh. ⁴ Ama ni ka patawnae hah a phu. Ka lungmathoenae hai a phu. Hatei, kaimouh ni, lungmathoenae ni na pha sin e hoi, Cathut ni na hemnae patawnae na poe e lah ka pouk awh. ⁵ Hatei, kaimouh ni kâlawk ka ek awh kecu dawkvah pacekpahleknæ hoi, ka yonæ kecu dawkvah hemnae a khang. Ka lungmawng awh nahanelah yuenæ teh amæ tak dawka pha sak teh, a hemnae hmâ dawka hoi ka dam awh. ⁶ Tu patetlah kahma awh teh, lamthung lengkaleng ka phen awh. Hatdawkvah, BAWIPA ni ka yonnae naw hah amæ a tak dawka patue. ⁷ Ama teh repcoungrøe e lah ao ei, lawkkamuem lah ao. Thei hanelah a ceikhai awh e tuca patetlah a muen ngaw pouh nah duem kaawm e tuca patetlah ao teh, a pahni hai a cakuep. ⁸ Ama teh thongim thung hoi lawkcengnae lahoi a ceikhai awh. Apini maw a catoun hah a hram khai han. Kahringnaw e ram thung hoi ahni teh takhoe lah ao teh, ka taminaw ni kâ tapoenæ kecu dawka ahni teh hem lah ao. ⁹ Payonnae

sak boihoeh. Pahnî dawk hoi dumyennae laithoe dei boihoeh. Hatei, a tangkom teh tamikahawihoehnaw koe rei pakawp hanelah a pouk aw. Hatei, a due hnukkhu hoi bawitangrengnaw koe ao. ¹⁰ Hateiteh, ama a hemnae teh BAWIPA ngainae doeh. Patawnae hah a poe katang teh, a hringnae teh yon thuengnae dawk hno toteh, ca catounnaw a hmu vaiteh, a hringnae hnin hah a saw sak han. BAWIPA ngainae teh a kut dawk a kuep sak han. ¹¹ A hringnae tawkphu a hmu vaiteh, a lung a kuep han toe. Ka lan e ka san hah panuenae lahoi, ahni ni tamikapap hah lannae dawk a caksak han. Ahnimae yonnaw hah a phu pouh han. ¹² Hatdawkvah, ama teh tami kalennaw ham ka rei han. Ahni ni a la e hnopainaw hah, athakaawme taminaw a rei han. Bangkongtetpawiteh, a hringnae teh, a due totouh a rabawk teh, kâlawk ka ek naw koe hmai touksin lah ao. Tami moikapap e yonnae hah a phu teh kâlawk kaeknaw hanlah a kâhei pouh.

54

Ka pout thai hoeh e roumnae lawkkam

¹ Oe, carôe e napui, lunghawi hoi la sak haw. Ca khe patawnae ka khang boihoeh rae napui, la sak hoi hram haw. Bangkongtetpawiteh, a vâ ka sak e napui ni ca sak e hlak pahnawt e ni ca hoe kapap a sak toe telah BAWIPA ni ati. ² Na im hmuen hah pakaw haw. Na onae lemphu hah rayang haw. Pasai hanh. Ruinaw hah saw sak haw. Khomnaw hah kacaklah ung haw. ³ Bangkongtetpawiteh, nang teh avoilah aranglah na pungdaw han.

Na catoun ni miphunnaw hah râw lah coe vaiteh, ahnimae kingkadi kho dawk kho a sak aw h han. ⁴ Taket hanh, na kayak mahoe h. Na lungpout hanh, na min mathout mahoe h. Bangkongtetpawiteh, na nawca nah na khang e kayanae hah na pahnim han. Lahmainu lah na o dawk pathoenae hah bout na pouk mahoe h toe. ⁵ Bangkongtetpawiteh, nang na ka sak e teh, nange vâ lah ao. A min teh, ransahu BAWIPA doeh. Nang karatangkung teh Isarel miphun daw k kathounge Cathut lah ao. Talai pueng a uk teh Cathut telah a kaw aw h. ⁶ Pahnawt teh a lung ka mathout e napui, a naw navah yu lah kaawm nite h, a hnukkhu mae napui hah bout kaw e patetlah nang hah bout na kaw han telah na Cathut ni ati. ⁷ Nang hah dongdengca na pahnawt dawkvah, moikapap e pahrennae hoi bout na pâkhueng han. ⁸ Puenghoi ka lungkhuek teh, dongdengca ka minhmai ka hro ei nakunghai, a yungyoe lungpatawnae lahoi bout na pahren han telah nang ka ratang e Jehovah ni ati. ⁹ Noah se nah e tuikamuem a tho navah, hote tui ni talai teh bout kamuem sin mahoe h toe telah lawk ka kam e patetlah nang koe ka lungkhuek mahoe h toe, na yue mahoe h toe telah thoe ka bo toe. ¹⁰ Monnaw kahmat nite h, monruinaw kampuen nakunghai, kaie lungpatawnae teh nang koe hoi kampuen mahoe h. Kaie roumnae lawkkam hai kampuen mahoe h telah nang ka pahren e BAWIPA ni ati. ¹¹ Oe, nang rektap e hoi tûili ni meng a raphoe teh, lungmawngnae ka tawn hoeh e, kenhaw! na talungnaw teh talung phu kaawm phunkuep hoi ka pathoup vaiteh, na

talungdu teh, Sapphire talung hoi ka ung han. ¹² Longkhanaw hah rubies talung hoi thoseh, thonaw hah khristal talung hoi thoseh, tapang pueng teh aphu kaawm e talungnaw hoi thoseh, ka sak han. ¹³ Na catoun pueng teh BAWIPA ni cangkhai e lah awm vaiteh, na canaw e rounnae teh a len han. ¹⁴ Lannaee dawk caksak lah na o han. Repcoungroenae hoi na kâhlat toung vaiteh, na taket mahoe h toe. Lungpuennaee hai hlat toung vaiteh nang koe phat mahoe h toe. ¹⁵ Kaie kâ laipalah, apinihai na taran mahoe h toe. Nang tuk hanelah kamkhueng e pueng teh, koug a rawp aw h han. ¹⁶ Hmaisaan ka hmu niteh, ama hanelah senehmaica ka dêi e hah ka sak teh, sumkadêinaw hai ka sak. ¹⁷ Nang taran hanelah a sak aw h e senehmaica buet touh boehai coung mahoe h. Lawkcengnae koe nang ka taran e pueng a sung aw h han. BAWIPA e sannaw teh hot patet e râw hah a coe aw h vaiteh, kai kecu dawk lannaee koe a pha aw h han telah BAWIPA ni ati.

55

Hring thadam nahanelah counnae

¹ Oe, tui kahran pueng, tui aonae koe tho aw h. Tangka ka tawn hoeh naw tho aw h. Ran aw h nateh net aw h. Tangka hoi aphu poe laipalah tho aw h nateh misurtui hoi sanutui ran aw h haw. ² Rawca lah kaawm hoeh e dawk nangmouh ni na tangka thoseh, von ka paha thai hoeh e dawk na hnopai thoseh bangkongmaw na pâbaw aw h. Ka lawk thai aw h haw. Kahawie rawca hah cat aw h. Na hringnae a nawm

han. ³ Na hnâpakeng aw h nateh, thai aw h haw. Hottelah na tet aw h pawiteh, nangmae muitha teh a hring han. Kai ni hai, nangmouh hoi a yungyoe lawkkamnae ka sak vaiteh, Devit daw k lungmanae ka caksak han. ⁴ Khenhaw! ahni teh, tami pueng hanelah, kapanuekkhaikung lah ka o sak hane thoseh, taminaw hanelah kahrawikung kacue lah thoseh, miphunnaw koe ka poe toe. ⁵ BAWIPA Cathut hoi Isarel Tami Kathoung kecu daw k, na panue boihoeh e miphun hah na kaw han. Nang na ka panuek boihoeh e miphun hah, nang koe a yawng han. Bangkongtetpawiteh, a bawilenna caksak toe telah ati. ⁶ Hmu thai lahun nah BAWIPA hah tawng aw h, a hnai lahun nah ama hah kaw aw h. ⁷ Tamikathout ni a lamthung cettakhai naseh. Tamikalan hoeh e ni a pouknae thoseh, a pahnawt vaiteh, BAWIPA koe ban naseh. Hottelah tetpawiteh, a pahren han. Maimae Cathut koe kâthung naseh, hottelah tetpawiteh, a ngaithoum han. ⁸ Bangkongtetpawiteh, ka pouknae heh, nangmae pouknae hoi kâvan hoeh. Ka lamthung hai na lamthung hoi kâvan hoeh telah BAWIPA ni ati. ⁹ Kalvan heh talai h lak a rasang e patetlah ka lamthung hai na lamthung h lak a rasang teh, ka pouknae hai na pouknae h lak a rasang. ¹⁰ Bangkongtetpawiteh, ratui hoi tadamtui teh, kalvan hoi a rak teh bout ban toung laipalah, cati kahei koe cati hah a poe teh, rawca ka cat hane koe rawca hah a poe thai nahan, talai a duk sak teh, a kung a pâw sak teh, a paw a paw sak e patetlah, ¹¹ Ka kâko hoi ka tâcawt e ka lawk teh ao han. Ayawmlah kama koe bout

ban mahoe. Ka ngainae a kuep sak vaiteh, ka patoun ngainae daw kuepcingnae a hmu han. ¹² Bangkongtetpawiteh, lunghawi laihoi na tâco aw h vaiteh, karoumcalah na ceikhai aw h han. Montang monruinaw ni nangmae hmalah la a sak aw h han. Kahrawng e thingnaw pueng ni a kuttawng aw h han. ¹³ Pâkhing yueng lah hmaica, pho yueng lah tuihannaw a pâw han. Hote hno teh BAWIPA hanelah minhawinae hoi, kahmat thai hoeh e a yungyoe mitnout lah ao han.

56

Jentelnaw han rungngangnae

¹ BAWIPA ni telah a dei. Kângingnae hah kuen nateh, lannae hah sak haw. Bangkongtetpawiteh, kaie rungngangnae meimei a tho toe, ka lannae hah pâpho lah ao han. ² Hete hno kasaknaw hoi hot patetlah kacaklah ka kuen e tami capa, sabbath ek laipalah hawihoehnae sak laipalah, a kut ka ring e teh, a yaw ka hawi e tami lah ao. ³ Hahoi, ramlouk tami, amadueng lahoi BAWIPA hoi kâkuen e capa ni, BAWIPA ni a taminaw thung hoi abuemlahoi na kapek tet nahanh seh. Tuenla ni khenhaw! thingke lah doeh rip ka o aw h tet nahanh seh. ⁴ Bangkongtetpawiteh, kaie sabbath hnin ya hoi ka lunghawikhai e hno hah ka rawi niteh, ka lawkkam pou ka kuen e tuenla kong dawkvah, BAWIPA ni hettelah a dei, ⁵ Ahnimouh koe ka im vah thoseh, ka rapan thung thoseh, canu capa katawnnaw hlak haiyah, pahnim hoeh nahan minhawinae ka poe han. Ahnimouh koe

yungyoe kâraphoe thai hoeh e min hah ka poe han. ⁶ Ahnie san lah o hane, BAWIPA min lungpataw hane, BAWIPA kâuep hane, ramlouk e tami capanaw a mahmawk lahoi BAWIPA hoi kâkuennaw hai sabbath ek laipalah, ya hanelah ka lawkkam ka kuen e pueng, ⁷ ahnimouh roeroe hah ka mon kathoung koe ka ceikhai han. Kaie ratoumnae im dawk ka lunghawikhai han, hmaisawi thueng hanlah poe e naw hoi thuengnae naw hah, kaie khoungroe dawk hoi ka dâw pouh han. Bangkoktetpawiteh, kaie ka im teh, miphunnaw pueng hanelah ratoumnae im ati awh han. ⁸ Bawipa Jehovah ni a pâlei e Isarel bout ka pâkhueng e ni, ama koe pâkhueng tangcoung e naw touksin laipalah, tami alouknaw hai ahnimouh koe ka pâkhueng han telah ati.

Khopouk ka vang hoeh e Isarel kahrawikungnaw

⁹ Thingyei um e moithangnaw pueng hoiyah, ratu um kaawm e moithangnaw pueng, ca hanelah tho awh. ¹⁰ Ahnimae ramvengnaw teh a mit ka dawn e a tho. Thainae ka tawn hoeh e naw seng lah ao awh teh, abuemplahoi a lawk kacaihoehe ui, ka rauk thai hoeh e ui lah ao awh. Karum mang sak hoi, pou ka ip niteh, i dueng ka panki e lah ao awh. ¹¹ Ka carawng ni teh ka khout boihoehe e uinaw lah ao awh. Ahnimouh teh, thaipanueknae ka tawn hoeh e tukkhounaw doeh. Makhomaram vah, mahoima mek nahanelah abuemplahoi lam a phen awh toe. ¹² Tho awh haw, misur ka thokhai vai, yamu hah king net awh sei. Tangtho hai

sahnin e patetlah han na a, apap hai hoe apap han doeh telah ati.

57

Cungkeihoehe meikaphawk bawknae

¹ Tamikalan a due teh, hawinae ka sak e tami hah takhoe lah ao navah, tamikalan hah hawihoehnae thung hoi takhoe toe tie hah apinihai thaipanuek aw h hoeh, apinihai pouk aw h hoeh. ² Hot patet e tami teh roumnae thung a kâen toe. Ahnimouh teh kalan lah a hring aw h teh, amamae ikhun daw k a kâhat aw h. ³ Ân ka sin e napui e capanaw, uicuknaw hoi ka kâyawt e catounnaw hi tho aw h haw. ⁴ Nangmouh ni apimaw na pacai aw h. Api hanelah maw na lai na pâthosin aw h vaw. Nangmouh teh laithoe catoun, kâ ka ek e catoun, ⁵ kathenkungnaw e rahim vah, meikaphawk koe ka cuk e, ravo thung, lungha rahak camo kathetnaw nahoehmaw. ⁶ Ravo yawn talung kâpinaw rahak nangmae ham teh ao. Hot patetlah e hno teh nangmae râw doeh. Hetnaw e hmalah nei thuengnae hoi tavai thuengnae naw hah na rabaw k aw h. Hotnaw hah ka ngai han na maw. ⁷ Mon rasangnae koe na ikhun hah na hruek teh, hote hmu en koe thueng nahanelah ouk na luen. ⁸ Nang pahnim hoeh nahanlah tho hnuklah na hruek teh, kai koe laipalah alouknaw koe khohna na rading teh na luen toe. Na ikhun na pakaw teh, ahnimouh koe lawkkamnae na sak toe. Tawngtai lah na hmu e ahnimae ikhun hah na lungpataw toe. ⁹ Satui na sin teh

siangpahrang koe na cei toe. Hmuitui na pung sak toe. Laiceinaw hah ahlanae koe na patoun teh, Sheol totouh na patoun toe.

¹⁰ Na ceinae lam ahlapoung dawkvah ngawt na tâwn eiteh, na lungpout hoeh. Na kâyawm teh na hlout dawkvah, na thathout hoeh.

¹¹ Nang ni apini na bari teh, na taki daw k maw laithoe dei laihoi kai na pahnim. Hoehpawiteh, na lungthin hoi na pouk hoeh. Kasawlah duem ka o daw k maw na taki hoeh.

¹² Na lannae hoi na tawksak e hah ka pâpho han. Hatei, cungkeinae awm mahoe h.

¹³ Na hram toteh, na pâkhueng e meikaphawk-naw ni na rungngang naseh. Hatei, hotnaw teh kahlî ni ahlanae koe a sin han. Kâha ni a palek aw h han. Hatei, kai na kâuep e niteh, ram hah pang aw h vaiteh, mon kathoun gnaw hah râw lah a pang aw h han.

Hnuklah kabannaw damsaknae

¹⁴ Hahoi, talai paten aw h, talai paten aw h. Lam pathoup aw h. Ka taminaw e lam daw k e thongmuinaw hah takhoe aw h telah ka dei.

¹⁵ Bangkongtetpawiteh, a rasang poungnae koe tawm lah kaawm e, a yungyoe kangning e, a min Thoungnae telah ka tawn e ni hettelah a dei, Kai teh a rasangnae koe kathoung e hmuen koe ka o. Ka kârahnoum naw e lungthin pâhlaw hoi pankângai e lungthin pâhlaw hanelah, a lung hoi pankângai katang e hoi kârahnoum katangnaw koevah ka o.

¹⁶ Bangkongtetpawiteh, a yungyoe ka tuk mahoe h, ka lung hai pou khuek mahoe h.

Bangkongtetpawiteh, ka sak e kâha hoi muitha teh ka hma lah a tâwn han doeh.

¹⁷ Bangkongtetpawiteh, utsinnae hoi payonnae dawkvah, ka lungkhuek teh ka tuk, ka minhmai ka hro teh ka lungkhuek. Hatei, ahnimouh teh amamae lungpata laihoi ao aw h.

¹⁸ A hringnae teh ka hmu toe. Ahni teh, ka dam sak han. Ka ceikhai vaiteh, ahni hoi ahni kakhuinaw koevah, lungmawngnae teh bout ka poe han.

¹⁹ Pahni paw hah ka sak. Ahlnae koe kaawmnaw hoi a hnainae koe kaawmnaw koevah, roumnae, roumnae teh awm lawiseh, telah BAWIPA ni ati. Hahoi ahni teh ka dam sak han ati.

²⁰ Hatei, tamikathoutnaw teh, kâhuen e tali patetlah ao. Duem ao thai hoeh toteh, songnawng hoi tangdong a tâco sak.

²¹ Tamikathoutnaw hanelah roumnae awm hoeh telah ka Cathut ni ati.

58

Cathut lung kahawi sak e rawcahainae

¹ Kacaipounglah hram nateh, panguiep hanh. Mongka patetlah na lawk cai sak. Ka taminaw ni kâlawk a eknae hoi Jakop imthung yonnae hah pâpho haw. ² Hateiteh, hnintangkuem kai hah na tawng aw h teh, ka lamthung panue e hah a ngai aw h. Miphun buet touh ni lannae a sak teh, Cathut e lamthung a ceitakhai boihoeh e patetlah kângingnae phunglam hah na pâlei aw h teh, Cathut hnai hane hai a ngai aw h.

³ Bangkongmaw, rawca ka hai aw h e na hmu

hoeh. Bang kecu dawk maw, oupnae na poe e hah na panuek laipalah ati awh. Khenhaw! rawca na hai hnin vah, namamouh nawmnae na sak awh teh, na thaw katawknaw pueng na dudam awh. ⁴ Nangmouh ni kâyuekâounnae hoi, thoena kut na kahluem awh teh, kâthaw hanelah, rawca hah ouk na hai awh. Sahnin e rawca na hai awh e patetlah na lawknaw hah lathueng lah thai hanelah rawca na hai awh mahoe. ⁵ Rawcahai hnin vah, na ka rek awh e hah maw kai ni ka ngai e lah ao han. A kang patetlah lûsaling hane hoi, buri phai vaiteh vaïphu kâphuen hane na vaimoe. Hetheh, rawcahainae hoi BAWIPA ni a coe e hnin na ti awh han na vaimoe. ⁶ Tamikathout kateknae tangron rathap pouh e, yawcu patue e, hoi yawcu kâkhoe sak e heh ka ngai e rawcahainae nahoehmaw. ⁷ A von ka hlamnaw koe rawca poe hane karoedengnaw im vah, thokhai e nahoehmaw. Caici lah kaawmnaw na hmu navah, khohna na poe hane, nama e tak na hmu toteh na roun hoeh nahoehmaw. ⁸ Na angnae hah amom e kho ka sei e patetlah a sei vaiteh, damnae teh karanglah a pha han. Na lanna ni na hrawi vaiteh, BAWIPA bawilenna e a kamnue sak han. ⁹ Hottelah na kaw vaiteh, BAWIPA ni a pato han. Na kaw toteh ahni ni, hi ka o ati han. Nangmouh thung dawc e yawcu hoi, khutdon hoi takhi e, dudamnae lawk dei e hah na kâvan sak awh teh,

¹⁰ a von ka hlamnaw hanelah hring na pasoung teh, rektap e naw hah a von na paha sak pawiteh, hmonae um vah na angnae a tâco vaiteh, hmonae hah kanîthun patetlah ao han.

¹¹ Pout laipalah BAWIPA ni na hrawi aw h han. Takang a tho navah, ka boum lah na paca han. Na hrunaw hai a tha ka o sak han. Tui ka bu e takha patetlah kahak boihoeh e tuiphuek patetlah na o han.

¹² Nangmouh thung e taminaw ni palang ka rawk e hmuen hah na pathoup aw h han. Se moikapap e adu lah ung e pathoup aw h ati han. Hottelah nangmouh teh, ka rawk e ka pathoupkung tamimaya lam, khosak nahanelah, patuen ka pathoupkung lah na o aw h ati aw h han.

¹³ Sabbath a ek hoeh nahan hoi, hnin kathoung hnin nah na ngai e na sak hoeh nahanelah, sabbath hah nawmnae doeh na titeh, BAWIPA e hnin kathoung teh, bari han kamcu na titeh, ma ngai e tarawi mahoe h, mae nawmnae hai sak mahoe h, lawk dei laipalah na pho na len aw h pawiteh,

¹⁴ BAWIPA dawkvah, na lunghawi vaiteh, talai a rasangnae hmuen daw k na kâcui han. Na pa Jakop ni a pang e râw hoi na kaw k han. BAWIPA e pahni ni a dei toe ati.

59

Isarel Yon pâphona e

¹ Khenhaw! BAWIPA e kut teh rungngang thai hoeh han totouh duem hoeh. Thai thai hoeh nahan totouh a hnâpang hoeh. ² Hatei, namamae payonnae ni na Cathut koehoi na kapek aw h teh, a thai hoeh nahanelah na hawi aw h hoeh nae ni a minhmai hah nangmouh koehoi a hro toe. ³ Nangmae kut teh thi hoi

thoseh, na kutdawnnaw teh yonnae hoi thoseh, na khin sak awh. Nangmouh ni pahni hoi laithoe na dei awh. Na laihoi thoenaeh lawk na dei awh. ⁴ Kângingnae hah apinihai tawng awh hoeh. Lawkkatang hah tarawi awh hoeh. Ayawmyin e lawk hah a kâuep awh teh, laithoe lawk doeh ouk a dei awh. Thoenaeh hah a vawn awh teh, payonnaeh hah a khe awh. ⁵ Tahrun tadui hah a awt awh teh, Bombarui hah a kawng awh. A taduinaw kacate teh a due. A tadui a kâkhei teh tahrun lah a tâco. ⁶ A kawng awh e bombarui teh, khohna lah kangcoung pouh hoeh. A kawng awh e hni hah kâkhu awh mahoe. A sak awh e hno hah kahawihoehe hoi a sak awh dawkvah, a kut dawk thamanae ao. ⁷ A khoknaw teh thoenaeh saknae koe a yawng awh teh, yonnaeh ka tawn hoeh e tami thipalawngnae koe a hue a rang awh. A pouknaeh hai kahawihoehe pouknaeh doeh. A ceinaeh lamthung hai rucatnaeh hoi rawknaeh lamthung lah doeh ao. ⁸ Rounnaeh lamthung panuek awh hoeh. Ahnimae lamthung daw kângingnaeh awm hoeh. A cei awh nahan lamlongkawinaw a sak awh teh, kadawnnaw pueng ni rounnaeh hmawt awh mahoe.

Isarel yon a pâphonaeh

⁹ Hatdawkvah, kângingnaeh teh maimouh koe-hoi kahlatpoung lah ao teh, lannaeh ni hai na phat boi awh hoeh toe. Angnaeh hah ka ring awh, hatei, haw vah hmonaeh teh ao. Ka ring awh e teh angnaeh eiteh, kahmawt poung e koe doeh cei awh.

¹⁰ Mit ka dawn e patetlah tapang thupthup payam awh teh, mit ka tawn hoeh e patetlah pou

payam awh. Tangmin e patetlah kanîthun hai kamthui awh teh, ka rawp awh. Thaonae koe teh tami kadout patetlah doeh ka o awh toe.

¹¹ Tavom patetlah ka hram awh teh, bakhu patetlah ka cingou awh. Kângingnae ka tawng awh ei, pâphawng awh hoeh toe. Rungngangnae ngaihawi awh ei, maimouh koehoi ahla pounge toe.

¹² Bangkongtetpawiteh, kâlawk eknae teh a hmaitung vah hoehoe apap. Ka yonae ni kamamouh koelah kapanuekkhaikung lah ao. Ka payon awh e pueng kamamouh koe ao teh, sakpayon e pueng hai kamamouh ni ka panue awh.

¹³ Kâtapoenae, laithoe lahoi BAWIPA taranae, Cathut hnamthun takhai e, repcoungronae, taranthawnae lawk deinae, ka vawn awh teh, lungthin thung hoi laithoe lawk dei awh.

¹⁴ Kalan lah lawkcengnae ni hnam na thun takhai teh, kângingnae ni kahlatpoung e hmuen koe a kangdue. Lawkkatang teh lam dawka rawp teh, lannae kâen thai hoeh.

¹⁵ Lawkkatang teh a rawk toe. Thoenae ka roun e tami hah hnopainaw a lawp awh toe. BAWIPA ni hot hah a hmu teh, kângingnae ao hoeh toung dawkvah, a maithoe.

Yon dawka hoi Isarel ratangnae

¹⁶ Tami awm hoeh tie a hmu navah, ka kâhet pouh e awm hoeh tie hah kângai lah a ru. Hatdawkvah, a kut hoi roeroe rungngangnae letlang a sak teh, amae lannae lahoi letlang a kangdue sak.

17 Lannae hah bahling lah a patuep teh rungngangnae hah sumluhem lah a kâ muk. Moipathungnae hoi a kamthoup teh, lungthah-meinae angkidung hah a kho.

18 A tawk a sak aw h e patetlah aphu a hmu aw h han. Ama ka taran e naw koe a lungkhueknae hah tarannaw ni khang han a kamcu e patetlah moi a pathung aw h han.

19 BAWIPA e min teh kanîloumlah hoi a taki aw h vaiteh, a bawilenna e hah kanîtho lahoi a taki aw h han. Tarannaw teh tuikalen patetlah a tho navah, BAWIPA e Muitha ni ama hoi kâtaran lah a ngang han.

20 Zion vah ka ratangkung, Jakop kâ tapoena e kamlang takhai naw koe a tho han telah BAWIPA ni ati.

21 Het hah doeh, ahnimouh hoi kaie lawkkam e teh telah BAWIPA ni ati. Na lathueng kaawm e ka Muitha hoi na pahni daw k ka hruek e ka lawk ni, na pahni thoseh, na catounnaw e pahni thoseh, na catounnaw e pahni thoseh, atu hoi a yungyoe hoi a yungyoe totouh tâcawt takhai mahoe h toe telah BAWIPA ni a dei.

60

Kum 1000 uknaeram daw k Isarel bawilenna e

¹ Thaw nateh, ang haw. Bangkongtetpawiteh, na angnae a pha, BAWIPA bawilenna e teh na tak daw k a pha toe. ² Hmonae ni talai hah a ramuk vaiteh, kathapoung e hmonae ni taminaw a ramuk han. Hatei, BAWIPA teh nang daw k tâcawt vaiteh, a bawilenna e teh nang daw k hmu lah kaawm han. ³ Jentelnaw nange angnae

koe a tho han. Siangpahrangnaw hai nange angnae koe a tho han. ⁴ Kalvan lah mounge nateh, na tengpam pueng khenh. Abuemlahoi a kamkhueng awh teh, ahnimouh koe a tho awh. Na capanaw hah lamhla pui hoi a tho awh vaiteh, na canunaw hah a camo patetlah a tawn awh han. ⁵ Hote hah na hmawt awh vaiteh, na ang awh han. Na lungthin hah lunghawinae hoi a kawi han. Bangkongtetpawiteh, tuilam hoi hno kayawtnaw nangmouh koe moi tho awh vaiteh, Jentelnaw hnopai pueng nangmouh koe a tho han. ⁶ Na ram teh kalauk hoi kawi vaiteh, Midian hoi Ephah ram e kalauktan kanaw pueng hah, Seba ram hoi tho vaiteh, sui hoi frankinsen phawt vaiteh, BAWIPA pholennae hah a pâpho awh han. ⁷ Kebar saringnaw pueng ni nangmouh koe a kamkhueng vaiteh, Nebaioth tutannaw ni nangmae thaw a tawk awh han. Ka khoungroe dawkvah coe hane hoi luen awh vaiteh, ka bawilennae im hah ka pholen han. ⁸ Tâmai patetlah kamleng e naw hoi a cu nahan ka pâmam e bakhu patetlah ka kamleng e naw hateh api han namaw. ⁹ Tuilum ramnaw ni na ngaihawi awh roeroe han. BAWIPA na Cathut min hoi Isarel Tami Kathoung koevah, sui, ngun, hoi lamhlapui hoi a capanaw thokhai hanelah Tarshish longnaw hmaloe a tho han. Bangkongtetpawiteh, ama ni a pholen toe.

¹⁰ Ram louk taminaw ni a kalupnae rapan hah a kangning vaiteh, a siangpahrangnaw ni hai na thaw a tawk awh han. Bangkongtetpawiteh, ka lungphuen teh, ka hem awh ei, ka ngaikhai lawi na pahren toe.

11 Hatdawkvah, tami ni Jentelnaw e hnopai nang koe a tho khai thai nahanlah siangpahrangnaw hai be a tho thai nahanelah, na longkhanaw pueng hah karum khodai khan mahoe h toe.

12 Na thaw ka tawk ngai hoe h e miphunnaw hoi uknaeram teh a kahma awh han. Hote miphunnaw teh ngit raphoe lah kaawm awh han.

13 Ka hmuen kathoung hah hawi sak hanelah, Lebanon bawilenna hah nang koe a tho awh han. Hmaica hoi sumpa thing hoi Saipres thing hah cungalah tho awh vaiteh, ka khok toungae hmuen hah ka bawilen sak han.

14 Nang ka rektap e capanaw hai a tabut vaiteh, nang koe a tho a han. Nang ka pacekpahlek e taminaw hai na khok rahim vah a tabo awh han. BAWIPA e khopui Isarel Tami Kathoung Zion telah ati awh han.

15 Nang teh apinihai yah ceisak rumram hane, ceitakhai hane totouh hmuhma e yueng lah yungyoe kahawipoung e ase moikasaw hane lunghawinae ka tho sak han.

16 Jentelnaw e sanu na nei awh vaiteh, siangpahrangnaw e sanu hai na nei awh han. Kai BAWIPA ni nang teh ka rungngangkung hoi na karatangkung Jakop e tami athakaawme lah ao tie hah na panue awh han.

17 Rahum yueng lah sui ka thokhai han. Sum yueng lah ngun ka thokhai han. Thing yueng lah rahum ka thokhai han. Talung yueng lah sum, hnâroumnae hah na kahrawikung lah ka ta han. Lanna hah na lawkcengkung lah ka o sak han.

¹⁸ Na ram dawkvah, thama lah kamthang na thai mahoe h toe. Kâtheikârawngnae na ram dawkvah thai mahoe h toe. Hatei, na tapangnaw hah rungngangnae na ti vaiteh, na thonaw hah pholennae na ti han

¹⁹ Kanî hah khodai lah angnae lah awm toung laipalah, thapa ni hai angnae ang mahoe h toe. Hatei, BAWIPA hah nang hane yungyoe angnae lah awm toung vaiteh, na Cathut teh na bawilennae lah ao han. ²⁰ Na kanî teh khum boi mahoe h toe. Na thapa hai kum boi mahoe h toe. Bangkongtetpawiteh, BAWIPA teh a yungyoe na angnae lah awm vaiteh, lungmathoena hah a pout han. ²¹ Na taminaw koug lan aw h vaiteh, ram hah yungyoe pou a pang aw h han. Ka bawilennae ao thai nahan, ka kut hoi ka taw k e haiyah ka ung e cakang lah ao han. ²² Ka tami kathoen gae hah 1,000 tou h lah a coung vaiteh, a tha kayoun poung e hah mip hun a tha kaawm poung lah a coung han. Ka BAWIPA ni atueng a kuep toteh tang ka pha sak han.

61

Rungngangnae kamthang

¹ Mathoenaw koe kamthang dei hanelah BAWIPA ni satui na awi dawkvah, Bawipa Jehovah e Muitha teh kai dawkvah ao. Ahni ni a lungkareknaw dam sak hane hoi sannaw koe hloutnae pathang pou h hane hoi, pâkhi teh thongkabawtnaw koe thongim paawng pou h hanelah na patoun. ² BAWIPA lungyouk kum hoi, Cathut moipathung hnin dei hane hoi, a lungkamathout e pueng

lungpahawi hanelah na patoun. ³ Ama teh pholen lah ao vaiteh, ahnimouh teh BAWIPA ni ung e, lannae thingkung telah kaw thai nahanelah, hraba yueng lah luhuem, lungmath-oenae yueng lah lunghawinae satui, muiitha thayounnae yueng lah pholennae khohna ahnimouh poe hane hoi, Zion vah lungkamathoutnaw lungpahawi hanelah na patoun telah ati. ⁴ Ayan vah ka rawk e hah bout a sak aw h han. Ayan vah a raphoe aw h e hah bout a thawng aw h han. Se moikapap ka rawk tangcoung e hah bout a pathoup aw h han. ⁵ Imyinnaw ni kangdout aw h vaiteh, nangmae saring a khoum aw h han. Ramlouknaw ni nangmouh hanelah law a sak aw h vaiteh, misur takha a sak aw h han. ⁶ Hatei, nangmouh teh BAWIPA e vaihma, telah na kaw aw h vaiteh, Cathut e san telah ati aw h han. Jentelnaw tawnta e hah na cat aw h vaiteh, ahnimae bawilennae daw k na kâoup aw h han. ⁷ Na kayanae yueng lah let hni touh bari lah na aw m aw h vaiteh, barihoehnae yueng lah amamae ham daw k a konaw m aw h han. Hatdawkvah, amamae ram daw k let hni touh hoi coe aw h vaiteh, a yungyoe konaw mnae teh ahnimae lah ao han. ⁸ Bangkongtetpawiteh, kai Jehovah ni kângingnae hah ka lungpataw teh, lawp e hoi payonnae hateh, ka hmuma. Yuemkamculah ahnimanaw hah a taw k e ka poe vaiteh, ahnimouh hoi a yungyoe lawkkam ka sak han. ⁹ Amamae catounnaw teh, Jentelnaw koe kamthang aw h vaiteh, a canaw teh tamipueng koe panue e lah ao aw h han. Ahnimouh ka hmaw t e pueng ni BAWIPA ni yawhawi a poe e

miphun doeh tie hah a panue aw hah.

¹⁰ BAWIPA daw k a o a nawm katang han. Ka hringnae teh ka Cathut daw k a lunghawi katang han. Bangkongtetpawiteh, yu kalatkung ni luhuem a huem e patetlah thoseh, vâ ka sak hane langa ni a kamthoup e patetlah thoseh, rungngangnae khohna hoi kai hah na pathoup teh, lannae angkidung hoi kai hah na khu toe.

¹¹ Bangkongtetpawiteh, talai ni pho a dâwn sak e patetlah Bawipa Jehovah ni tami pueng e hmalah, lannae hoi pholennae hah a dâwn sak van han.

62

Zion rungngangnae

¹ Zion khopui tie Jerusalem khopui e lannae hah angnae patetlah rungngangnae hah ka ang e hmaiim patetlah a kamnue hoehroukrak kai teh duem kaawm mahoe h. ² Jentelnaw ni a lannae a hmu vaiteh, siangpahrangnaw ni na bawilennae a hmu aw h han. BAWIPA pahni daw k hoi ka tâcawt e min katha lahoi nang na kaw aw h han. ³ BAWIPA kut daw k e bawilennae bawilukhung hoi na Cathut kut daw k e bawinaw e bawilukhung lah na o han. ⁴ Nang teh pahnawt e tami tet mahoe h toe. Na ram hai tami kingdinae telah tet mahoe h toe. Hatei, ngai kaawm e telah ati aw h vaiteh, BAWIPA teh nangmouh daw k a lunghawi vaiteh, na ram hai vâ a tawn han toe. ⁵ Thoundoun ni tanglakacuem a paluen e patetlah na capanaw ni a yu lah a paluen han. Yu ka paluen e thoundoun ni a ham e tanglakacuem daw k a lunghawi e patetlah na

Cathut hai nang dawk a lunghawi han. ⁶ Oe, Jerusalem, rapan kalupnae hah ramvengnaw ka ring sak teh, karum khodai nâtuék hai duem awm awh mahoe. ⁷ Jerusalem kho a caksak teh, pholennae lah ao hoehnahlan totouh BAWIPA hah duem kâhat sak awh hanh. ⁸ BAWIPA ni a rang lae kut a tha kaawm pounge a kutbuembue noe lahoi, lawk a kam teh, na tarannaw koe nangmae na tawk tangcoung e misurtui net awh mahoe toe. ⁹ Hatei, katawkkungnaw ni a ca awh vaiteh, BAWIPA hah a pholen awh han. Cungtalah ka thokhai e naw ni, ka hmuén kathoung thongma dawk misurtui a nei awh han.

¹⁰ Longkha dawk hoi tâcawt awh, tâcawt awh. Taminaw cei nahan lam rakueng awh. Talai paten awh. Talungnaw takhoe awh. Taminaw hanelah mitnoutnae vo awh.

¹¹ BAWIPA ni talai apout totouh hanelah a pâpho toe. Zion canu koe hettelah dei pouh awh. Rungngangnae teh a pha roeroe han. Khenhaw! tawkphu teh ama koe ao teh, a sak e hai a hmalah ao.

¹² Ahnimanaw teh BAWIPA ni ratang e tami, kathoung taminaw, ati awh han. Nang teh pâphawng e, ceitakhai hoe e khopui ati awh han telah a ti.

63

BAWIPA e hnin dawk moipathungnae

¹ Edom ram, Bozrah kho hoi a tho teh, hni ka paling e kâkhu laihoi ka tho e hah apimaw. Ka sungren e hni, a thaonae bawilennae lahoi ka

tho e teh apine. Kai teh lannae lahoi lawk ka dei niteh, rungngang hanelah athakaawme doeh. ² Bangkongmaw na kâkhu e hni hah a paling teh na hni teh misur katinnae koe tami ni a kho e hoi a kâvan. ³ Misur paw hah kai kama dueng doeh katin toe. Tami moikapap e thung hoi kai koe buet touh hai awm aw hoh. Bangkongtet-pawiteh, lungkhuek laihoi katin toe. Lungkhuek lahoi ka coungroe teh, ahnimae a thi ni kaie hni daw k a tâcawn sin teh kaie hninaw hah kakhin sak toe. ⁴ Moipathungnae hnin teh ka lung daw k ao. Ahnimanaw ka ratangnae kum ni a pha toe. ⁵ Ka khet navah kabawmkung apihai awm hoh. Hmoung ka ti nahai kapathawkung apihai awm hoh. Hatdawkvah, kamae kut ni kama hanelah rungngangnae a sak toe. Ka lungkhueknae ni kai heh na man toe. ⁶ Taminaw ka lungkhueknae lahoi ka coungroe toe. Ka lungkhueknae lahoi puenghoi ka kanawi toe. Ahnimae thi teh talai daw k ka rabaw k toe. ⁷ Pahren lungmanae patetlah BAWIPA ni lung na patawnae pueng thoseh, Isarelnaw koe a sak pouh e a lungmanae hai thoseh, BAWIPA e a lungmanae hoi, BAWIPA pahrennae teh ka pholen han. ⁸ Hatdawkvah, BAWIPA ni a dei e teh, ahnimouh teh ka tami katang doeh. Laithoe ka dei hoh e camo lah ao. Hatdawkvah, ahnimae rungngangkung lah ka o. ⁹ Kângairunae daw kvah, a hmalah kaawm e kalvantami ni, ahnimanaw a rungngang teh a lungpatawnae lahoi a ratang. Ayan e tueng pueng daw k hai ahnimouh hah a po teh a hrawi aw h.

¹⁰ Hatei taran a thaw aw h teh, Kathoung

Muitha hah a lungmathoe sak awh. Hatdawkvah ahnimanaw hah a taran teh a tuk.

¹¹ Hat toteh, ayan e Mosi hoi a taminaw hah pahnim awh hoeh, hateh hettelah ati awh, ' tali thung hoi a tuhu kakhoumkungnaw hoi rei ka tâcawkhaikung Cathut te nâne ao. Kathoung Muitha ahnimanaw koe kapoekung nâne ao.

¹² Ka bawilen poung e, Mosi e aranglae kut hoi kahrawikung te nâne ao. Ama hanelah a yungyoe min a kâsai nahanelah ahnimae hmalah tui kâbawng sakkung te nâne ao.

¹³ Ayawn dawк marang yawng sak e patetlah kangangkung awm laipalah, ka dungpoung e tui dawк hoi ahnimanaw kahrawikung te nâne ao.

¹⁴ Ayawn dawк saringnaw ka cet e patetlah BAWIPA e Muitha ni a kangdue sak teh, hottelah a min sungren sak nahanelah namae na taminaw hah na hrawi toe ati awh.

Pankângai ratoumnae

¹⁵ Kalvan hoi khen cathuk haw. Nange thoungnae hoi na bawilennaе hoi na onae hmuen koehoi kenhaw! Na thaonae hnosakenaw hoi na lungthahmeinae nâne ao. Na lungthin hoi na dounnae hoi na pahrennae teh yout koe a roum toung boma.

¹⁶ Abraham ni kaimanaw na panuek awh hoeh. Isarelnaw hah na coe hoeh nakunghai, atangcalah, kaimae na pa lah nang teh na o. Ayan hoi kamtawng teh, kaimanaw na ka ratang e Jehovah nama doeh.

¹⁷ Oe, BAWIPA, bangkongmaw na lamthung dawк hoi kaimanaw hah lam na phen sak vaiteh nang takihoehnae lungthin hoi na pata sak han

vaw. Na san, râw kacoekungnaw kecu dawк bout ban haw.

¹⁸ Na tamikathoungnaw ni tueng kaduemca dueng a coe awh teh, na katarankungnaw ni na hmuen kathoung hah koung ka rawк lah rep a coungroe awh.

¹⁹ Na uk boihoeh e hoi na min ka phawт boihoeh e ayan e tami patetlah doeh ka o awh toe.

64

¹ Oe, Nang ni kalvan paawng nateh kum haw. Na hmalah monnaw kâhuen naseh. ² Hmai ni songnawng a kak e patetlah thoseh, tui a tangdo sak e patetlah thoseh, awm naseh. Hottelah pawiteh, na tarannaw ni na min panueк awh vaiteh, na hmalah vah miphun pueng ni a pâyaw awh han. ³ Kaimouh ni ka ngaihawi awh hoeh e hлак, kângairu hno a sak toteh, na tho teh, monnaw teh na hmalah a kâhuet awh. ⁴ Ama kangaihawinaw hmalah hawinae ka sak e Cathut, nang hloilah alouke Cathut hah talai pek kamtawng hoi apinihai panueк boihoeh, hnâ hoi hai thai boi hoeh, mit hoi hmawт boihoeh. ⁵ Onawmnae lahoi kalan lah ka tawк e, na lamthung dawк nang ka pahnim hoeh e, hah nang ni na kâhmo, bokheiyah, na lungkhueк. Bangkongtetpawiteh, ka payon awh toe. Hete lamthung heh pou ka dawn awh toe. Rungngang lah kaawm awh han rah nama aw. ⁶ Bangkongtetpawiteh, kathounghoehe patetlah koung o awh toe. Lannaе pueng teh, kakhin e hna hoi a kâvan. Maimouh pueng teh thinghna patetlah kamyai awh teh, mamae yonnae ni

kahlî patetlah na palek awh. ⁷ Na min ka kaw e, nang dawk kâuep hanelah mahoima kâhroecoe e tami buet touh boehai awm hoeh. Bangkongtet-pawiteh, a minhmai a hro teh, maimouh hah mamae yon dawk na raphoe awh toe. ⁸ Hatei, Jehovah, nang teh kaimae na pa lah na o. Kaimouh teh amhrulai lah ka o awh. Nang teh kaimae hlaamkabokung lah na o. Kaimouh pueng teh, na kut hoi na sak e hno lah ao. ⁹ Oe BAWIPA, puenghoi na lungkhuek sak hanh. Kangeknae yon hah pou pâkuem hanh. Kenhaw! Kaimouh pueng teh BAWIPA e tami doeh.

¹⁰ Kho kathoung teh kahrawng lah ao toe. Zion mon hai kahrawng lah ao toe. Jerusalem kho hai a rawk toe.

¹¹ Mintoenaw ni nang na pholennae hmuen, kaimae kathoung ni teh a mei kahawi e im teh, hmai a kak toe. Kaimouh ni ka ngai poung awh e hmuennaw teh koung a rawk toe.

¹² Oe BAWIPA, hetnaw heh na panguep han na ou. Duem na o takhai vaiteh, maimanaw hah puenghoi na ru sak han maw.

65

Lawkcengnae hoi rungngangnae

¹ Kai na ka pacei hoeh naw e lawk ka thai pouh teh, Kai na ka tawng hoeh e ni na hmu awh toe. Kai hah na khen aw haw, na khenhaw! telah ka min ka kaw hoeh e miphunnaw koe ka dei pouh toe. ² Amamouh ngai patetlah kahawihoehe lam ka dawn niteh, kangek e miphunnaw koelah, kanîrui rui ka kut kadai pouh han. ³ Takha daw k thuengnae a sak aw h teh, amhru van hmuitui

hmai a sawi aw h teh, ka lungkhuek nahanlah ka hmalah pou a sak aw h. ⁴ Phuen daw k ka tahung niteh, arulae hmuen koe ka roe e, vokmoi ka cat ni teh panuettho e moi hang ka pahrap e ni, ⁵ Nama dueng aw m haw. Kai koe hnai hanh, nang hlak bet ka thounghnawn ouk ati. Hot patet e taminaw teh, ka hnawng daw k e hmaikhu hoi pou ka kang e hmai patetlah doeh ao aw h. ⁶ Ka hmalah thut lah ao daw kvah, duem kaawm mahoe h, moi ka pathung han. Bokheiyah, na lungtabue daw k na payonnae hoi na mintoenaw e payonnae teh moi ka pathung van han telah BAWIPA ni ati ⁷ Ahnimou h ni teh, mon kalennaw daw k hmuitui hmai a sawi aw h teh, monruinaw daw k ka min a dudam aw h. Hatdaw kvah, hmaloe a sak aw h e hah poe hanelah lungtabue daw k ka bangnue han. ⁸ BAWIPA ni bout a dei e teh, misurbom daw k misurtui katha hmu toteh, raphoe hanh, yawhawinae ao ouk ati aw h e patetlah ka sannaw hane daw kvah, hottelah ka raphoe mahoe h. ⁹ Jakop catoun thung hoi cati buet touh hai thoseh, Judah catoun thung hoi ka monnaw râw lah ka coe hane thoseh, ka tâco sak han. Kai ni ka rawi e naw ni ram hah râw lah a coe vaiteh, ka sannaw ni kho a sak nah aw h han.

¹⁰ Kai na ka tawng e taminaw hanelah, Sharon teh tutakha lah ao han. Akhor yawn hai maitohu roenae hmuen lah ao han.

¹¹ Nang teh BAWIPA ka pahnawt e, kaie kathounge mon ka pahnim e, Gad cathut hanelah caboi ka phai pouh e, Meni cathut hanelah kalawt tangcoung e misur ka awi e tami lah na o aw h.

¹² Nangmouh teh, na parei vaiteh, tahloi koe na poe awh han. Abuemlahoi na due awh nahanlah na tabut awh han. Bangkongtetspawiteh, nangmouh kai ni na kaw awh navah na pato awh hoeh. Ka dei navah, na thai awh hoeh. Ka hmaitung vah kathout hno na sak awh toe. Ka ngaihoeh e hno hah na rawi awh.

¹³ Hatdawkvah, Bawipa Jehovah ni a dei e teh, ka sannaw ni a ca awh han. Nangmouh teh na vonhlan awh han. Ka sannaw ni a nei awh han. Nangmouh teh tui na kahran awh han. Ka sannaw ni a konawm awh han. Nangmouh teh na kaya awh han.

¹⁴ Ka sannaw ni lunghawi laihoi la a sak awh han. Nangmouh teh lungmathoe laihoi na ka awh han. Muitha lungmathoe laihoi na cingou awh han.

¹⁵ Nangmouh teh ka rawi e taminaw koe na min thoebo hanelah na ceitakhai awh han. Bawipa Jehovah ni nang hah na thet vaiteh, a sannaw hah min louk hoi a kaw han.

¹⁶ Talaivan vah mahoima yawhawi ka poe e teh, yuemkamcu e Cathut kâuep laihoi yawhawi a poe han. Talaivan thoe ka bo e teh, Cathut noe laihoi thoe a bo han. Bangkongtetspawiteh, ahmaloe e naw hah pahnim toe. Ka hmaitung vah a kahma toe.

Ka sungren e sak kathanae

¹⁷ Kenhaw! Kalvan katha hoi talai katha hah ka sak. Ahmaloe e kalvan hoi talai hah pouk mahoe, pâkuem mahoe toe.

¹⁸ Ka sak e hno dawkvah, a yungyoe lunghawi awh nateh, konawm awh. Jerusalem dawka ka

konawmnae lah khocanaw dawk ka lunghawinae lah ka sak han.

¹⁹ Kai hai Jerusalem kho kecu dawk ka konawm han. Ka taminaw kecu dawk ka lunghawi han. Hote kho dawk khuika lawk hoi hramki lawk bout thai mahoe h toe. ²⁰ Hote kho dawk a kum kanaw e awm mahoe h. A kum kakuep hoeh e matawng hai awm mahoe h. A kum 100 touh a pha nah kadout e hah camo telah pouk han. Ka yon e tami teh a kum 100 touh a pha nah dout pawiteh, thoebo e tami telah pouk han. ²¹ Ahnimouh teh ma ni sak e im dawk ao aw h han. Ma ni patue e misur paw a ca aw h han. ²² Ahnimouh teh ma ni sak e im hah alouke ni awm nah aw h mahoe h. Ahnimouh teh misur a patue e hah alouke ni cat mahoe h. Ka taminaw e hringnae teh thingkung se patetlah a saw vaiteh, ahnimouh teh ma ni sak e hno hah moikasawlah a hno aw h han. ²³ Ka rawi e naw teh, ayawmyin lah tawk aw h mahoe h. A kum kaduem e capa khe aw h mahoe h. Ma koehoi kamtawng teh, catounnaw teh, BAWIPA ni poe e yawhawinae ka pang e tami lah ao aw h han. ²⁴ Ahnimouh ni na kaw hoehnahlan ka pato han. A dei aw h lahun nah ka thai pouh han. ²⁵ Asui hoi tuca teh cungtalah rei a pai han toe. Sendek ni maito patetlah hram a ca han. Tahrun teh vaiphu a ca han toe. Kaie mon kathoung pueng daw k buet touh hoi buet touh pakekpahleknae, kâraphoenae awm mahoe h toe telah BAWIPA ni a ti.

66

A katang e bawknae hoi a kaphawk e bawknae

¹ BAWIPA ni hettelah a dei, kalvan teh ka tahungnae bawitungkhung lah ao teh, talai teh ka khoktOUNGNAE lah ao. Namaw im na sak pouh awh han. Namaw ka kâhatnae hmuen ao han. ² Bangkongtetpawiteh, hete hnocawngca pueng teh, ka kut hoi ka sak teh, kaawmnaw doeh telah BAWIPA ni ati. Hateiteh, ka roedeng naw hoi muitha hoi pankângai e tami, ka lawk dawK ka pâyaw e tami hah ka khet han. ³ Maitotan ka thet e tami teh, tami ka thet e patetlah ao han. Tuca hoi thuengnae ka sak e tami teh, ui lahuen ka khoe e patetlah ao han. Tavai ka poe e tami teh, vok thi ka poe e patetlah ao han. Hmuitui ka thueng e tami teh, meikaphawk yawhawi ka poe e patetlah ao han. Mahoima lamthung ka kârawi e tami teh, panuettho e hno dawK a lungkahawi e patetlah ao han. ⁴ Hottelah amahoima ka kâdum e hah ka rawi han. A taki e hno hah ahnimae lathueng ka pha sak han. Bangkongtetpawiteh, ka kaw nah apinihai na pato hoeh. Lawk ka dei teh thai awh hoeh. Hateiteh, ka mithmu vah, yonnae a sak awh teh, ka lunghawihoeHNAE hno hah a kârawi awh.

BAWIPA ni Zion lannaE lah a coe sak

⁵ A lawk dawK ka pâyaw e naw, BAWIPA lawk thai awh haw. Nang ka hmuhma e na hmaunawngaha, ka min kecu dawK nangmouh kahreknaw ni, na lunghawinae ka hmu thai awh nahanelah, BAWIPA teh pholennaE awm seh telah ati awh, hateiteh a kaya awh han. ⁶ Khopui dawK hoi ruengruengtinaE, Bawkim dawK hoi hramnaE pawlawk, BAWIPA hramnaE

pawlawk, a tarannaw kakueplah moi a pathung-nae pawlawk teh thai aw haw. ⁷ A pataw hoehnahlan a khe teh, von a pataw hoehnahlan camo a khe. ⁸ Hot patet e teh apinimaw a thai boi. Hot patet e teh apinimaw a hmu boi. Hnin touh daw k hoi ram hah khe thai han na maw. Vaitalahoi mip hun a tâco thai han na maw. Bangkongtetpawiteh, Zion ni a pataw tahma nah camo tang a khe. ⁹ Khenae tueng daw k tâcawt sak laipalah, ka o han na maw, telah BAWIPA ni ati. Ca khesakkung ni ca tawn sak hanelah pasoung laipalah ka o han maw, telah Cathut ni a ti.

¹⁰ Jerusalem ka lungpataw pueng, Jerusalem teh konawm khai aw h. Ama kakhuinaw a ma lunghawikhai nateh konawm aw h.

¹¹ Hottelah na teh aw h pawiteh, ahnie sanu na net aw h vaiteh na boum aw h han. Ahnie tawnta e thung hoi rasat vaiteh, na nawm aw h han.

¹² BAWIPA ni a dei e teh, roumnae palang patetlah thoseh, Jentelnaw e tawnta e teh ka lawng e tuiphuek tui patetlah thoseh, Jerusalem vah ka pha sak han. Nangmouh teh sanutui na net aw h vaiteh, keng daw k tawmnae, khokpakhu daw k tawmnae hah na coe aw h han.

Cathut uknae hoi lungkhueknae

¹³ A manu ni a ca lung a mawng sak e patetlah nangmouh lung ka mawng sak han. Jerusalem khopui daw k lung na mawng sak aw h han.

¹⁴ Hote na hmu aw h toteh, na lung ahawi aw h han. Na hrunaw hah ka hringsuep e thingkung patetlah a thao aw h han. BAWIPA e a kut hnotithainae teh sannaw koe thoseh,

a lungkhueknae teh a tarannaw koe a kamnue han.

¹⁵ Khenhaw! a lungphuenna ka patawpoung lah a kamnue nahane hoi, na yuenae hmaisaan patetlah a kamnue nahanelah, BAWIPA teh hmai rangleng hoi bongparui patetlah a tho han.

¹⁶ Bangkongtetpawiteh, hmai hoi tahloi hoi, BAWIPA ni takthai hoi kahringnaw pueng lawk a ceng han. BAWIPA ni a thei e teh a pap poung han.

¹⁷ Mahoima kâthoung sak hane hoi, mahoima kâkapek hanelah, takha koe kacetnaw, meikaphawknaw rahak vah, pou ka cet e, vokmoi hoi panuetho e moihnam moi ka cat e naw pueng cungtalah he a kahma aw h han telah BAWIPA ni a ti.

¹⁸ Bangkongtetpawiteh, a sak aw h e hoi a pouk aw h e ka panue, mip hun tangkuem hoi lawk phunkuep tangkuem hah, ka pâkhuengnae tueng a pha han. Tho aw h vaiteh ka bawilenna hah a hmu aw h han.

¹⁹ Ahnimouh koe kamnuena hah ka o sak han. Hahoi teh, ahnimouh rahak vah, rektapnae koehoi ka hlout e ka mip hun tangkuem koe, Tarshish, Pul, licung longkawi e Lud, Tubal hoi Javan, ka min kamthangnae ka panuek boihoeh e naw koe, tuipui namran ahlanae koe ka thak han. Hottelah, Jentelnaw koe ka bawilenna a pâpho aw h han.

²⁰ Hahoi Isarelnaw ni, kathoung hlaam hah thueng e hno lah BAWIPA e im daw k ouk a thokhai e patetlah mip hunnaw pueng thung daw k hai na hmaunawng hanaw hah marang daw k hoi thoseh, leng daw k hoi thoseh, kâkayaw t e van hoi thoseh, la daw k hoi

thoseh, kalauk dawk hoi thoseh, Jerusalem mon kathoung dawk BAWIPA koe ouk a thueng aw h e patetlah a thokhai aw h han telah BAWIPA ni a ti. ²¹ Hotnaw thung dawk hoi tami tangawn vaihma hoi Levihnew hanelah ka la han telah BAWIPA ni a ti. ²² Bangkongtetpawiteh, kalvan katha hoi talai katha ka sak hane teh, ka hmalah ka kangning hane patetlah, na catounnaw hoi na min a kangning han telah BAWIPA ni a ti. ²³ Hahoi teh, hettelah han. Thapa a reinae koehoi bout a rei katha totouh, sabbath hnin hoi alouke sabbath hnin totouh moithangnaw pueng Kai baw hanelah ka hmalah a tho aw h han telah BAWIPA ni a ti. ²⁴ Tâcawt aw h vaiteh, kai taranlahoi kâ kaeknaw e ro hah a khet aw h han. Bangkongtetpawiteh, pârî hai dout thai hoeh ni teh hmai hai roum thai mahoe h. Tami pueng hanelah teh panuet a tho han.

Thai Phum Holy Bible
The Holy Bible in the Thaiphum Chin language of
Myanmar

Copyright © 2020 Batupuei Christian Fellowship

Language: Thai Phum (Chin, Thaiphum)

Translation by: Batupuei Christian Fellowship

copyright only valid in Myanmar; Public Domain elsewhere

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2024-05-01

PDF generated using Haiola and XeLaTeX on 1 May 2024 from source files dated 1 May 2024

84c7fe95-3b68-5ab6-b17e-a642d33ac078